

ନିକେତବ
ଓଓଓଓଓଓଓ
ବାଓଓ
କଓଓଓଓଓଓଓ
ପ୍ରବଓଓ



ବ୍ରଜଗୋପାଳ ସିଂହ



লকেইর উৎপত্তি বারো কতহান প্রবন্ধ

ব্রজগোপাল সিংহ

বিষ্ণুপ্রিয়া মণিপুরী সাহিত্য সংস্কৃতি একাডেমি

হিংগালা

পইলা প্রকাশ : ২০১৩
হিংগালা, করিমগঞ্জ

© : লেখক

ফংকরানিং : বিষ্ণুপ্রিয়া মণিপুরী সাহিত্য সংস্কৃতি একাডেমি,
হিংগালা, করিমগঞ্জ

প্রচ্ছদ বার ছাপানিং : সরলা ভ্রুয়েভ
গিরিধন ধাম, ভকতপুর
চেংকুড়ি, রোড, শিলচর-৫

পাংলাক : রূপা আহোহান

LAKEIR UTPATTI BARO KATAHAN PROBANDHA

A collection of essays about historical and cultural aspects in
Bishnupriya Manipuri by Brajagopal Sinha.

ଶ୍ରୀକୃଷ୍ଣାୟ ନମଃ

ଉତ୍ସର୍ଗ

ବାବା କୁଳଚନ୍ଦ୍ର ସିଂହ

ବାରୋ

ଇମା ହେମଲତା ଦେବୀ

মোর য়ারী আকচুটি

বাক্সা আগেত্তপুৰি ইতিহাস চৰ্চাৰ ভিতৰেদে আমাৰ সমাজৰ গোষ্ঠী বিভাগৰ উৎপত্তি বা লকেইৰ য়ারী বারো আৰাকৌ কতহান প্রবন্ধ লেৰিক আকাৰে ছাপেয়া ফঙবৰানিৰ খৌরাঙহান টাটিহানৰ সাদনে খউনুগৎ লাগিয়া আছে। বিশেষ কৰিয়া ভাৰত সরকারৰ স্বীকৃতি প্রাপ্ত উত্তৰ পূৰ্বাঞ্চলৰ ঐতিহাসিক সংস্থা বা সংক্ষেপে NEIHA (North East India History Association) বুলতারা সংস্থা আহানৰ সদস্যগো অনাৰ কাৰণে ২০০২ সালে আগৰতলারমা ঔ উত্তৰ পূৰ্বাঞ্চল ঐতিহাসিক সম্মেলনে বিষ্ণুপ্রিয়া মণিপুরী গোষ্ঠী বিভাগৰ উৎপত্তিবুলিয়া প্রবন্ধ আহান ইংরেজীলো ইকৰিয়া দেছিলু, যেহানৰ Summary হান স্বীকৃতি দিয়া ঔসংস্থান্ত ফঙকরেছি। গতিকেই আমাৰ ঠারে ঔ প্রবন্ধ উহান খানি বিস্তারিতভাবে উপস্থাপন করেছু, এহানাত ঐতিহাসিক মহেন্দ্ৰকুমার সিংহৰ মণিপুরেৰ প্রাচীন ইতিহাস বারো ঔসাদে আৰাক কতগো প্রাচ্য-পাশ্চাত্য ঐতিহাসিকৰ তথ্য পুলকরেছু বারো লগে আৰাকৌ কতহান ধৰ্মমূলক বারো কৃষ্টিকলা সম্পৰ্কীয় প্রবন্ধ যেমন— বিষ্ণু বা লামৰ দ্যৌ বা চেৰউ, দশাবতারৰ মাহাত্ম্য বারো আমাৰ মানুৰ ভূমিকা, ধৰ্ম বারো সমাজ, সমাজৰ তিনগো ধৰ্মপ্রাণ সিদ্ধপুরুষ, কানাইৰ ইমফামৰ ঐতিহাসিক গুরুত্ব, হিংগালারমা তনুবাবু-মহেন্দ্ৰ-গীতিস্বামী, ১৮ মাৰ্চ জাতৰ গুরুত্বপূৰ্ণ দিনহান ইত্যাদি— এতা প্রবন্ধ বিভিন্ন সময় বিভিন্ন পত্ৰ-পত্ৰিকাৰমা বাংলা বারো আমাৰ ঠারে ছাপেয়া নিকুলেছে।

গজৰ উল্লেখ কৰা পত্ৰ-পত্ৰিকাৰমা ফঙছে প্রবন্ধ এতা লিম মাঙয়া যিতইগা সাদ বুলিয়া লেৰিক আকাৰে ছাপেয়া নিকাললে সংৰক্ষিত অয়া থাইতয় নিঙে বারো উঠে আইতারা তৰুণ প্রজন্ম বারো আৰাকৌ ভবিষ্যৎ প্রজন্ময় বারো জ্ঞানী-গুণী গিরিগিথানিৰে গবেষণাৰ কাম কাজে সমাজৰ উন্নতিকল্পে চুটি আগো অইলউ পাংলাক কৰে পাৰব নাকিতা সাদ বুলিয়া নিজরাং দখল নাথনিৰ মানসিকতাল হাবিৰ মুঙে লেৰিক এহান হাজেয়া নিকালানিৰ হৎনা করেছু।

আৰাক অনুরোধ আকচুটি অইলতাই— লেংকরা প্রবন্ধ এতারমা তথ্যগত অনেক ভুল-ত্রুটি থাইতে পারে বারো লগে কোন কোন ক্ষেত্রে বানান সংক্ৰান্ত ব্যাপারে ‘ছ’ বারো ‘স’-ৰ ব্যবহার দ্বিযোতাউ হাদিত থাইতে পারে। ঔতা হাবিৰ অইতি-তামথি অইলে কোন কিতিকুরুম নাথয়া সজ্ঞানে নিজগুণে পাকৰিয়া সুপৰামৰ্শ দিলে আত দ্বিযোহানলো ঙ্কৰানি অইতয়।

খামতলেদে মাতানি মনাউৰিতা— যেতার পাংলাকে লেৰিক এহান নিকালানিৰ সুপৰামৰ্শ বারো উৎসাহ পেইলু ঔ গিরিগিথানি ঔতা অইলাতয়— মোৰ বন্ধুবৰ কবি-সাহিত্যিক কালাসেনা সিংহ, সভাপতি, সাহিত্য সংস্কৃতি একাডেমি, সিংলা, যে সংস্থাহানৰ পাংলাকে লেৰিক এহান ফংকরেছি বারো মোৰ স্নেহাস্পদ ছাত্ৰ সন্তোষ সিংহ বারো ছাপানিৰমা আগবাড়েছি সরলা ড্ৰওয়েভ, ভকতপুৰ চেংকুড়ী রোড, শিলচৰ— হাবিৰে মোৰ হৃদয়ৌপা থাকাত বারো কৃতজ্ঞতা জানাউরি। ইতি—

ব্রজগোপাল সিংহ

ভূমিকা

প্রবীণ প্রবন্ধকার তথা সাহিত্যিক শ্রীব্রজগোপাল সিংহ গিরকর ‘লকেইর উৎপত্তি বারো কতহান প্রবন্ধ’ গ্রন্থ এহান তথ্য সমৃদ্ধ প্রবন্ধাবলীর সংকলনহান। দীর্ঘ তিরিশ, বত্তিরিশ বসরর বৌদ্ধিক সাধন-চিন্তার অমূল্য ফসল আকেইহান এ সংকলনর মাধ্যমে সমাজ প্রেমর খুন্তল হিসাবে গিরকে পাঠককুলর আতে তুলিয়া ধরেদেছে, উহানে আমি তারাং কৃতজ্ঞচিত্ত।

গ্রন্থ এহানর পইলাকার প্রবন্ধহান ‘লকেইর উৎপত্তি’-র বিতরে সমাজর বংশ-গোষ্ঠী-লকেইর ইতিহাসর লৌটাকগ অসে ক্ষেত্র এগং নিজর স্বপক্ষে প্রাচ্য-পাশ্চাত্যর বিভিন্ন ঐতিহাসিক তথা গবেষক পণ্ডিতর প্রাসঙ্গিক উক্তি উল্লেখ করিয়া, তার বক্তব্যহানরে লেইলেক নাকরানির মানসে তথ্যপাতিল লেইত্রং করিয়া সঠিক চিত্র আগ রূপায়নর হনার সাদনে কষ্টসাধ্য সূক্ষ্মকর্ম আহান ফুটেসে। এহান নিয়াম নাপাল করিল মত বিষয় আহানরগায় অসে।

‘কানাইর ইমফামর ঐতিহাসিক গুরুত্ব’ ‘বিষু বা লামর দৌ (চেরউ)’ ‘ধর্ম বার সমাজ’ ‘দশাবতারর মাহাত্ম্য বার বিষুপ্রিয়া মণিপুরীর ভূমিকা’ ‘সমাজর তিনগ ধর্মপ্রাণ সিদ্ধপুরুষ’ ‘হিংগালারমা তনুবাবু-মহেন্দ্র-গীতিস্বামী’ ইত্যাদি গবেষণাধর্মী লেখা এতা প্রত্যেকহান অনন্য সম্পদ আকেইহান। এ লেখার মাধ্যমে গ্রন্থকার গিরকর নিপুন লেখনীগে আমার সমাজ তথা ধর্মসংস্কৃতি লোকসংস্কৃতির য়ারি মহান পুরুষর জীবন দর্শনর বিষয়ে অনুসন্ধিৎসু মানুর মনর খরাক জুগেয়া অফুরন্ত আনন্দ দেনা পারতৈ বুলিয়া নিংকরুরি।

হাবিত্ত ডাঙর কথাহান অইলতাই এ গ্রন্থ এহানে গবেষণার কামে কিতিকুরুম নায়া গবেষকরে সাহায্য করে পারতৈ।

আশা করুরি, গ্রন্থকারর এ প্রচেষ্টা এহান আরাকণ্ড পালয়া থাইতৈ বার তার লেখনীগে আরাকণ্ড উজ্জ্বল অবদান লিংখাং করে যিতৈগা।

কালাসেনা সিংহ

সভাপতি

বিষুপ্রিয়া মণিপুরী সাহিত্য সংস্কৃতি একাডেমি, হিংগালা।

সূচী

লকেইর উৎপত্তি	৭
ধর্ম বারো সমাজ	২৬
দশাবতারর মাহাত্ম্য বারো বিষ্ণুপ্রিয়া মণিপুরীর ভূমিকা	৩০
মহালয়ার পিতৃপক্ষরমা তর্পনর মাহাত্ম্য	৩৬
কানাইর ইমফামর ঐতিহাসিক গুরুত্ব	৪০
বিষু বা লামর দ্যৌ (চেরউ)	৪৩
সমাজর তিনগো ধর্মপ্রাণ সিদ্ধপুরুষ	৫০
হিংগালারমা তনুবাবু-মহেন্দ্র-গীতিস্বামী	৫৭
১৮ মার্চ জাতরকা গুরুত্বপূর্ণ দিনহান	৬৩

লকেইর উৎপত্তি

বিষ্ণুপ্রিয়া মণিপুরী গোষ্ঠী বিভাগর উৎপত্তি লিখিত নথিপত্রে বা সংরক্ষিত নথিপত্রে কম পেয়ার। যেতাউ অক্ এরে প্রবন্ধ এহান চেপ্টা আহান যেহানর ভিতরেদে হো থাইনাকার মণিপুরর খুটি লিঙয়া পালছি বিষ্ণুপ্রিয়া মণিপুরী পূর্বাপুরুষ বারো সামাজিক কৃষ্টিকলা, ঐতিহ্য হাবি চিনকরে ইঙ্গিত পেয়ার বিভিন্ন জ্ঞাতি-গোষ্ঠীর পরিচয় বা পুরেল, আপকপা পূজার প্রচলন বারো অন্যান্য পূজা পাঠ; যেমন— দুর্গাপূজা, পাহাংপা পূজা বা চাপাল দেনা, সরারেল বারো খুমল রাজার এলাকারমা বরণ ডাহানির এলা ইত্যাদি। এতা হাবি জ্ঞাতি-গোষ্ঠীর ভিতরেদে প্রচলন, খানি আহান সংরক্ষিত লেরিক নথিপত্রে পেয়ার যেহান থাংনাত সাতকরানি আছে বারো— খামতলেদে তথ্য পুলকরানির নাং দ্রষ্টব্যরমা উল্লেখ থাইতয়। লকেই বা জ্ঞাতি - গোষ্ঠীর নাঙ ইকরতে কোন ভুল - ত্রুটি অইলে ইকরিয়া সুপরামর্শ দেনিরকা পাঠক পাঠি কারাং অনুরোধ থাইল। হো থাইনাকার বিষ্ণুপ্রিয়া মণিপুরীর ধর্মীয় প্রধান বৈশিষ্ট্যহান আছিলতায় বিষ্ণুমূর্তির পূজা। লোকতাক হুদগরে কেন্দ্র করিয়া বিষ্ণুপ্রিয়া মণিপুরী যেতা আছিল, ঔতায় বিষ্ণুমন্দির হংকরিয়া বিষ্ণুমূর্তির পূজা প্রচলন করলা, যেহান আর্য সভ্যতা সংস্কৃতির প্রধান বৈশিষ্ট্য আহান। থাংনায় থাংনায় ঔহানরে কেন্দ্র করিয়া পঞ্চ বিষ্ণুপ্রিয়ার ভিতরে বংশর আদি পুরুষ গিরকরে দেবতাজ্ঞানে পিপাগো বা আজাগো বুলিয়া পূজা করানি অকরলা, যেহানর নাং “আপকপা পূজা”।

লোকতাক হুদগরে কেন্দ্র করিয়া বিভিন্ন এলাকারমা বিষ্ণুপ্রিয়া মণিপুরী সিলয়া আছিল— ঔ এলাকা উতার নাং অইলতায় — নিংখৌখং, হেইরুক, নঙইখং, খুনৌ, নাচৌ, খৌবাল, ঙেইঙং ইত্যাদি। বিভিন্ন এলাকা জুড়িয়া বসতবাড়ী করেছি বিষ্ণুপ্রিয়া মণিপুরী হাবিয়ে তা থকয়া বিভিন্ন ক্ষত্রিয় - অক্ষত্রিয় গন্ধর্ব বংশাবলী তিলয়া বিভিন্ন জ্ঞাতি গোষ্ঠীর সৃষ্টি করেছি। এসাদে করে বিভিন্ন বংশর নাং খেই - খেই এলাকার রাজার নাঙলো চিনকরিয়া বংশ পরিচয়র উল্লেখ আছে - উতার নাং ক্ষুমল, মৈরাং, আঙ্গম, লোয়াং, নিংখৌজা ইত্যাদি। ঔ বংশ উতা গোত্র আকেইগ মুনি-ঋষির নাং চিনকরিয়া উল্লেখ আছে, যেতারে কেন্দ্র করিয়া আরাকৌ তেংকল আহান হুরকাং হুরকাং জ্ঞাতি গোষ্ঠীর সৃষ্টি আছে। এহানর প্রমাণ ধরণীসংহিতারমা থাংনাত পণ্ডিত জগদানন্দ বর্মণ গিরকর ‘ক্ষুমল পুরাণ’রমা উল্লেখ আছে -

“বজ্রবাহনের তেজেতে আর সাবিত্রীর গর্ভেতে।

জন্মিলেন পূণ্যবন্ত দাওমণি তাতে”।।

অর্থাৎ বজ্রবাহনর ঔরসে সাবিত্রী ইমার গর্ভে পুতক দাওমণি জরম অসে বুলিয়া ক্ষুমল পুরাণমতে হারপেয়ার। আরাকৌ ধরণী সংহিতার বিষ্ণুপ্রিয়া সংস্করণে ৪র্থ পল্লবরমা উল্লেখ করেছিতায়-

“সঙ্গতে গর্ভসম্পূর্ণে সাবিত্র্যাঃ শুদ্ধসম্মতে ।

ক্ষত্রধর্মময়সুতং প্রসূত সা পতিব্রতা ॥

দাওমণি ইতি নামানং বিখ্যাত ভুবন এয়ে ।

পূর্বাচারদ্য সম্পূর্ণ চন্দ্রামিবার্ণবঃ”— ৪র্থ পল্লব

অর্থাৎ সাবিত্রী ইমায় পুতক দাওমণিরে জরম দেনার থাংনাত বজ্রবাহন পুতক দাওমণিরে সিংহাসনরমা অভিষেক করুবারনির থাংনাত দৌর খয়া পেইলগা। ঔহানর থাংনাত ক্ষুমল রাজপণ্ডিত লাংকৈ লুই গিরকে “মণিপুর চক্রম” লেংকরা লেরিকরমা উল্লেখ করেছেতায়—

“বীর্ষ্যং দাওমণেস্তুস্য হিমাঙ্ক পুরুষোত্তমঃ ।

কলায়াঃ গর্ভমাশ্রিত্য লোভে জন্ম মহীতলে ॥

ততো হিমদেবোহপি মায়া শক্তি স্বরূপিনাং ।

যৌবনে পর্যনৈষচে শূন্যত্বং জন্মেজয় ॥

ততো মহামায়াকালে তেন মহাত্মনী ।

প্রসূত সপ্তদেবৌ প্রজাপতৌতুল্য বিক্রমৌ” ॥

(দ্রষ্টব্য - মণিপুরের প্রাচীন ইতিহাস ১ম খণ্ড- পৃঃ ৬২)

অর্থাৎ— রাণী কলা ইমার গর্ভরমা দাওমণির ঔরসে পুতক হিমাঙ্ক জরম অছিল বারো হিমাঙ্কর পুতক হিমদেব মায়াস্বরূপিনী মহামায়ারে লোহং করিয়া থাংনাত হিমদেবর ঔরসে মহামায়ার গর্ভরমা সাতগো দৌ সাকপা জিপুত জরম অছিল- (মতান্তরে দাওমণির বংশধর আতিয়াগুরু সিদাবার সাতগো অপসরার জিপুত বুলিয়া উল্লেখ আছে)। ঔতার নাং অইলতায় — ক্ষুমল, মৈরাং, আঙম, লোয়াং, নিংখৌজা, খাবা - নংবা বারো চিংলৈ। এরে সাতগো জিপুত বা রাজবংশর পরিচিতিরকা সাতগো গোত্রর পরিচয় দেছি। এহান ইতিহাসবিদ ভবেন্দ্র নার্জারী গিরকর মন্তব্যে আরাকৌ উল্লেখ করানি অছে থাংনাত। মৈতৈ মণিপুরী পাওনা পণ্ডিতর ভাষায় —

“উরুবশ্চ মণিভদ্র জামদগ্নিশ্চৈচ্যতে ।

দহিদশ্চ মুদগল্য চন্দ্রবংশোদ্ভবা মতাঃ” ॥

অর্থাৎ — উরুব, মণিভদ্র, জামদগ্নি, দহিদ ও মুদগল্য গোত্র চন্দ্রবংশীয়। বারো ক্ষুমল বংশর গোত্র মুদগল্য মদুগল্য অনার কারণে এতা যে বজ্রবাহনর মূল বংশ- এহানাত সন্দেহ নেই। বারো মৈরাঙ্গ, আঙম, লোয়াং, মাঙাং ভরদ্বাজ গোত্রীয় উচ্চশ্রেণী এতা ক্ষুমল বংশর অন্তর্গত বুলিয়া হাবি এতা ক্ষত্রিয় বংশ চন্দ্রবংশীয় মানু। (দ্রষ্টব্য - মণিপুরের প্রাচীন ইতিহাস, ১ ম খণ্ড, পৃঃ - ৬৩)

এমনকি ধরণী সংহিতারমা চন্দ্রবংশীয় ক্ষত্রিয়র নয়গোত্রর উল্লেখ আছে—

“শাণ্ডিল্য কাশ্যপাত্রেয়ঃ অঙ্গিরস মধুগল্যঃ ।

ভরদ্বাজ কৌশিকা চ গৌতম ব্যাস গোত্রয়ঃ ॥

নবখণ্ডৈবিভক্তানি নবধা ক্ষত্রিয়রুচ্যতে ।

নির্ণয়ং গোত্র সংখ্যায়াঃ পুরাণেষু বিনিশ্চিতং” ॥

অর্থাৎ — শাণ্ডিল্য, কাশ্যপ, আত্রেয়, অঙ্গিরস, মধুগল্য, ভরদ্বাজ, কৌশিক, গৌতম বারো ব্যাস — এরে নয়গো গোত্র ক্ষত্রিয় বংশোদ্ভব বিষ্ণুপ্রিয়া মণিপুরী জাতি বুলিয়া পরিচিত অছি— (দ্রষ্টব্য — মণিপুরের প্রাচীন ইতিহাস, মহেন্দ্র কুমার সিংহ, ১ম খণ্ড- পৃঃ ৬৩)।

আরাকৌ আচানকহান অইলতায় — অষ্টাদশ শতিকা হমবুকরমা সর্বানন্দ ঠাকুর গিরকরেলো শান্তদাস গোস্বামী রামনাম ধর্মপ্রচারে মণিপুরে আয়া হমানির পিছেদে মৈতৈরাজ গরীব নওয়াজ বা পামহৈবা (নাগা সর্দার) ইচ্ছা প্রকাশ করানির ফলে মৈতৈ মণিপুরী হাবিরে “নংত্রাং- ইরুপ্পা” বা নংত্রাং ঘাটহানরমা প্রায়শ্চিত্ত স্বরূপ হিনানির পিছেদে রামান্দী ধর্মে দীক্ষা গ্রহণ করুয়াছি। কিন্তু বিষ্ণুপ্রিয়া মণিপুরী হিনেয়া রাম নাম দীক্ষা লনারকা মাতলে ক্ষুমলরাজ মৈমু চোংখানবা রামান্দী ধর্ম গ্রহণে অস্বীকার করিয়া নিজে মন্তব্য করেছেহান— থাংনাত (এহানর প্রমাণ শ্রী জগদানন্দ বর্মন অনূদিত ক্ষুমল পুরাণ)

“রাজা কহে শান্তদেব করি নিবেদন ।

বিষ্ণু উপাসক আমি বিষ্ণু পরায়ণ ॥

তে কারণে নাহি চাহি রাম উপাসন ।

আর এক বার্তা কহি, পূর্বের কথন ॥

শান্তদেব মহাসিদ্ধ শুন মতিমান ।

মণিপুরে বিষ্ণুপুর আছে এক স্থান ॥

সেইখানে ভগবান গড়ুর বাহনে ।

উপস্থিত অদ্যাপিহ দেব নারায়ণে ॥

তথা করে বজ্রবাহন বিষ্ণুকে পূজন ।

অদ্যাপিহ চন্দ্রবংশ বিষ্ণুপ্রিয়াগণ ॥

তে কারণে রাম নামে নাহি লয় মন ।

তাহা শুনি শান্তদাসের নাস্কুরে বচন” ॥

(দ্রষ্টব্য - মণিপুরের প্রাচীন ইতিহাস- ১ম খণ্ড পৃঃ- ৫৬)

এরে মন্তব্যর পরিপ্রেক্ষিতে পরিষ্কার হারপেয়ার যে অষ্টাদশ শতিকা হমবুক পেয়া হস্তিনান্ত

আনেছি বিষ্ণুমূর্তির পূজার প্রচলন আছে। মৈতৈরাজ ভাগ্যচন্দ্র সিংহ কৌশলে ঐ বিষ্ণুবিগ্রহ গোপীনাথ জীউ মন্দিরে পিছেদে আনিয়া আহেছে বুলিয়া ইতিহাসে প্রমাণ দেৱ। ক্ষুমলরাজ মৈমু চোংখানবার মন্তব্যন্ত পরিষ্কার অৱ যে বিষ্ণুপ্রিয়া মণিপুরী জ্ঞাতি গোষ্ঠী বহু আগেত্ব পুৰি বিষ্ণুভক্ত বারো বিষ্ণু মূৰ্তি পূজা কৱতারা। তানু বৱাবৰ ব্ৰাহ্মণ্য ধৰ্মাবলম্বী।

এমনকি বিখ্যাত শান্ সেনাপতি সামলংফা ৭৭৭ খৃষ্টাব্দৰমা মণিপুরে আয়া মৈৱাজ ৰাজবংশৰ গোষ্ঠী বিষ্ণুপ্রিয়া মণিপুরী হিন্দুৱ দেবদেবীৰ পূজা কৱতারা বুলিয়া দেহেছে।

(দ্রষ্টব্য - সেনা সিংহৰ “মণিপুরৰ ইতিহাস”- পৃষ্ঠা ৯ বারো ঐতিহাসিক R.M. Nath গিৱকৰ “The Back ground of Assamese culture” পৃঃ ৮৪ লেৱিকৰমাউ এহানৱ-তথ্য পেয়াৱ।)

এসাদে কৱে বিষ্ণুপ্রিয়া মণিপুরীৰ ভিতৰে সপ্তগোত্ৰীয় এলাকাৰ সৃষ্টি অছে মণিপুরৰমা। এৱে সপ্ত গোত্ৰীয় এলাকাৰ বংশৰ বিষ্ণুপ্রিয়া মণিপুরী হাবিহানে বিশ্বাস কৱতারা যে তানুৱ পূৰ্বাপুৰুষ হাবি গোত্ৰ অনুসাৱে আজা (ৰাজাৰ পূৰ্বাপুৰুষ) আকেইগোৱ জিয়া - জিপুত। কিন্তু দুঃখৰ বিষয় ইংৰেজ লেখক গ্ৰিয়াৱসন সাহেব বা আৱাকৌ বিদেশী লেখক য়াম পাৱা গিৱিগিথানী বারো বাঙালী ইতিহাসবিদ ৰাজমোহন নাথ, উপেন্দ্ৰনাথ গুহ, এসাদে কৱে কতগো ছাড়া বাকী বাঙালী লেখকে বিষ্ণুপ্ৰিয়াৰে মূল ক্ষত্ৰিয় বুলিয়া স্বীকাৰ নাকৰতারা, একমাত্ৰ একচ্ছত্ৰ আধিপত্য বিস্তাৰ কৱতায় বুলিয়া, বৰং বিজেতা মৈতেয় জাতিৰে প্ৰাধান্য দেছি। কিন্তু ৰামান্দী ধৰ্মপ্ৰচাৰৰ সময় ঔবাকার বিষ্ণুপ্রিয়া মণিপুরী ব্ৰহ্মবাহনৰ বংশধৰ বারো প্ৰাচীন বিষ্ণুমূৰ্তি উপাসক পৰিচয় দিতে গিয়া বিজেতা মৈতেয় সম্প্ৰদায়ৰাং অনেক অত্যাচাৰ বারো উৎপীড়ন ভোগ কৱেছি প্ৰমাণ গৰীব নওয়াজৰ আমলে হাৱপেয়াৱ বারো অধিকাংশ বিষ্ণুপ্ৰিয়াৰ নথিপত্ৰ ধ্বংস অছে।

পৌৰাণিক বিশ্বাস মতে হাৱপেয়াৱতাই যে ব্ৰহ্মবাহনৰ বংশধৰ দাওমণিৰ পুতক আতিয়াগুৰু সিদাবা বিশ্বভুবনৰ একচ্ছত্ৰ অধিপতিগো অয়া তাৱ সাতগো জিপুত সৃষ্টি কৱেছিল সাতগো অপসৱাৰ গৰ্ভত ইন্দ্ৰ, বৰুণ, যম অগ্নি— এসাদে সাতগো দৌৱ ঔৱসেত্ত। ঔৱে সাতগো জিপুত মুনি- ঋষি হিসাবে পৰিচিতি লাভ কৱেছিল। ঔৱে সাতগো দৌৱ ঔৱসেত্ত নিকুলেছি সাতগো জিপুত নিজৰ নিজৰ বংশ পৰিচিতি হিসাবে সাতগো গোত্ৰৰ সৃষ্টি কৱেছিল। ঔতা সপ্ত গোত্ৰীয় বা সপ্ত শলাকা বুলিয়া বিভিন্ন ইতিহাসবিদ গ্ৰন্থাকাৱে লিখেছি। ঔৱে সপ্ত বংশৰ নাং অইলতায়— ক্ষুমল, মৈৱাং, অঙ্গম (আঙম), লোয়াং, নিংথৌজা, খাবা- নংবা, বারো চিংলেই। এৱে সপ্তবংশৰ আদি পুৰুষ এতা ৰাজা আকেইগ পালয়া লকতাক হৃদগোৱে কেন্দ্ৰ কৱিয়া চাৰিবাৱাদে সিলয়া খেই খেই সাতগো এলাকা বা অঞ্চল হিসাবে ৰাজত্ব কৱেছিল। ১১

এৱে সপ্তবংশৰ ৰাজা পালছিল। গিৱি এতা মুনিঋষি আকেইগোৱ নাঙলো গোত্ৰ হিসাবে চিহ্নিত কৱেছিল। য়াৱী এহান অসমীয়া ঠাৱে থাংনাত ভবেন্দ্ৰ নাৰ্জী গিৱকৰ লেংকৱা ‘বড়ো-কাছাড়ী সমাজ আৰু সংস্কৃতি’ লেৱিকৰ তথ্যমতে আৱাকৌ পৰিষ্কাৰ কৱে হাৱপেয়াৱ— থাংনাত—

“বিষ্ণুর বরাহ অবতারর দ্বারা পৃথিবীয়ে মাটির পরা আতিয়াগুরু চিধবাক জন্ম দিয়ে।
তেওর লগত সাতজনী অপসরাও জন্মিছিল। সেই অপসরা সকলক সাতজন দেবতাই বিয়া
করাইছিল। সেই সাতজন দেবতার ঔরসত, সাতোজনী অপসরার গর্ভত সাতোটা সন্তান
জন্মিছিল। মণিপুরী সকলে সেই সাত দেবতার সাত সন্তান অনুযায়ী সাত গোত্র হোরা বুলি
কয়। আজিও মণিপুরী সকলে সেই গোত্রত দীক্ষা লয়। যেনে—

- ১) আংগম বংশ — ভরদ্বাজ আরু কৌশিক গোত্র।
- ২) নিংথোজা বংশ — শাণ্ডিল্য গোত্র।
- ৩) লুবাং বংশ — কাশ্যপ গোত্র।
- ৪) ক্ষুমল (মতান্তরে ক্ষমূল) বংশ — মৌদগল্য বা মধুগল্য গোত্র।
- ৫) খাবা নংবা বংশ (খাবাঙলবা) — নৈমিষ্য বা ভরদ্বাজ গোত্র।
- ৬) মৈরাঙ্গ বংশ — আত্রেয় গোত্র।
- ৭) চিংলৈ বংশ বা সারেংথেম — ভরতগল্য গোত্র।”২
- ৮) খুরাইরাকফাম বংশ — ব্যাস গোত্র।
- ৯) তাখেনলাকফাম (মাঙাং) — কৌশিক গোত্র।

এতার লগে আরাকৌ তথ্যখানি পাশ্চাত্য ঐতিহাসিক Mc Cullock গিরকরাংতো
হারপেয়ারতাই যে "According to the credible tradition the valley was originally
occupied by several tribes, the principalities of which were Khumal, Luang,
Moirang and Meitei, all of whom came from different quarters, of which
Khumal was the most powerful and after them Moirang, but ultimately
the Meiteis subdued them all and formed them into a single people (clan)."৩
— অর্থাৎ বিশ্বাসযোগ্য তথ্যমতে — “কতহান উপজাতি মিলিয়া মণিপুর উপত্যকা, যেহানরমা
ক্ষুমল, মৈরাং, লোয়াং বার মৈতৈ চতুর্দিকেত্ত আয়া পুলছি, ঔতারমা ক্ষুমল বারো থাংনাত
মৈরাং শক্তিশালী জাতি, পিছেদে থাংনাত মৈতৈ উপজাতিয়ে হাবিরে দমন করিয়া একচ্ছত্র
আধিপত্য অকরলা”। এরে তথ্যমতে হারপেয়ারতাই — ক্ষুমল বার মৈরাঙ্গ মণিপুরর পুরানা
রাজবংশ।

আরাকৌ বংশর বিররণখানি ঐতিহাসিক ডঃ এম কীর্তি সিংহ গিরকে মাতেছে,
যেমন— "Amongst Kshatriyas, there is a community. There are more dark
skinned than the pure Meiteis"৪ — অর্থাৎ “মণিপুরর ক্ষত্রিয়জাতিরমা সম্প্রদায়
আহান আছে যেতা মৈতৈ সম্প্রদায়েত্ত সম্পূর্ণ তঙাল; তানু কৃষ্ণবর্ণ বা শ্যামবর্ণর মানু”। ঔরে
কৃষ্ণবর্ণ বা শ্যামবর্ণ ক্ষত্রিয় মানু উতায় পঞ্চ বিষ্ণুপ্রিয়া বংশর মানু; যেতা লকতাকর চারিবেদে
সিলছি; যেমন — ক্ষুমল, মৈরাং, অঙ্গম, লোয়াং বারো মাঙাং ইত্যাদি।

গজর ইকরা পঞ্চ-বিষ্ণুপ্রিয়া বংশৰ মানু হায়তা বুলিয়া গবেষণা কৰিয়া সঠিক তথ্য নিৰ্ধাৰণ কৰতেগা পাশ্চাত্য বিখ্যাত ঐতিহাসিক তথা ভাষা গবেষক Dr. G.A. Grierson সাহেব গিৰকে মাতেছে— "The state of Manipur is very polyot tract of country A tribe known as Mayang speaks a Mongrel form of Assamese known by the same name ... it will be seen that both in vocabulary and grammer, it is strongly infected with the peculiarities of the Tibeto-Burman language spoken in the Manipur state. This is just as much case with the speakers of Mayang who are settled in Manipur, although according to traditions, they originally came into Manipur from an Aryan speaking locality"৫ অৰ্থাৎ "...মণিপুৰ ৰাজ্য এহান বিভিন্ন ভাষাগোষ্ঠীৰ ৰাজ্যহান ময়াং বুলিয়া জাত আহান আছে, ঔতা অসমীয়া ঠাৱৰ লগে মিলেয়া কথা টটৰতাৱা, বাৰ ঔতা ভাষাভাষী মানু তিব্বত-বৰ্মী ভাষাৰ লগে খানি মিল। ঔসাদে ময়াং আৱাক ভাষাভাষী মানু তঙাল কৰে মণিপুৰে আছে ঔতা আদৌ আৰ্য ভাষাগোষ্ঠী এলাকাত পুৰি আয়া স্থায়িত্ব লাভ কৰেছি।" নিঃসন্দেহে এতা আৰ্য ভাষাগোষ্ঠী বিষ্ণুপ্রিয়া মণিপুৰী।

গজর ইকরা সমৰ্থনে এসাদে কৰে আৱাকৌ পাশ্চাত্য ঐতিহাসিক স্বনামধন্য E. W. Dun সাহেব গিৰকে মাতেছে— "Thus, the name of Manipur is only applicable, properly speaking, to the dwellers of the plains.... The Mayangs are descendants of Hindus, who migrated from the west. The chief of the Mayangs, called Kalaraja, or Mayang Ningthouja (Western chief) lives in the South of Bishenpur (Vishnupur); but the Mayangs are scattered over the valley. A great Aryan wave of pure blood passed through Manipur into Burma in Pre-historic days. The Hinduism of these remote times was probably free from caste Prejudices and very different to what is now, when the new Missionaries from Bengal arrived, they, for their own purposes, distorted the history of Manipur, the Burmese in vasion, put the finishing touch and killed off the old traditions".৬ অৰ্থাৎ "এসাদে কৰে "মণিপুৰ" নাং এহান একমাত্ৰ আৰ্য ভাষা গোষ্ঠী থলৰ মানুৰ বসতি অছি ফামহানৰ নাংহান....। ময়াং মানু এতা হিন্দুৰ বংশধৰ, যেতা পশ্চিমেদেস্ত আয়া হমাছি। ময়াং মানু এতাৰ মূল গুৰিগো অইলতায় কালারাজা বা ময়াং নিংথৌজা, যোগো বিষ্ণুপুৰ মাটিৰ দক্ষিণ বাৱাদে ৰাজা পালয়া আছে বাৰ হাবি চাৰিবেদে সিলছি। আৰ্যবংশধৰ মানু তেংকল আহান মণিপুৰ লালয়া বৰ্মাত গেছিগা। এৱে প্ৰাগঐতিহাসিক যুগৰ হিন্দুধৰ্মৰ মানু এতা বৰ্ণবৈষম্য বা কুসংস্কাৰেত্ব তঙাল বাৱো এবাকার মণিপুৰৰ তিব্বত-বৰ্মীৰ শাখাত তঙাল; বঙ্গদেশেস্ত নুৱা ধৰ্মপ্ৰচাৰক মানু এতায় মণিপুৰে

হমানির থাংনাং, আনুৰ স্বার্থে উদ্দেশ্যপ্রণোদিতভাবে পুরানা বিষ্ণুপুর বা মণিপুরর ইতিহাস মেইমুত করেছি বারো বর্মী আক্রমণর ফলে বাকী ইতিহাস বারো মণিপুরর পঞ্চবিষ্ণুপ্রিয়ার পুরানা নথিপত্র হাবি লমনির আসুলহান হিসাবে ধূলিস্যাৎ করেছি”।

আমার সপক্ষে খামনির যুক্তিহান হিসাবে তথ্য তুলিয়া প্রকাশ করেছোয় বিখ্যাত মৈত্রে ঐতিহাসিক L. Ibungohol সিংহ গিরকে মাতেছোয়— "It is now historically recognised and universally known that some groups of Aryans passed through Manipur to Burma and some of them reigned and settled in Manipur was of the Vedic age". ৭ অর্থাৎ এহান ঐতিহাসিক দৃষ্টিভঙ্গীত স্বীকৃত বারো চিরন্তন সেইত্যান যে আৰ্য মানু তেংকল বা দাপা আহান মণিপুর লালয়া বর্মারমা গেছিগা ঔপেইত কিন্তু ডাঙর দল বা দাপা আহান আৰ্য মানু মণিপুররমা লাম করেছি ঔতা বৈদিক যুগর মানু। তা থকয়া ঔরে বৈদিক আৰ্য মানু ঔতা নিঃসন্দেহে বিষ্ণুপ্রিয়া মণিপুরী গোষ্ঠী আহান, এহানাত শ্বেনেই যে বিষ্ণুপ্রিয়া মণিপুরী এতা মণিপুরর হো থাইনাকার মানু।

তা থকয়া আদিবাসিন্দা বিষ্ণুপ্রিয়া মণিপুরী মানুর গোষ্ঠী বিভক্তির বংশ পরিচয় হিসাবে প্রধান শাখা কতহান গোত্র কেন্দ্র করিয়া বংশর আজা বা পিপা অর্থাৎ কুলদেবতার সমকক্ষ পর্যায়ক্রমে থাংনাত সাতকরানি অইল—

ক্রঃনং	বংশ	গোত্র	রাজা	আজা বা পিপা	খুলাকপা বা পরিচালক
১)	খুমল বা ক্ষমূল (আরীবাম বা পুরানা)	মধুগল্য	কীর্তিধ্বজ	কৈফা	খাবা (খুলাকপা)
২)	খুমল বা ক্ষমূল লাইশ্রাম (আনৌবাম)	মধুগল্য	মৈমু চুখানবা	লংকা	তল্লবী বা তল্লি খুলাকপা
৩)	মৈরাঙ্গ	আত্রেয় বার অঙ্গীরস	হরি নিংথৌ	শামু	বুরা খুলাকপা
৪)	লোয়াং	কাশ্যপ	ওয়াংখুতল	গগর আজা	শাকাকপা
৫)	অঙ্গম	ভরদ্বাজ বার কৌশিক	কদরাকপা	চাওবা নংখথালবা	গোবিন্দ বরপাত্র
৬)	থকচম বা শারেংথেম	অঙ্গীরস	কুশধ্বজ	ফাচিয়া	আখাবা হানজাবা
৭)	খুয়াইরাকফাম	ব্যাস	ধনপতি যুবরাজ	আপেং	কৈরেং খুলাকপা বারো কৈফা খুলাকপা
৮)	তাখেন লাকফাম (মাঙাং বংশ)	কৌশিক	রাজকুমার ছত্রজিৎ	নঙ্গ	নন্দ

গজর ইকরা বংশর তালিকা, গোত্রর নাং বা আজার বিবরণ বাদেউ আরাক খানি খমকরা তথ্য মতে হারপেয়ারতাই— সারেংথেম বংশ, থকচম বংশ, খাবাঙালবা, খুয়াইরাকফাম বা তাখেন

লাকফাম বংশ এতার দাপা খানি মৈতৈ বংশর লগে হমানিয়ে, বাকী দাপা খানি ক্ষুমল বংশর লগে হমাছি। তেবউ পিছেকার মাঙাং বংশ বুলিয়া গজে উল্লেখ খানি অনার ফলে বিশেষ করিয়া থাংনাকার তাখেন লাকফাম বংশ, থকচম বারো সারেংথেম এতা দাপা খানি য়াম করানির সালে মাঙাং বংশরমা অন্তর্ভুক্ত করানি আছে। ঔতার লগে ধনপতি যুবরাজর নেতৃত্বে খুরাইরাকফাম বংশর মানু য়াম বুলিয়া ঔতার বংশর দাপা কিতা মিলেয়া শক্তি বৃদ্ধি অকা বুলিয়া মাঙাং বংশরমা অন্তর্ভুক্ত করানি আছে; যাতে পাচহান বংশর মানুরেলো বা সাকেই জ্ঞাতি হাবিরেলো, যেমন ক্ষুমল, মৈরাং, অঙ্গম, লোয়াং, মাঙাং হাবি পঞ্চ বিষ্ণুপ্রিয়া বুলিয়া নাং সিলছে। ৮

প্রসঙ্গতঃ উল্লেখ করানি অইল যে মাঙাং বংশর লগে আরাক ক্ষত্রিয় দাপা আহান গৌতম ঋষির দারা সেন্তাল বুলিয়া গৌতম গোত্র বুলিয়া আখ্যা দিয়া লকেই খানি সৃষ্টি আছে; ঔতার নাং চৌধুরীগো লকেই, গোত্র- গৌতম গোত্র। ঔ দাপার মানু উতা তানুর সর্দারগো হিসাবে প্রভাবশালী মানুগো “চৌধুরী” বুলিয়া উপাধি দেছি। ঔহানলো ঔরে দাপা উতা চৌধুরীগো লকেই বুলিয়া পরিচয় দিতারা। তবে আমার সমাজর অনেক বামুন এরে গোত্র এগর পরিচয় দিতারা।

যেতাউ অক্- মণিপুররমা রামান্দী ধর্মবিপ্লবর হাকতাকে অষ্টাদশশতাব্দীর খামতলেদে ক্ষুমল বংশর দুহান দাপা অইলা। দাপা আহান পুরানা ক্ষুমল বংশ বা (পুরানা রাজা লকেই) বারো আরাক দাপা আহান নুরা ক্ষুমল বংশ বা (নুরা রাজা লকেই) বুলিয়া হঙইল। পুরানা ক্ষুমল বংশ উহান অইলতায় আর্য রাজপুত্র কালারাজার ঔরসে পাচ নম্বর খুলা পুতক ভাগ্যচন্দ্র মহারাজার জেঠা পুতক কীর্তিধ্বজর বংশর মানু বা দাপা উতা পুরানা ক্ষুমল বংশ বুলিয়া পরিচিত অইলা বারো মণিপুররাজ চৌরজিতর হাকতাকে ক্ষুমল মৈমু চুখানবার পুষ্যপুত্র আনন্দরাম নুরা খুমল বংশে অভিষিক্ত অইল বুলিয়া তার দাপা উহানরে নুরা ক্ষুমল বংশ বা “আনৌবাম” বংশ বুলিয়া পরিচয় দেনা অইল। আরাকৌ তথ্যমতে হারপেয়ারতাই যে ক্ষুমল বংশর ব্যাসাবতার মণিপুর পণ্ডিত লাংকৈ লুঁখে ত্রিপুরান্ত ধনপতি যুবরাজর নেতৃত্বে আয়া মণিপুর্নে হমাছিহা খুরাইরাকফাম বংশর দাপা উতারে বিষ্ণুপ্রিয়া মণিপুরী সমাজে অন্তর্ভুক্ত করানি আছে বুলিয়া তানুরে “মেয়াং আচানবাম” উপাধি দেনা আছে। ৯

তথ্য সংগ্রহ মতে তঙাল, তঙাল বংশর গোত্র কেন্দ্র করিয়া বিভিন্ন রাজার লকেই (কুল-উপাধি) বা জ্ঞাতিত্ব (সাকেই) চিনকরে থাংনায় থাংনায় পর্যায়ক্রমে লেইতেরেঙ করানি অইল— লকেই বা জ্ঞাতির পরিচয় এতা তানুর কাম কাজর সিঁজিল বা দায়িত্ব হিসাবে চিহ্নিত করানি আছে; যেসাদে আহোম রাজত্বর সময় আহোমরাজায় তানুর প্রজা উতারে দায়িত্ব বারো কর্তব্য হিসাবে “পাইক” প্রথার প্রচলন করেছিল; বিশেষ করিয়া আহোম রাজা স্বর্গদেউ প্রতাপ সিংহ, স্বর্গদেউ রুদ্র সিংহর সময়ত; ঠিক ঔসাদে আমারতাউ মণিপুর্নে ক্ষুমল রাজবংশ বারো

মৈরাজ রাজবংশের সময়ত এরে জ্ঞাতি গোষ্ঠীর পরিচয় এতা ইশেঙ সেঙ করে হারপেয়ার। গতিকেই এসাদে করে রাজার অধীনে বংশ পরিচয় এতা সিজিল করানি আছে, থাংনায় থাংনায়।

ক) ক্ষুমল রাজবংশের লকেই বা জ্ঞাতি বা সাকেইর (গোত্র-মধুগল্য) অধীনে তালিকার নাং—(১) নঙাস্বা (ভক্তির পাত্র) (২) পিবা (৩) খাই-খুলাকপা (মৈতৈয় সর্দার, যেতা ক্ষুমল বংশে হমাছি) (৪) তলবা-খুলাকপা (৫) কৈফা আজা (৬) মাণ্ড রাজা (৭) মৈয়ুম (৮) ময়াং আচানবাম (নুরা রাজা লকেই) (৯) কিয়াংবা খুলাকপা (কিয়াংবা রাজার বংশাবলীর সর্দার) (১০) মাইবা খুলাকপা (কবিরাজ সর্দার বা মেইপা) (১১) তিলুমচা খুলাকপা (১২) খাবা-খুলাকপা (দক্ষিণের সর্দার) (১৩) মেল্লেইপীগো লকেই (লেইসিদারী সর্দার) (১৪) সাংগইবাম (১৫) মণিপুরগো লকেই (মণিপুরেত্ত আয়া ক্ষুমল রাজবংশে নুরা করে অন্তর্ভুক্ত) (১৬) খুয়াইরাকফাম (তাখেনেত্ত দাপা আকতা নুরা করে ক্ষুমল রাজবংশের অন্তর্ভুক্ত) (১৭) নিংথেমতল (রাজার সেবারী) (১৮) মালুপঙেই (১৯) আরেইখুলাকপা (পুরানা সর্দার) (২০) নংমৈ সাংবা (২১) লৈসীগ (পিতৃপুরুষের সেবারী) (২২) নাংচৌ (২৩) পাচিয়া (২৪) লাংকা (২৫) কৈনাম্পা (২৬) ঠলা (২৭) চাফা (২৮) লৈখমা (২৯) তাঙা (৩০) ঐরোকপা (৩১) মলপঙা (৩২) নিঙস্বা বা সেবারী।

খ) মৈরাজ বংশের লকেই বা জ্ঞাতির (আত্রেয় বারো অঙ্গীরস গোত্র) অধীনে এরে বংশের লকেই এতা হরিরাজার জ্ঞাতি। এরে লকেই বা জ্ঞাতি এতার নাং বা তালিকা—

(৩৩) শ্যামু আজা (আত্তির পাংকালর সাদনে শক্তিমান লকেই) (৩৪) বুড়া খুলাকপা (পুরানা সর্দার) (৩৫) সিনাইবা বা সিনিপা লকেই (৩৬) স্বাপালগ লকেই (গুরু রাহাল) (৩৭) হেইনঙ্গ লকেই (ক্ষত্রিয় সমাজের অন্তর্ভুক্ত) (৩৮) বুড়া লকেই (অসমীয়া বড়ুয়া গোষ্ঠীত্ত আয়া বিষ্ণুপ্রিয়া মণিপুরী সমাজরমা অন্তর্ভুক্ত) (৩৯) সেলুংবা (গুরু রাহাল) (৪০) লয়া লকেই (বিষ্ণুপ্রিয়া মণিপুরী সমাজরমা অন্তর্ভুক্ত) (৪১) লাইশাবা (দ্যৌর মূর্তি হংকরানির প্রতি আগ্রহী) (৪২) থাংজাবা (তরবারীলো যুদ্ধ করানির দাপা বা লকেই) (৪৩) কংলা (৪৪) যাকাল্লা লকেই (৪৫) তেলৈ (৪৬) কৈখু (কেহুগ) বা (বাঘ-শিকারী) (৪৭) বড়কৈখু (ডাঙর বাঘ - শিকারী) (৪৮) ওচাংবা (৪৯) কৈখু সাংবা (৫০) কইরেঙা (৫১) কংপা (৫২) নঙা (৫৩) খৈরু লকেই (খই-খউরা লকেই)

গ) লোয়াং বংশের লকেই বা জ্ঞাতির (গোত্র - কাশ্যপ গোত্র) অধীনে (কাশ্যপ মুনির আশ্রিত) (পাতালরাজ বলির বংশধর) —

গজর ইকরা লোয়াং বংশের লকেই বা জ্ঞাতি এতা লোকতাক হুদগর পার্শ্ববর্তী দ্বীপগো বা কাদা কাদির দ্বীপগো, যেগত্ব পুরি লোয়াং বংশের উৎপত্তি বুলিয়া তথ্য মতে পেয়ার। তা থকয়া এরে লোয়াং বংশের জ্ঞাতি বা লকেই এতা থাংনাত সাতকরানি আইল (৫৪) গগর আজা লকেই (৫৫) সাকাকপা বা সাকাপা লকেই (বংশ বা জ্ঞাতি পরিচালনার দাপাহান।

(৫৬) খানিস্ লকেই (কবিরাজী হজক হংকরানির দাপা অবশ্য জনশ্রুতি মতে) (৫৭) নঙা (৫৮) সেরা বা সরুৱা (৫৯) ঠাংসি (৬০) ডাকুলা (৬১) পাংসি (৬২) হিনাওবা (ফিটালো পদফামধারী মানু) (৬৩) নিংথৌ চালবা (রাজার জিপুতর তঙাল ফাম) (৬৪) লাখা বা লখা (৬৫) তাখেনগ (তাখেনেত্ত বা আগরতলাত্ত আয়া লোয়াং বংশরমা হমাছি উতা) (৬৬) কামথৌ ঘ) অঙ্গম্ বা আঙম্ বংশর লকেই বা জ্ঞাতির অধীনে (গোত্র - ভরদ্বাজ বারো কৌশিক গোত্র) (মরীচ মুনির শাখা ভরদ্বাজ বারো কৌশিক মুনির নাঙে) —

(৬৭) লাইচেনবাম আজা (৬৮) মাঙ্গৈ পিবা (৬৯) অওয়া (রাজার জিপুতর সমকক্ষ) (৭০) সাতারা লকেই (রাজার জিপুতর সঙ্গধারী) (৭১) তেলশ্বা - তেলচুপা (রাজার জিপুতর অনুকরণকারী) (৭২) হিংবা (কাছিপালপা জ্ঞাতি বা লকেই) (৭৩) থঙিলগ (রাজার জিপুতর লগে সংযোগস্থাপনকারী) (৭৪) বড়পাত্র (৭৫) সেঙান্বা (ভাগ্যচন্দ্র মহারাজার হঞ্জাবা উপাধিধারী মানু) বা সেনন্বা (৭৬) টেপারঙ্গী (৭৭) মিয়াঙ বা মিয়াঙপা (৭৮) খুৱা (৭৯) কৈরুংবা (অর্থ - ভাণ্ডারী) (৮০) মাঙ্গৈই বা মাঙ্কেইগ (৮১) ডাঙ্গা (৮২) থিংবা (৮৩) মেকুরা লকেই (অর্থ - ভাণ্ডারী, শিলচর মেহেরপুর, নরসিংপুর, প্রতাপগড়ে আছি) (৮৪) মেইচী > মেশীগো লকেই (অর্থ - ভাণ্ডারী - খালপারেত্ত চিনকরে অন্যান্য ফামে আছি) (৮৫) ক্ষমা > ক্ষেমা লকেই বা সম্ভ্রান্ত পরিবার বা লকেই (৮৬) তাঙা লকেই (তাঙা - মন্ত্রী, বড়পাত্র উপাধিধারী, রাজবংশীয় সমকক্ষ বা অনুকরণকারী — এরে লকেইর মানু - প্রতাপগড়র খালপার, হিঙ্গালার চামটিলা, কাছাড় বারো অন্যান্য ফামে এরে লকেইর মানু আছি। তানুর পরিধি নিয়াম।) (৮৭) টুপিগ লকেই বা মাটিলো জিনিষ হংকরানির কর্তব্য বা দায়িত্বর জ্ঞাতি (৮৮) উপারীগো লকেই (৮৭ নং সমান) (৮৯) ইরঙ্গ (৯০) বেদাগো লকেই (হস্তশিল্প পারদর্শী) (৯১) আচৌগ > আসৌগ (৯২) তপি (৯৩) ইরঙা (৯৪) হেড়ন্বা (হৈ ড়ন্ব জাতির বংশধর) (৯৫) লাংতৈ > লাংটেইগ লকেই (৯৬) লইল > লয়া লকেই (৯৭) মাংকেইগো লকেই অন্য গোষ্ঠীত্ব বিষুগপ্রিয়া মণিপুরী সমাজে অন্তর্ভুক্ত।

ঙ) মাঙাং বংশ (পঞ্চ বিষুগপ্রিয়ার উৎপত্তির বাঢ়ি য়ারী) — অষ্টাদশ শতিকার খামতলেদে রামান্দী ধর্ম বিপ্লবর হাকতাকে ক্ষুমল, মৈরঙ্গ বারো লুয়াং বংশ বিজেতা মৈতৈ মণিপুরীরাং পরাজিত অয়া প্রায় ধবংস অনার পথগো ইলইলা সময়ত বিষুগপ্রিয়া মণিপুরী ছত্রভঙ্গ অয়া সিতারানি অকরলা কাছাড়, ত্রিপুরা, সিলেট এসাদে ফামে ফামে। এসাদেকরে অরার ভাগনর ফলে ঔবাকার বঙ্গদেশেত্ব পুরি ধনপতি যুবরজের নেতৃত্বে ১১৬ হান পরিবার উতারে বিষুগপ্রিয়া মণিপুরী শক্তি বৃদ্ধিরকা বিষুগপ্রিয়া মণিপুরী ব্যাসবতার পণ্ডিত লাংকৈ লুকৈ এরে ধনপতি যুবরাজর ১১৬ হান পরিবার যেতা খুৱাইরাকফাম বংশ বুলিয়া পরিচিত ঔতারে মাঙাং বংশে অন্তর্ভুক্ত করে দিল। আসলে মাঙাং বংশে অনেক পরিবার মৈতৈরমা অন্তর্ভুক্ত অছিল। বারো অউ খুৱাইরাকফাম বংশর লগে তাখেনলাকফাম বা তাখেনেত্ত পুরি হমাছি ঔতার লগে থকচম

বংশ বারো সারেংথেম বংশর মানু য়াং বুলিয়া গজর ইকরা চারিহান বংশরে মাঙাং বংশ বুলিয়া পরিচয় দেনা অইল। ফলে এরে চারিহান বংশ মিলিয়া মাঙাং বংশর সৃষ্টি। আগেকার ক্ষুমল, মৈরাং, অঙ্গম, লোয়াং এরে চারিবংশর লগে মাঙাং, সারেংথেম বারো খাবাঙালবা বা তাখেন লাকফাম, মিলিয়া সপ্তশলাকা বিষুপ্রিয়া বা সাতসলাই বুলিয়া আছিল, ওতা এবাকা ক্ষুমল, মৈরাঙ্গ, অঙ্গম, লোয়াং বারো চারিহান বংশর দাপা (থকচম, সারেংথেম, খাবাঙালবা বা তাখেনলাকফাম বারো খুলাকপা লকেই বা খুরাইরাকফাম) মিলিয়া ডাঙর মাঙাং বংশ বুলিয়া পাচবংশর নাঙে পঞ্চ - বিষুপ্রিয়ার উৎপত্তি। যেতাউ অক - এরে মাঙাং বংশর সমন্বয়ে মিলেছি চারিশাখার বা পাচশাখার বংশর গোত্ররে কেন্দ্র করিয়া লকেই বা জ্ঞাতি শাখা - প্রশাখা থাংনায় থাংনায় সিঁজিল করানি অইল—

■ মাঙাং বংশর পয়লা শাখা (i) থকচম বংশ (গোত্র - অঙ্গীরস) জ্ঞাতি বা লকেইর অধীনে (৯৮) ফচিয়া আজা লকেই (পূর্বাপুরুষ) (৯৯) লেম্পা পিবা (১০০) মেকুরা লকেই (দাপা কতহান অঙ্গম বংশে অন্তর্গত) (১০১) খেরু (১০২) সেনঙা (১০৩) ইতং (১০৪) ফরুস্বা > ফউরুস্বা (ভাঙ্গারী) (দাপা কতহান মৈতৈ বারো অঙ্গম বংশে অন্তর্ভুক্ত) থকচম অর্থ থরক্দনা চাওরে মি হায়দুনা থকচম অর্থাৎ - টিলাগোন্ত নিকুলিয়া ডাঙর অছে রাজা বুলিয়া থকচম।

■ মাঙাং বংশর ২য় শাখা (ii) সারেংথেম বংশ (গোত্র - অঙ্গীরস) লকেই বা জ্ঞাতির অধীনে- - (১০৫) লরেন হানবা (১০৬) লৈসাংপা লকেই (দ্যৌর লৈসাং - লেইপত করানির হেইনিং লকেইহান) (বিঃ দ্রঃ— সারেংথেম বংশর দাপা মৈতৈ সমাজে প্রায় অন্তর্ভুক্ত। অতি কম দাপা বিষুপ্রিয়া মণিপুরী সমাজর মাঙাং বংশরমা হমাছি।)

■ খাবাঙালবা মাঙাং বংশর ৩য় শাখা - (iii) - গোত্র - অঙ্গীরস বারো নৈমিষ্য লকেই বা জ্ঞাতির অধীনে— (১০৭) হৌরক (১০৮) চৌবা (১০৯) খামটিয়া (১১০) কাবাতালবা লকেই।

■ তাখেনলাকফাম মাঙাং বংশর (iv) ৪র্থ শাখা (গোত্র - কৌশিক) লকেই বা জ্ঞাতির অধীনে- (১১১) নাক্সা বা নাঙা আজা, (১১২) লাইখৌপিবা (১১৩) ডাঙ্গা (১১৪) আটুলীগো (১১৫) ক্ষমা (১১৬) কুয়াকপা (১১৭) খুন্তংগো বা খুটংগো লকেই (১১৮) লাংলৈ (১১৯) কুকায় (১২০) চাফা (১২১) টেঙ্গা বা টাঙ্গা লকেই।

(বিঃ দ্রঃ— ক্ষুমল বংশর দেহাদেহি পামহৈবা গরীব নওয়াজ বংশধর নরজিৎ যুবরাজর পুতক রাজকুমার ছত্রজিৎ রাজারে অঙ্গম উপাধি দেনা অছিল, যেসাদে মণিপুরর চুড়াচাঁদ মহারাজা বনকর স্বামীরে অঙ্গম রাজ উপাধি বারো মামাকরে মৈরাঙ্গ রাজ উপাধি দেছিল। কিন্তু কালর প্রভাবে বা ইতিহাস বিবর্তনর ফলে তানুর বংশাবলী হাবি মাঙাং বংশরমা অন্তর্ভুক্ত অইলা) দ্রষ্টব্য - (মণিপুরের প্রাচীন ইতিহাস - ১ মখণ্ড প্রণেতা - মহেন্দ্রকুমার সিংহ)।

■ মাঙাং বংশৰ পঞ্চম (v) শাখা - খুৱাইৱাকফাম বংশ (গোত্র - ব্যাঘ্র) (ত্ৰিপুৰাতপুৰি ধনপতি যুৱৰাজৰ নেতৃত্বে বা কৈৱাং খুলাকপাৰ নেতৃত্বে আয়া মণিপুৰে হমাছিয়া দাপা ১১৬ পৰিবাৰ ক্ষুমল এলাকায় থানা সত্বেউ- মাঙাং বংশে অন্তৰ্ভুক্ত অয়া বৃহত্তৰ বিষ্ণুপ্ৰিয়া মণিপুৰী বংশ বৃদ্ধি আছিল; বিশেষ কৰিয়া ৰামাওতি ধৰ্মবিপ্লৱৰ সময়ত বা পিছেদে ব্যাসবতীৰ পণ্ডিত লাংকৈ লুই এৰে কৈৱেং খুলাকপা দাপা এতাৰে ক্ষত্ৰিয় বংশে অন্তৰ্ভুক্ত করেছে। তা থকয়া কৈৱেং খুলাকপা বা খুৱাইৱাকফাম বংশৰ ৬৪ হান লকেই বা জ্ঞাতি থাংনাত সিঞ্জিল কৰানি অইল। ১০ (দ্রষ্টব্য নৱসিংপুৰৰ সেনা সিংহৰ “মণিপুৰেৰ ইতিহাস”, পৃষ্ঠা : ১৩৬, কিন্তু বিভিন্ন গোত্র অনুযায়ী লকেইৰ নাঙ না ফঙকৰানিয়ে বিস্তাৰিত ভাবে দে'না নাইল) (১২২) কৈৱেং খুলাকপা (ব্যাঘ্রসৰ্দাৰ বা বাঘগোৱাৰ সাদনে কাছিচেলপা গোষ্ঠী) (১২৩) কৈফা খুলাকপা (১২৪) হিয়াংপা (১২৫) মেৰুপা (১২৬) তেকপা লোলকপা (১২৭) আপেংয়াজা (১২৮) পাৰুগ > পাৰউগ (১২৯) য়েনথকপা (১৩০) বলচিং খুলাকপা (শক্তিচেলপা লকেই) (১৩১) শঙা লকেই (১৩২) লেংথঙা (১৩৩) খুৱাইৱাকপা (মৈতৈ সৰ্দাৰ পৰিচালিত লকেই বা দাপা) (১৩৪) মৈচিগো > মেসিগো লকেই (১৩৫) ধনুকগো লকেই (শিকারী মানু) (১৩৬) মুমুগো লকেই (১৩৭) খেৰুগো (১৩৮) অঙেইগো (১৩৯) ভুইসিগো লকেই (জমিদাৰ সমকক্ষ পৰিবাৰ) (১৪০) বৰাগো লকেই (১৪১) অশোকগো > অসৌগ (১৪২) কনচেঙগো লকেই (১৪৩) থম্পা (১৪৪) নিংখৌচা (১৪৫) নুংকৈগো (১৪৬) থঙিলগো (১৪৭) বেৰাগো (১৪৮) বেদাগো (১৪৯) খনিলগো (১৫০) দুংখীগো (১৫১) দাসগো (১৫২) থমা (১৫৩) ডাকুলা লকেই (পূৰ্ব পিতৃপুৰুষ মৃদঙ্গ বাদক) (১৫৪) নঙা (১৫৫) পৰিগো (১৫৬) লেঙা (১৫৭) আৰিগো (১৫৮) কৌৱাকীগো (১৫৯) খানিংগো (১৬০) পয়াংগো (১৬১) মেৰুগো > মেৰুকগো লকেই (আতৰ কামে পাৰদৰ্শী লকেই) (১৬২) মিয়াং আসালপা লকেই (বঙ্গদেশেত্ত হমাছি মিশ্ৰ জাতি) (১৬৩) মেইপাগো লকেই (কবিতাজ সম্প্ৰদায়) (১৬৪) লুৱাগো লকেই (১৬৫) ছাড়াগো (১৬৬) পাহাৰাগো (১৬৭) বেবাগো লকেই (১৬৮) মাদইগো লকেই বা (অন্যফামেত্ত মণিপুৰে হমাছি মাদৈ বা ৱাণীৰ (সীজাৰ) জিপুত) (১৬৯) মালিনগো (১৭০) থাংখাকপা লকেই (দা হংকৰানিৰমা পাৰদৰ্শী লকেই) (১৭১) খৰগো লকেই (যুদ্ধ হেইচিংপা) (১৭২) চুচুগো লকেই (১৭৩) লেইমাগো লকেই (ৰাজৱানীৰ দাপা) (১৭৪) সৌৱাগো > সৰুয়া লকেই (গিৱস্তী কাম কৰানিৰ দাপা) (১৭৫) নাঙা লকেই (১৭৬) ময়াংগো লকেই (১৭৭) পালিংগো (১৭৮) কাকচোংগা (১৭৯) পাহাৰীগো লকেই (ৰাজাগিৱিৰ দ্বাৰ ৱক্ষক) (১৮০) পাহিৱাগো (১৮১) ডেনুংপা (১৮২) লিংখাতপা (১৮৩) চেৰুকা (১৮৪) তোকচাগো (১৮৫) থামিলগো লকেই (১৮৬) খাই - খুলাকপা লকেই (মৈতৈ - সৰ্দাৰ - এৰে উপাধিধাৰী মানু এতা মৈতৈং দাপাৰে দমন কৰানিকা ক্ষুমলৰাজবংশৰ ৰাজ্য নিযুক্তি দেছিল উপাধিৰ লকেই) আৱাক আহান অইলতায় গজৰ ইকৰা লকেই, অন্যবংশেউ দাপাখানি হমাছি। গজৰ ইকৰা

লকেই বা জ্ঞাতি গোষ্ঠী এতা বাদেউ থাংনাত সাতকরা আরাকখানি লকেই বা জ্ঞাতি গোষ্ঠীর নাং কতহান নিজর কর্তব্য - দায়িত্বলো দেনা অইল; যেতা হো থাইনাকার মণিপুরর আমার বেয়াপায় এলা দিয়া দিয়া লোকনৃত্যর মাধ্যমে মাত্তে (জনশ্রুতিমতে) তথ্য সংগ্রহ করানি আছে। ঔরে লকেই বা জ্ঞাতি গোষ্ঠীর নাং বংশ পরিচয়হিসাবে।— (১৮৭) অলকগো লকেই (খানি তলপা লকেই - এপেইত পাঠক - গিরিগিথানীরে য্যারৌ নাকরানিরকা অনুরোধ; কারণ এহান থাইনাকার ছানানিয়ারীলো) — এরে লকেইর মানু বর্মী আক্রমণর সময়ত মণিপুৰে আয়া হমেয়া বিষ্ণুপ্রিয়া মণিপুরী সমাজভুক্ত ব্যাঘ্র গোত্রর মানু। (১৮৮) লেংথংগো লকেই (কৈরেং খুলাকপা দাপার ব্যাঘ্র গোত্রর লেইসীধারী) (১৮৯) লেম্পা লকেই (লেম্পা রাজার জ্ঞাতি - গোষ্ঠী, যেতা মণিপুর রাজ মারজিত সিংহরে বারো গম্ভীর সিংহরে অনুসরণ করিয়া কাছাড়, হাইলাকান্দি বা ঝাপিরবনে আয়া হমাছি উতা বারো উতার লগে বর্মী আক্রমণর সময় দাপদিয়া বা পলেয়া আয়া হমাছি বিষ্ণুপ্রিয়া মণিপুরী সম্প্রদায়। এরে বিষ্ণুপ্রিয়া মণিপুরী সম্প্রদায়র মানু সংখ্যা নিয়াম দেহিয়া এতারকা বুলিয়া সামন্ত রাজা আগো লেপকরেছিল ঔবাকার মণিপুর রাজ গম্ভীর সিংহ গিরকে, আখ্যা বা উপাধি “লেম্পা” রাজা বুলিয়া দেছিল, তার গোত্রগো ভরদ্বাজ বারো কৌশিক বুলিয়া দাপা খানি আছিল; ঔতায় আজি লেম্পালকেই নাঙে পরিচিত (তথ্য সংগ্রহ মতে) (১৯০) লৌহামগো লকেই (মৈতৈ বংশত পুরি বিষ্ণুপ্রিয়া বংশে ব্যাঘ্র গোত্ররমা অন্তর্ভুক্ত। (১৯১) লেইশ্রাকপা লকেই (মৈতৈয় বংশত বিষ্ণুপ্রিয়া মণিপুরী বংশে অন্তর্ভুক্ত, গোত্র ব্যাঘ্র) (১৯২) লৌরাংপা লকেই (বি - মাটি - কিতা মাপ যোগ করানির দাপা সামন্ত প্রভুর অধীনে; গোত্র - ব্যাঘ্র)। (১৯৩) কৈশাংপা লকেই, ক্ষুমল রাজবংশর অন্তর্ভুক্ত, ধন - সাম্পাল রক্ষাকারী দাপা। (১৯৪) কেইরুন্সা লকেই (ক্ষুমল রাজবংশর ভাণ্ডারী) (১৯৫) পারনগো লকেই - (আতর কামে পারদর্শী - গোত্র - ব্যাঘ্র গোত্র) (১৯৬) মিয়াংপা লকেই (মিয়াঙদগী লাকপা - অর্থাৎ বঙ্গদেশেত্ত আয়া বিষ্ণুপ্রিয়া মণিপুরী সমাজে অন্তর্ভুক্ত মানু; গোত্র - ব্যাঘ্র গোত্র। (১৯৭) মিয়াং - আসালপা লকেই (ধন সাম্পাল তত্ত্বাবধায়ক মানু - রাজালকেইর সমগোত্রীয়) (১৯৮) আটিয়া লকেই (আগেকার মণিপুর মৈতৈ রাজার দাসত্ববৃত্তিকারী বা লেইসী করানির দাপা) (১৯৯) মেঙ্গেইপীগো লকেই ক্ষুমলরাজ বংশর লেইসীধারী - সমগোত্রীয়) (২০০) পাচালপা লকেই (ক্ষুমল রাজবংশর পরিচারক - পরিচারীকা) (২০১) খুটাংগলকেই (তাখেনেত্ত আয়া বিষ্ণুপ্রিয়া মণিপুরী সমাজে অন্তর্ভুক্ত ব্যবসায়ী বা ব্যাপারী পেশাধারী, গোত্র - কৌশিক) (২০২) চৌধুরীগো লকেই (তাখেনেত্ত আয়া মণিপুৰে রাষ্ট্রবিপ্লবর বা ধর্মবিপ্লবর সময়ত আয়া হমাছি বারো বিষ্ণুপ্রিয়া মণিপুরী সমাজে অন্তর্ভুক্ত - গোত্র - গৌতম গোত্র) (২০৩) বড়কলেইগো লকেই (অঙ্গম রাজবংশ দ্বারা বিষ্ণুগায়ত্রী মন্ত্রে দীক্ষিত শস্য ভাণ্ডার প্রহরী, গোত্র - ভরদ্বাজ বারো কৌশিক) (২০৪) মেইপাগো লকেই (মাইবা - মাইবীর বংশধর, গোত্র - মধুগল্য) (২০৫) শাকাপা লকেই (মাছ - কিতা হংকরানির

হেইনিংপা লকেই - গোত্র - কাশ্যপ) (২০৬) লাংটেইগো লকেই - (অঙ্গম বংশীয় গোত্র - ভরদ্বাজ- রাজবংশর ফুতি বুনানি বারো ফুতি রং কিতা করানির দায়িত্বপূর্ণ মানু) (২০৭) নুয়া রাজালকেই (মণিপুররাজ গম্ভীর সিংহর বংশধর বিষ্ণুপ্রিয়া মণিপুরী সমাজে অন্তর্ভুক্ত - গোত্র - মধুগল্য) (২০৮) বার পোয়া লকেই (মণিপুররাজ গম্ভীর সিংহর হাকতাকে কাছাড়ে আয়া হমাছি মণিপুরর ১২হান রাজপরিবার - গোত্র - মধুগল্য; বর্তমানে কাছাড়র বিক্রমপুর পরগণারমা আছি) (২০৯) লৈমাগো লকেই (রাজপাটরানী মাদৈর বংশধর তাখেনেস্ত আয়া মণিপুৰে বিষ্ণুপ্রিয়া মণিপুরী সমাজে অন্তর্ভুক্ত - গোত্র - কৌশিক) (২১০) পাংসিগো লকেই (দায়িত্ব - কর্তব্য - মানু মরলে মরার খাটি হংকরিয়া কাম করানির হেইনিংপা দাপা - লোয়াং বংশর অন্তর্ভুক্ত; গোত্র - কাশ্যপ) (২১১) পুরিতগো লকেই (বিষ্ণুপ্রিয়া মণিপুরী সমাজর উচ্চ বর্ণ ব্রাহ্মণ সম্প্রদায় - এতা পশ্চিমার আৰ্য ব্রাহ্মণ সম্প্রদায়, আহোম রাজার ব্রাহ্মণ সম্প্রদায় বারো নুয়া হিন্দুধর্মে দীক্ষিত বঙ্গদেশর ব্রাহ্মণ সম্প্রদায় বারো মৈতৈ সমাজভুক্ত ব্রাহ্মণ সম্প্রদায় - এতা হাবির সংমিশ্রিত সামাজিক রীতি নীতির শাসক শ্রেণী - গোত্র - শাণ্ডিল্য, গৌতম বারো মৈত্রম - ত্রি - গোত্রীয়, বিষ্ণুপ্রিয়া মণিপুরী সমাজে বর্তমানে সামাজিক পরিচালক শ্রেণী) (২১২) চিরুয়া লকেই (হো - থাইনাকার মণিপুররমা রাজার কর্মচারী - বিশেষ করিয়া গাছ - বিরাক চিড়ানি, গাছ - বিরাক ছেদানি বারো মিস্ত্রীর কাম করানির হেইনিংপা দাপা - বর্তমানে কাছাড়র ধরম, চেংকুরী, দুধপুর, কাটাখাল, ঝাপিরবন - এসাদে ফাম ফামে এরে লকেইর দাপা আছি - গোত্র - আত্রেয়, মতান্তরে কাশ্যপ) (২১৩) লেংথংগো লকেই > লেংথঙা লকেই (খুরাইরাকফাম বংশ, গোত্র - ব্যাঘ্র, এরে লকেইর দাপা এতার কাম কাজ - অইলতায় মৃতার দেহ খাটিরমা বয়া নেনা বারো সৎকার করানির হেইনিংপা দাপা)। (২১৪) ঠাংচাপা লকেই বা থাজাবা লকেই (হৌ থাইনাকার মণিপুর রাজার পদধৌতকারী মানু - লোয়াং রাজবংশর মানু গোত্র-কাশ্যপ) (২১৫) লেইরাংথেম লকেই - (এরে লকেইর দাপা অতি গুরুত্বপূর্ণ - কিয়াবুললেতে এরে লকেইর জ্ঞাতি গোষ্ঠী এতা - খান্মা থোইবীর বংশধর, গোত্র - মধুগল্য বারো আত্রেয় - অঙ্গীরস সংমিশ্রিত) (২১৬) লাঙাথেলগো লকেই (বর্তমান লাংটেইগো লকেই - অঙ্গম রাজবংশর দাপা মণিপুরর লাঙাথেল টেঙারাগোস্ত নিকুলিয়া আয়া হমাছি, গোত্র - ভরদ্বাজ) (২১৭) লালুপচিংবা লকেই (পাইক প্রথার সাদনে বিনা বেতনে রাজারে সাহায্য দেনা) (২১৮) দুহিগো লকেই (এতার দাপা ভিতরখুলে আছে। গোত্র - মধুগল্য) (২১৯) পাঞ্জিগো লকেই, মধুগল্য গোত্র (২২০) নোংমাইথেম (কাশ্যপ গোত্র) (২২১) খৈ খউরা লকেই

পঞ্চ বিষ্ণুপ্রিয়া রাজকর্মচারীবৃন্দর উপাধি— পঞ্চ বিষ্ণুপ্রিয়া যেমন - ক্ষুমল, মৈরাঙ্গ, অঙ্গম (আঙম), লোয়াং বারো মাঙাং (থকচম, সারেংথেম, খাবাঙালবা, তাখেনলাকফাম বারো খুরাইরাকফাম সংমিশ্রণে) লকেই বা জ্ঞাতি গোষ্ঠীরে কেন্দ্র করিয়া বংশর পিপা বা রাজারে কাম কাজর মাধ্যমে পাংলাক করেছি বুলিয়া ঔ কাম - কাজর বা দায়িত্বলো উপাধি থাংনাত সিঁজিল করানি অইল।

১) “কিয়াৎ” (অর্থ - পাত্র) - গগর আজা (বড়পাত্র), সঙা (বড়পাত্র বা ডাঙর বা মুখ্য মানু আগো)

যেমন :- গগর আজা (ডাঙর লকেইহান)

সঙা লকেই (লকেইরমা মুখ্য বা প্রধান লকেই)

২) “কেইরুংবা” (অর্থ - ভাণ্ডারী) - ভাণ্ডারীর ফাম উহান ঙালকরিয়া থইলে কেইরুংবা উপাধি দেনা অছিল, হো থাইনাকার ক্ষুমল রাজা, মৈরাঙ্গরাজার সময়।

৩) “তাঙা” (অর্থ - রাজার মন্ত্রী) - রাজার মন্ত্রীর উপাধি তাঙা বুলতারা। ঔহানলো তাঙা লকেই মান বা জ্ঞাতি গোষ্ঠীর পূর্বাপুরুষ এতা রাজার মন্ত্রী আছিল।

৪) “হাঞ্জাবা” (অর্থ - বংশর মুখ্য মানুগো বা নেতাগো)। যেমন (বিঃদ্র :- মহারাজা ভাগ্যচন্দ্রর আমলে হাঞ্জাবা উপাধি দেনা অছিল) সেরা হাঞ্জাবা (সেরা লকেই > সরুয়া লকেইর মুখ্য নেতা) “খানিং হাঞ্জাবা” (খানিং বা খানিংগ লকেইর মুখ্য নেতা) (৫) “লাকপা” (অর্থ - শাসন কর্তা) - যেমন - খুলাকপা লকেই (খুল্লাকপা) অর্থাৎ গাঙর মুক্তিয়ার বা পাটাদার, খুল + লাকপা বা শাসনকর্তা। খুল - গ্রাম বা গাং, লাকপা - শাসন বা আয়া শাসন করানি।

(৬) “ই বুঙ” - রাজবংশর গোষ্ঠী বড়পাত্র বা ছোটপাত্র অইলে “ইবুঙ” উপাধি দেনা অছিল ঔবাকা (অর্থাৎ মণিপুরর রাজবংশর শাসনে)। যেমন - “সেনা ইবুঙ” বুলিয়া রাজার জিপুত অইলে মাত্তারা। তানুরে বনারকা “ফিটা” দিতারা।

৭) “সীজা” - রাজকুমারীর জিপুত বা নিঙলপীরে “সীজা” উপাধি দেনা বারো বনারকা ফিটা আছিল।

৮) “হাজারী” - (অর্থ - পাটাদার) - “হাজারী” বনারকা আলাদা ফাম বা ফিটা দেনা অর। ভাগ্যচন্দ্রর আমলে শ্রাদ্ধ - কীর্তনে হাজারীর ফামহান বুলিয়া আছিল। তারে পাংলাক করানিরকা হজক - টিকি লাগেয়া ঠনালো সেবা করানি অছিল।

৯) “নাহারকপা” - অর্থ - লেইসাঙ - লেইপত করানির মানুরে নাহারকপা বুলতারা। বারো ছৌ-ছুমারারে থিয়াল করানি।

১০) “সাংলাকপা” - (অর্থ - গর কিতা পরিচালনা করানির দায়িত্ব দেনা)।

১১) “লালুপচিংবা” - অর্থ - বিনা বেতনে রাজার ঘর হংকরানি বারো পরিচালনা করানি; (আহোম রাজার “পাইক” প্রথার সাদনে)।

১২) “গিরি” - (অর্থ - সম্মানার্থক সম্বোধন) - বিষ্ণুপ্রিয়া মণিপুরী সমাজে বহক লকেইয়ে দেহরক লকেইরে “গিরি” উপাধি বুলিয়া সম্বোধন করতারা এহান মৈরাঙ, ক্ষুমল বারো থকচম, বংশে আগেদে প্রচলিত।

পঞ্চ বিষ্ণুপ্রিয়া গোষ্ঠীরমা আপকপা পূজার প্রচলন :— পঞ্চ বিষ্ণুপ্রিয়া মণিপুরী গোষ্ঠী ভিত্তিক কেন্দ্র করিয়া আমার সমাজর জাতীয় সংস্কৃতি তথা কৃষ্টিকলা বারো ঐতিহ্যর ডাঙর দিক আহান অইলতায় আপকপা পূজার প্রচলন। কিন্তু আপকপা পূজার প্রচলন সম্পর্কে বিস্তারিত তথ্য বিবরণ “প্রবন্ধ সংকলন” - প্রথম সংস্করন ১৬ ডিসেম্বর ২০০০ ইংরাজীরমা ফণ্ডছিল, তা থকয়া আপকপা পূজার প্রচলন সম্পর্কে বিস্তারিত বিবরণ দেনা নাইল, উহানরকা দুঃখিত। তেবউ পঞ্চ-বিষ্ণুপ্রিয়ার গোষ্ঠী বিভাগর উৎপত্তি বারো ভিত্তি বুলিয়া সিজিল করানির নিঙে চুম্বক বা চৌরাপ চৌরাপ খানি আহান থাংনাত উল্লেখ করানি অইল।

আপকপার ব্যুৎপত্তিগত অর্থ অইলতায় “আ” + “পোকপা” = ‘আ’ মানে আদি, ‘পোকপা’ মানে জরম অনা = তাইলে আদি যুগে যেগ জরম আছে, ঔগই আপকপালাই অর্থাৎ আদি পুরুষ বা কুল দেবতা বা বংশর আজাগো বা পিপাগো, এগই বংশর দ্যৌগ। কোন কোন পণ্ডিত গিরিগিথানীর মতে - আপকপা এগ পাহাংপার পুতক বারো মহাদেবর স্বরূপ বা প্রকাশ আহান। কোন কোন গুণীজনর মতে আপকপা এগো অগ্নিদেব (ব্রহ্মা) বার সূর্যদেব (বেলিরাজা) গিরকর স্বরূপ বা প্রকাশ আহান। য্যারীহান আকহান। কারণ মহাদেবর রুদ্রমূর্তি বা অন্যান্য স্বরূপর প্রকাশ নিংকরিয়া মণিপুর্বে ক্ষুমলরাজ আতিয়াগুরুর নিঙে আমার বপাবপিয়ে এরে আপকপা পূজার প্রচলন করেছিল। এরে পূজালো বংশপরিচয়র আদি পুরুষ বা কুলদেবতার পূজা বুলিয়া নিংকরতারা। ঔহানলো ক্ষুমলর আপকপার মূল গিরকরে “ক্ষুমল - পোকপা” বা থাঙালের, মৈরাঙর বংশ পিপারে মৈরাঙ পোকপা বা ঙারেং, লোয়াং পোকপা বা পুরৈরস্বা এসাদে পূজা করতারা। সাধারণতঃ খেইকরিয়া ঘর আগ হংকরিয়া বেলি মুঙ দিয়া আপকপা গিরকরে থইতারা। সাধারণতঃ পৌষ মাহার শুক্ল পক্ষরমা তিথি অনুযায়ী, ফাল্গুন মাহারমা তিথি খেল অনুযায়ী নাইলে বৈশাখ মাহারমা তিথি অনুযায়ী বংশর জ্ঞাতি গোষ্ঠী হাবি মিলিয়া আপকপা গিরকর পূজা উপকরণ সামগ্রী যেমন মাছ (বোয়াল, রউ, পরম) এতালো বারো ফল ফসল কিতালো পূজা করিয়া আনন্দ উপভোগ করতারা, কোন কোন ক্ষেত্রে নিরামিষলো হমা দিতারা। এহান পঞ্চবিষ্ণুপ্রিয়ার ডাঙর ঐতিহ্যর দিক আহান, যেহানলো বংশ পরিচয়র গুরুত্ব ফুটিয়া উঠের। আপকপা পূজালো বংশর উন্নতি বারো শ্রীবৃদ্ধি অর।

গজর সিজিল করিয়া ইকরা বিষ্ণুপ্রিয়া মণিপুরী লকেই বা গোষ্ঠী বিভাগর উৎপত্তি বারো তথ্যালো ভিত্তি করিয়া এহান মাতে পারিয়ার যে বিষ্ণুপ্রিয়া মণিপুরী জ্ঞাতি গোষ্ঠীভুক্ত ক্ষুমল (মতান্তরে ক্ষমূল বা ক্ষত্রিয়র মূল বংশ), অঙ্গম, মৈরাঙ, লোয়াং বারো মাঙাং রাজবংশ গোত্র কেন্দ্রিক পঞ্চ বিষ্ণুপ্রিয়া নাঙর রাজবংশ হো থাইনাকার মণিপুর্নর আদি পুরুষ বা ক্ষত্রিয় চন্দ্রবংশীয় মানু। কালর প্রভাবে বিভিন্ন বংশর মানু সামিল অছি। তা’ থকয়া এরে পঞ্চ বিষ্ণুপ্রিয়া রাজবংশর মানু এতাই মণিপুর্নর প্রথম শাসকজাতি। এহানর সমর্থনে বিখ্যাত ঐতিহাসিক রাজমোহন নাথ তার লেংকরা লেরিকর ৮০ পৃ : মাতেছে— " The Manipuris are

divided into two main tribes - the Kha - la - chais, who call themselves the Bishnupurias, are supposed to have been the first ruling race; and the Meitheis or Meithis, who call themselves real Manipuris are supposed to have been the next immigrants." অর্থাৎ বিষ্ণুপ্ৰিয়াই মণিপুরৰ প্ৰথম সুসভ্য শাসক জাতি বাৰো মৈতৈ জাতি পৰবৰ্তী শাসক জাতি।

"Khala- chais evidently means the children (cha - chai) of the wide lake (kha - la) Logtak and probably refers to the race of the people in the plain portion of the Manipur valley". (অৰ্থাৎ চীনশব্দ খালাছাই মানে বৃহৎ হৃদয় ছৌ - বা মানু (লকতাক হৃদয় মানু) বিশেষ কৰিয়া হৃদয় তীৰবৰ্তী সমতল অঞ্চলৰ অধিবাসী) তৰে এহান কাল্পনিক বুলিয়া মনে অৱ। যেতাউ অক এহানাত কোন কিতি কুৰুম নাই যে আৰ্য ক্ষত্ৰিয় বংশোদ্ভব পঞ্চবিষ্ণুপ্ৰিয়াই মণিপুরৰ প্ৰাচীন তথা সুসভ্য শাসকীয় ৰাজবংশ। এৰে সপ্তশলাকাৰ ৰাজবংশীয় দাপা (যেমন- ক্ষুমল (মতান্তৰে ক্ষমূল), মৈৱাজ, অঙ্গম, লোয়াং, মাঙাং, সাৰেংথেম বা চিংলৈ, নিংথৌজা ৰাজবংশ) থাংনাত সাৰেংথেম, থকচম, খাবাঙালবা, চিংলৈ, বাৰো খুৱাইৱাকফাম বা তাঙেনলাকফাম এতা সংমিশ্ৰণে - মাঙাং বংশৰমা অন্তৰ্ভুক্ত বাৰো নিংথৌজা বংশ ক্ষুমল বংশৰমা অন্তৰ্ভুক্ত অয়া নয় গোত্র কেন্দ্ৰিক (যেমন - মধুগল্য, ভৱদ্বাজ, কৌশিক কাশ্যপ, আত্ৰেয়, গৌতম অঙ্গীৰস, ব্যাস বাৰো শাণ্ডিল্য বা নৈমিষ্য) বিষ্ণুপ্ৰিয়া মণিপুৰী জাতি - গোষ্ঠী বা লকেই (সাকেই) হিসাবে পৰিচয় দিয়া আইতাৱ। পৰবৰ্তীকালে অৰ্থাৎ মতান্তৰে থকচম, সাৰেংথেম, চিংলৈ খাবাঙালবা, তাখন লাকফাম বাৰো খুৱাইৱাকফাম এতা হাবি গোষ্ঠী মিলিয়া মাঙাং ৰাজবংশৰমা শক্তিবৃদ্ধিকা অন্তৰ্ভুক্ত আছি। ঔহানলো থাংনাত - ক্ষুমল, মৈৱাজ, অঙ্গম (আঙম), লোয়াং বাৰো মাঙাং ৰাজবংশৰ গোষ্ঠী হাবি মিলিয়া ব্ৰাহ্মণ ক্ষত্ৰিয় সহ পঞ্চ বিষ্ণুপ্ৰিয়া নাঙে পৰিণত আছি বুলিয়া তথ্যমতে হাৱপেয়াৱ। এৰে পঞ্চ বিষ্ণুপ্ৰিয়া ৰাজবংশৰ জাতি - গোষ্ঠী গৃহ বিবাদে লিপ্ত আছিলাতা প্ৰায় চতুৰ্থ শতাব্দীত। এহান বিখ্যাত ঐতিহাসিক R.M. Nath গিৰকে মাতেছে, "Internal dissensions broke out in 400 A.D while the Khumal, Moirang and Luang declared freedom." (লেৱিকহান- Background of Assamese culture -৮৪ পৃঃ) কিন্তু দুঃখৰ য়াৱীহান অইলতায় যে এৰে পঞ্চ বিষ্ণুপ্ৰিয়াৰ জাতি - গোষ্ঠী - লকেই দাপা এতা মণিপুর ইমালাম বেলেয়া চৌৱাপ চৌৱাপ আনা অকৰলাতা প্ৰায়- পঞ্চদশ - ষোড়শ শতাব্দীৰ খামতলেদে মৈতৈৰ লগে গৃহ বিবাদৰ ফলে। সপ্তদশ - অষ্টাদশ শতাব্দীৰ হমবুকুত পামহৈবা - (নাগা - সৰ্দাৰ) গৰীব নওয়াজৰ হাকতাকে বিষ্ণুপ্ৰিয়া মণিপুৰীৰে মেইমুত কৰানিৰ চক্ৰান্তলো ৰামান্দী ধৰ্মে দীক্ষা গ্ৰহন নাকৰেছি বুলিয়া ষড়যন্ত্ৰে লিপ্ত অয়া খেদানিৰ হত্না কৰল; বাৰো ঔ আশা পূৰণৰ খৌৱাঙ - টাটিহান কক্করানি অইলতায় পয়লা বৰ্মী আক্ৰমণ (১৮১৭ সাল)।

এসাদে করে দূর - দূরবালি অয়া মণিপুরর প্রাচীন বারো পয়লা সুসভ্য ক্ষত্রিয় শাসক জাতি পঞ্চ - বিষ্ণুপ্রিয়া বিজেতা শাসকর অত্যাচারে অরার ভাগন অয়া মণিপুরর ইমালাম বেলেয়া কাছাড়, ত্রিপুরা, বাংলাদেশ, আসাম এসাদে ফামে ফামে আয়া সিলইলা। আনা নুরারিয়া থাইলা বিষ্ণুপ্রিয়া মণিপুরী জাতি - গোষ্ঠী দাপা উতা খানি মণিপুররমা বাধ্য অয়া মৈতৈ মণিপুরীর লগে তিলইলা বারো আরাক খানি বিষ্ণুপ্রিয়া মণিপুরী দাপা বর্মার উগদে লালয়া বেজাতি অয়া থাইলা।

এসাদে অবস্থার পরিপ্রেক্ষিতে নয় গোত্র- কেন্দ্রীক ক্ষুমল, মৈরাঙ, আঙম, লোয়াং বারো মাঙাং রাজবংশর জাতি - গোষ্ঠী - লকেই- সাকেই ইত্যাদি দাপা এতায় বেরদিয়া থছে পঞ্চ - বিষ্ণুপ্রিয়া মণিপুরী মানু মণিপুর ইমালাম বা নিজর রাজ্য এরে দিয়া ফামে ফামে সিলইলা এহানাত্ব জিঙে আর দুঃখ বা অন্তর্জ্বালা আর কুমপেইতউ নেই। আমার অস্তিত্ব এবাকা টিকিয়া থাইতয়তা আমার জাতি গোষ্ঠীর ভিতরে কৌলি কিতা না লাগিয়া, মিচাং মান্না অয়া, এক অয়া থাইলে। বিষ্ণুপ্রিয়া মণিপুরী সমাজর ভিতরে বিভিন্ন লকেই বা জাতি - গোষ্ঠী আকতারে আকতায় তলপা লকেই, বা মাদই গাং - রাজার গাঙর মানু বুলিয়া ঠিচালাই নাকরানি, উরাহিচি না করানি, পঞ্চ বিষ্ণুপ্রিয়া জাতি - গোষ্ঠী লকেইর মানুর নিঙে বানা নুংশির ভিতরেদে সামাজিক রীতি-নীতিলো ঐক্যবদ্ধ সুরে সুর মিলেইলে জাত - লকেইর অস্তিত্ব পালইতয়। আমারতা দায়িত্ব - কর্তব্য বারো সামাজিক দায়বদ্ধতা নিয়ামপারা, আমারতা সরকাররাংতো পুরাপুরি দাবী আদায় করে নুরারেছি, ওতা বিভিন্ন সংগঠনর কর্মকর্তা হাবি এক অয়া মিচাং মান্না অয়া উদ্দেশ্য পূরণরকা দাবী আদায় করানি থক্। অন্যথায় সমাজর পুরাপুরি উন্নতি খানি চিলসে। আমারতা পাহুরানি থক্ নেই যে আমি আমার হুনার মণিপুর ইমালাম বেলেয়া আহেছি উহান। মণিপুর আমার মাটি। আমার বপাবপির লাম মণিপুর, ক্ষুমল, মৈরাঙ আঙ্গম রাজার বংশধরর জাতি গোষ্ঠী। মণিপুর লাম বেলেয়া আয়া কাছাড়, সিলেট, তাখেন, ভানুগাছ (ভানুঘাট), ঝাপিরবন, হিংগালা, প্রতাপগড়ে হমাছিহা বেয়াপা ইমাইন্দলরে চিনকরিয়া গোকুলানন্দ গীতিস্বামী গিরকর এলা- “বর দেই, বর দেই গিরিগিথানী। আজিত্ব পুরি ইমার সন্মান রক্ষা করানি” বারো খুপা ইসৈর এলা - “আহ রে হমাজি গাছি! চেয়া আহিক্গা মণিপুরর হভাহান” বারো বরণ ডাহানির এলা- “বরণ দে দ্যৌরাজা” এলা এহানে প্রমাণ করেতায় - এবেদে আয়া নিংশিং অইতারা আমার বেয়াপায় ওরে মণিপুর মাটি। কবির ভাষায় - “দেহুরি রঙখা রঙখা, ইবেলর মুকসী য়ারী বিষ্ণুপুর লাম, বিষ্ণুপুর আমার মাটি”। স্বনামধন্য শিক্ষাবিদ তথা সমাজসেবী জগৎ মোহন গিরকর লেংকরা বাণী - “জনমে জনমে মোরে, দিয়া পেঠেইছ হুনার মণিপুৰে” পাহুরানি থক্ নেই। স্বনামধন্য কবি সাহিত্যিক মদন এইগার কবিতার পারেঙ আহান বারো বিখ্যাত সমাজসেবী তথা অবসর প্রাপ্ত অধ্যক্ষ নরসিংপুরর গোলাপবাবু অব্কার নিংশিং এলা— “পূণ্য তীর্থ মণিপুর মাটি, মণিময়ী মোর ইমা, স্বর্গন্তউ জিঙে গরীয়সী ইমা, ল’ দেনে আজি মোর হমা” পাহুরানি থক্ নেই।

এতা বাণী নিংশিং অনাৰ কাৰণ অইলতায় - আমি বামুন ক্ষেত্ৰী, বিভিন্ন জ্ঞাতি গোষ্ঠীৰ মানু মিচাং মান্না অয়া, উচ্চ নীচ ভেদাভেদ পাহুৰিয়া, এক অয়া, সমাজৰ স্বার্থ রক্ষার্থে কাম কৰিয়া কাকেই কাৰানি থক, ঔহান অইলে সমাজৰ উন্নতি অইতয়। ওঁ শান্তি ওঁ শান্তি ওঁ শান্তি।

তথ্য পুলকৰানিৰ মাতুঙে—

- (১) *The Background of Assamese culture*, Page - 84 - R. M. Nath. (1st edition - 1948)
- (২) বড়ো - কাছাড়ী সমাজ আৰু সংস্কৃতি- পৃঃ ১৭ By = ভবেন্দ্ৰ - নাজী (নাজাৰী)
- (৩) *Assam District gazettee*, part IX chapter - II, Page 13 = by V.C Ellen.
- (৪) *Religions Development in Manipur in 18 th and 19 th century* - Page 20 By Dr . M. Kirti Singha.
- (৫) *Linguistic Survey of India*, Vol V Part III. By- George Grierson.
- (৬) *Gazettier of Manipur* - E. W. DUN
- (৭) *An introduction to Manipuri* - Page - 14 By - L. Ibugohol Singha
- (৮) *Gazettir of Manipur* - E.W. DUN.
- (৯) *Maniprar Prachin Itihas* Page 106. By - M.K. Sinha.
- (১০) *Manipurar Itihas* - page 136. By - Sena Sinha, Norsingpur □

ধর্ম বারো সমাজ

ধর্ম বারো সমাজ সম্পর্কে আলোচনা করানি ল্বু করে খালকরলে বাক্বা কঠিন য়ারীহান। বিশেষ করিয়া আজিকার হিস্জালার তিনঘড়ি শ্রীমণ্ডপে (মার্চ ২০১২ ইং) শ্রী শ্রী রাধামাধবজীউ প্রভুর বছরকী অনুষ্ঠানে উদ্যোক্তা গিরিগিথানীর বার্তন ঙ্করতেগা ধর্ম বারো সমাজ সম্পর্কে আলোচনার মাতেক আহান ফংকরতেগা নিয়ামপারা ভুলত্রুটি থাইতে পারে, ঔতা নিজগুণে, শুদ্ধমনে হুনে দেনারকা বৈষব ভক্তবৃন্দরাং সাজারাং ভক্তি কাতকরুরি।

ধর্ম শব্দ এগর ব্যাকরণগত অর্থ ধ্ + মন প্রত্যয় করিয়া হঙছেগো। ধর্ম মানে মনহানাত যে কোন লক্ষ্যবস্তু আহান সংযমর মাধ্যমে ধরিয়া থনা পারানি। কাজেই ধর্ম বুলতে পুরাণ-ভাগবত ইত্যাদির মতে হাবি থাকর মানু বা তঙাল তঙাল জাতর হাবির গজে লেপয়া আছে। বারো ধর্মীয় রীতি-নীতি এতা থাংনায় থাংনায় বিভিন্ন সংস্কারর ভিতরেদে পরমেশ্বর ভগবানর নির্দেশলো বিভিন্ন সাধু-সন্ত-মহামানব ভক্তবৃন্দর প্ররোচনায় হঙছে বুলিয়া বেদশাস্ত্রে পেয়ার। ঔ ধর্মীয় রীতিনীতি ঔতা পালন করে পারলে ঔ ভক্ত গুণীজন উগরে ধার্মিকগো বুলিয়া মাত্তারা-অর্থাৎ “ধর্মঃ রক্ষতি ধার্মিকং”।

এসাদে করে ধর্মর মূল তাৎপর্যহান অইলতায়, ন্যায়-নীতি পরায়ণ অনা। বারো ধর্ম বুলতে সাধারণ জ্ঞানলো আমি হারপেয়ারতাই পরম পবিত্রতা, আধ্যাত্মিক চেতনা বারো হাবি থাকর মানুর লগে পরমপরাগতভাবে প্রেম- ভালবাসার মাধ্যমে একান্ত মিলনর চেষ্টা বারো কৃষ্টি কলা সংস্কৃতি এতা হাবির সদব্যবহার হিসাবে মর্যাদা দেনা; যেহানরে সনাতন ধর্ম বুলিয়া মাতে পারিয়ার।

সমগ্র বিশ্বর ধর্মীয় মহাপুরুষ এতা হাবিহানে ভগবান শ্রীকৃষ্ণর গুণগান বা নামকীর্তনর ব্যাখ্যা করেছি। উদাহরণ হিসাবে মহাপুরুষ কতগোর নাং উল্লেখ করে পারিয়ার যেমন— দক্ষিণ ভারতর শংকরাচার্য, ভক্তি সিদ্ধান্ত সরস্বতী ঠাকুর, যীশু খৃষ্ট, হজরত মোহাম্মদ, মহাপ্রভু শ্রীচৈতন্যদেব, শ্রী শ্রী রাধারানীর কৃপাপ্রাপ্ত- শ্রীল ভুবনেশ্বর সাধুঠাকুর বারো জয়দেব গোস্বামীর স্বপ্নাদিষ্ট শ্রীমৎ পুণ্ডরীকাক্ষ এইগা গিরক। মহাপুরুষ এতায় প্রবল ভক্তি ভাবলো গোবিন্দ প্রভুর সেবাপূজা করেছিতা একমাত্র নামকীর্তনর মাধ্যমে।

কলির জীব উদ্ধাররকা যে ভক্তির আদর্শ প্রচার করানি আছে, ঔহান ব্রহ্মবৈবর্ত পুরাণরমাউ উল্লেখ আছে। ঔ পুরাণ বারো শাস্ত্রসম্মত ভাবেউ মানুর মুক্তির পথ তিনগো অইলতায়— জ্ঞান, কর্ম বারো ভক্তি। একমাত্র কর্মর ভিতরেদে আধ্যাত্মিক চিন্তা চর্চালো ভগবদসেবা পানার পথগো ডাঙর বারো ভক্তিলো মুক্তির পথগো পানার ইঙ্গিত পেয়ার অর্থাৎ— “শ্রবণম, কীর্তনম, স্মরণম্”— এরে ভাবলো ঈশ্বর দর্শন পানার পথগো বুলিয়া শাস্ত্রে মাতের।

গীতারমাউ ভগবান শ্রীকৃষ্ণ অর্জুনরে সাধনমার্গর পথগো হিসাবে মাতেছে— “সর্ব ধর্মান পরিত্যজ্য মামেকং শরণ ব্রজ”। অর্থাৎ- ভগবান শ্রীকৃষ্ণ মাতে— “হে অর্জুন। হাবি ধর্ম বেলেয়া মোরে নিঙকর। এহানেই ভক্তিতত্ত্বর মূল- কথাহান। যেহানর ভিতরেদে কৃষ্ণলীলা, রাধাপ্রেমর বিরহ লীলা ইত্যাদি সুপয়া আছে। জ্ঞান মার্গর সাধনা যেসাদে নিয়ামপারা হিন, ঔসাদে কর্ম সাধনাউ হিন— অর্থাৎ নিষ্কাম কর্মযোগ প্রবল। ঔহানর ভিতরেদে ভক্তিভাব ফুটিয়া উঠের। কিন্তু ঔ ভক্তিভাব একমাত্র- শুদ্ধচিত্তে ভগবান শ্রী কৃষ্ণর প্রতি আকৃষ্ট ভক্তই পানা পারতারা। কিন্তু ঔ ভক্তর ভিতরেউ ভগবান শ্রীকৃষ্ণ কঠিন পরীক্ষা করেবতা সঠিক ভক্তির পথগো ইলনিরকা এহানাত সংসারর মোহ- মায়া - মমতা, ভোগ লালসাবৃত্তি কোনতায় আটকা নুরারের। এহান ষড়রিপুর হাবির গজে। এহানর সঠিক প্রমাণ আহান উল্লেখ করে- পারিয়ার। যেমন- কৌরব রাজসভারমা রজস্বলা ইমা দ্রোপদীরে ফুতিহানর চুটিগত ধরিয়া দুঃশাসনে আছুলিয়া খুলের সময়উহানাত দ্রোপদী ইমায় চিকারী দিয়া কাদে কাদে ভগবান শ্রীকৃষ্ণরে বিপদ এহানাতপরি রক্ষা করানিরকা বুলিয়া ডাহিরী। আত আহানলো লাজহান দুরেই করানিরকা ফুতির চুটিগো ধরিরী বারো আত-আহানলো ভগবান শ্রীকৃষ্ণরে ডাহিরী। যেবাকা একেবারে বিবস্ত্র অইলী সময় উহানাত নিরুপায় অয়া দিয়ো আতলো কারোমনোবাক্যে ভক্তি ভাবলো ভগবান শ্রীকৃষ্ণরে ডাহিরী। ঔরে মুহূর্ত উহানাত পঞ্চ-পাণ্ডবর হাবি মায়া, ভোগ বিলাস জলাঞ্জলি দিয়া একান্ত ভক্তি-ভাবলো করজোড়ে ডাহানিয়ে ভক্তর বাঞ্ছাধীন ভগবান শ্রীকৃষ্ণ ইমা দ্রোপদীর ভোগ দশা আকইল বুলিয়া অর্থাৎ ভক্তির কঠিন পরীক্ষা লালইলী বুলিয়া কৃপা-করিয়া ইমা দ্রোপদীরে ফুতি যোগানি অকরল। এসাদে করে ভগবান শ্রীকৃষ্ণ ইমা দ্রোপদীরে বিপদেত্ত রক্ষা করল। এহানাত “ধর্মঃ রক্ষতি ধার্মিকং” কথা এহান প্রযোজ্য। একমাত্র ভগবান শ্রীকৃষ্ণর কৃপা থাইলে ভক্তর আশা পূরণ অর। এহানেই একান্ত ভক্তিতত্ত্বর মূল কথাহান। এসাদে করে ভক্তির ভিতরেদে ভগবান শ্রীকৃষ্ণর কৃপালো সাক্ষাৎ দর্শন পানা, যেহান মুক্তির একমাত্র পথগো বা ধর্মতত্ত্বর সারবস্তুহান বুলিয়া নিঙকরে পরিয়ার।

যেহেতু আলোচনার বিষয় বস্তুহান ধর্ম বারো সমাজ; তা থকয়া এফির সমাজ সম্পর্কে খানি আহান আলোচনা করানি থক। সমাজ বুলতে সাধারণতঃ হারপেয়ারতাই মানু কতগবেলো গাং, লেইকী, পরগণা বা লয়া কতগয় মিলিয়া বিভিন্ন জাতর বা সম্প্রদায়র মানুয়ে তিলয়া ধর্মীয় রীতি নীতি কৃষ্টি সংস্কৃতি আচার আচরণলো সমাজ হংকরানি অর। সমগ্র বিশ্বরমা বিভিন্ন সময়ত বিভিন্ন সভ্যতার উৎপত্তির ভিতরেদে সমাজ গঠন প্রক্রিয়া চলেছে; যেমন- মিশরীয় সভ্যতা, ব্যবলনীয় সভ্যতা, সিন্ধু সভ্যতা, বৈদিক সভ্যতা। এসাদে করে ইতিহাসর বিভিন্ন দৃষ্টিভঙ্গীলো হারপেয়ারতাই— মানব সভ্যতার ক্রম বিবর্তনর লগে লগে বিভিন্ন ধর্মর প্রভাব আয়া হমাছে। এসাদে করে ধর্মর লগে সমাজর সম্পর্ক জবর অছে।

সমাজর উন্নতি সঠিক পথে ইলকরতে গেলেগা নিয়ম নীতির ভিতরেদে চলানি থক। এহানেই সামাজিক উন্নতির লক্ষণহান। কৃষ্টিকলা যেতা পরম্পরাগত ভাবে চলিয়া আছেছে, ঔতাউ সামাজিক মূল্যবোধর ভিতরেদে আছেহান। মানুর দৃষ্টিভঙ্গী হবা অইলে সমাজ পরিপুষ্ট অর। বারো সামাজিক চিন্তা ধারালো উন্নতি করতে গেলেগাই সত্য বারো ন্যায় পরায়ণ- অনা লাগতয়। মানুর প্রতি মানুর প্রেম - ভালবাসা থনা, হিংসা নিন্দা বেলানি ইত্যাদি চিন্তার মাতুম ইলয়া সত্যবাদী, জিতেদ্রিয় স্বার্থত্যাগী পুরুষ হিসাবে সামাজিক কর্তব্য বারো দায়িত্ব পালন করানি। ঔহান অইলে সমাজে শান্তি বিরাজ করতয়।

বিষয়বস্তু সাপেক্ষে ধর্মীয় সামাজিক দৃষ্টি ভঙ্গীলো আমার সমাজে এবাকা বিভিন্ন ধরণর ঘাত প্রতিঘাত খানি পরিলক্ষিত আছে। ঔতা মিচাং-মান্না অয়া কর্তব্য বারো দায়িত্ব পালন করলে শৈন্যায়া উন্নতির পথগো ত্বর অইতয়। আমি এহান পাহুরানি থকনেই যে আমি গৌড়ীয় বৈষ্ণব ধর্মাবলম্বী মানু। আমার সমাজহান উন্নতির পথে পরিচালিত করতে গেলেগা ত্যাগ স্বীকার করানি, নিজর স্বার্থ বেলেয়া সমাজর স্বার্থে নিজরে য়ৌকরে পারানি। যেসাদে শ্রীল ভুবনেশ্বর সাধুঠাকুর নিজরে কায়োমনোবাক্যে ঐকান্তিক ভক্তিভাবলো আধ্যাত্মিক চেতনার মাধ্যমে শ্রী শ্রী রাধারানীর কৃপাধন্য অয়া নবদ্বীপধামরমা গোবিন্দজীউ প্রভুর মূর্তি লিংখাত করিয়া গোবিন্দবাড়ী ধর্মমন্দির হংকরেছে, যেহান বিষ্ণুপ্রিয়া মণিপুরী সমাজর গৌরবহান হিসাবে চিরস্মরণীয় অয়া আছে; যেসাদে শ্রীমৎ পুণ্ডরীকাক্ষ এইগা গিরক নাহেয়া নাপিয়া নিজ স্বার্থ জলাঞ্জলি দিয়া তপস্যালো রাধাকুণ্ডধামে কাটাবন জঙ্গলর হাদিত জয়দেব গোস্বামী প্রভুর স্বপাদিষ্ট অয়া শ্রী শ্রী রাধামাধব জীউ প্রভুর মন্দির লিংখাত করেছে, যেহান বিষ্ণুপ্রিয়া মণিপুরী সমাজর সেকপীলহান বা জাতীয় পরিচয়হান বুলিয়া মাতে পারিয়ার; বারো তনুবাবু, মহেন্দ্র, গীতিস্বামীর সাদানে সমাজসেবী অনা। ঔসাদে মহান আদর্শর মাতুম ইলয়া সমাজর কাম করিয়া যানা পারলে সমাজর মঙ্গলহান।

তা থকয়া আমি হাবি হানে নিজর সমাজর উন্নতির হকে কৌলি-খান্না এরে দিয়া, কাহ্নি ভিতরে থয়া আগরে আগয় কন্না কন্নি দিয়া, মিচাং-মান্না অয়া শ্রী শ্রী রাধামাধবজীউ সেবাপূজা করিক, বারো ঔতার ভিতরেদে হাবি সংগঠনর কর্মকর্তারেলো কামকাজ আকতা অয়া ন্যায়নীতি বারো আদর্শলো পালন করলে সমাজর উন্নতির পথগো চাংখল অইতয়। কারণ- সামাজিক কর্তব্য বারো দায়িত্ববোধ থাইতে গেলেগা অহংকার বা কাহ্নি এহান থানা থক্ নেই; যেহান সামাজিক সংগঠনে ক্ষতির কারণ অইতে পারে। এহান সম্পর্কে গীতার ৩য় অধ্যায় ৩৭ নং শ্লোকে ভগবান শ্রীকৃষ্ণর অর্জুনরে মাতেছে—

“কাম এষ ক্রোধ এষ রজগুণসমুদ্ভবঃ।

মহাশনো মহাপাপম বিদ্বেনমিহ বৈরিণম্”।।

অর্থাৎ কাহ্নি এহান সৃষ্টি অরতা রজগুণ সম্পন্ন আড়ম্বরেত্ত যেহান বিনাশর ডাঙর লক্ষণ আহান। জ্বিগো যেসাদে লাগলে কাচা মজা না বাসের, ঔসাদে রজগুণ সম্পন্ন আড়ম্বর বা ভোগ বিলাস এহানউ মহাপাপহান, যেহানর পতন অনিবার্য।

তা আরো সমাজর মানু আগো হিসাবে মোরতা সমাজর প্রতি দায়বদ্ধতা বারো কর্তব্যবোধ আছে ঔহান নিংকরিয়া ঔহানর ভিতরেদে সামাজিক কাম করানি বারো সংগঠনর মাধ্যমে পদবী থাইলে আরাকৌ দায়িত্ব জবর পালন করানি যেহানর নাং সমাজসেবা। স্বামী বিবেকানন্দ গিরকর মতে জনসেবাই ভগবৎ সেবা অইলেতে, সমাজ সেবা এহানউ ভগবৎ সেবা সম। কাজেই সমাজ সেবারী হিসাবে ঐকান্তিক ভক্তি ভাবলো প্রেম-ভালবাসা তথা আলোচনার মাধ্যমে সমাজ সেবা করানি থক। শ্রীশ্রী রাধামাধবজীউ প্রভুর সেবা পূজার ভিতরেউ এহান প্রযোজ্য, কারণ এরে মানবজনম এহান অতি দুর্লভ বস্তুহান বুলিয়া মহাজ্ঞানী-মহাজন-সাধু-সন্ত মহাপুরুষে মাতিয়া গেছিগা। মানবজীবনর প্রতি মুহূর্ত অতি গুরুত্বপূর্ণ বারো দায়বদ্ধ। কিয়া বুললেতে মানু আগোর জীবন ক্ষণস্থায়ী। এবাকা হবা অয়া আছে মানুউগ দৈব দুর্বিপাকে কোন জ্বরা-ব্যাদি বা কোন দুর্ঘটনাগ্রস্ত অয়া গেলেগা লগে-লগে নিংস্বাহান দেহাগন্তো সেচিয়া যারগা, ঠইগো লালইলে দেহাগো মাটিত পড়িয়া থার, ঔপেইত হাবি সামাজিক দায়বদ্ধতা ধুলিস্যাং অর; কিন্তু করণীয় কীর্তি উহান মেইমুত নার অর্থাৎ “কীর্তি যস্য সং জীবতি”। ঔরে মানু উগরতা কীর্তি উহান চির-স্মরণীয় অয়া থার। যেসাদে শাস্ত্রে মাতের—

“নৈনং ছিন্দন্তি শস্ত্রাণি, নৈনং দহতি পাবকঃ ইতিহৃদয়য়ে নমঃ।

নৈ চৈনং ক্লেদয়ন্ত্যাপো ন শোষয়তি মারুত, ইতিশ্বিরসে স্বাহাঃ”।

তা থকয়া জীবনর প্রতি মুহূর্তরমা সামাজিক মূল্যবোধে জবর। এরে ক্ষণস্থায়ী জীবন এহানাং কৌলি কিতা করিয়া বিভেদ অইলে সামাজিক উন্নতি নার, বরং সামাজিক অপরাধ বুলিয়া গণ্য অর, যেহান ধর্মীয় চেতনাবোধর পরিপন্থীহান। ন্যায় নিষ্ঠা, ভক্তিভাব বারো আদর্শর মাতুমে সমাজ পালকরানি থক। এহান একমাত্র ধর্মীয় রীতিনীতি, আচার বারো সদ্যবহারর মাধ্যমে, পরস্পর ভ্রাতৃত্ববোধ, সৌহার্দপূর্ণ মনোভাবলো দায়িত্ব বারো কর্তব্য পালন করিয়া যানা; ঔহান অইলে ধর্ম বারো সমাজর পথগো ইঙাল ঙালই তয় বারো শ্রীল ভুবনেশ্বর সাধুবাবার লব্ধ প্রতিষ্ঠিত গোবিন্দজীউ শ্রী মন্দির বারো শ্রীমৎ পুণ্ডরীকাক্ষ এইগার লব্ধ প্রতিষ্ঠিত শ্রী শ্রী রাধামাধবজীউ প্রভুর সেবা তথা মন্দিরর শ্রীবৃদ্ধি অইতয়।

(প্রবন্ধ এহান সিংলা তিনঘড়ি শ্রীমণ্ডপে পাঠ করানি আছে, ২০১২ ইং, মার্চ মাসে)। □

দশাবতারর মাহাত্ম্য বারো বিষ্ণুপ্রিয়া মণিপুরীর ভূমিকা

১) ভূমিকা— ভগবান বিষ্ণুর দশাবতারর মাহাত্ম্য নিয়ামপারা। মাততে গেলেগা দশাবতার এহান আমার সমাজে রথ উৎসবে জাতীয় কৃষ্টির ডাঙর দিক আহান হিসাবে মৌতুপ করে ধরিয়া থছি, যেহান আমি খেচুরির পালিরমা জয়দেব দেনা বুলিয়া মাতিয়ার। তা থকয়া এরে দশাবতারর মাহাত্ম্য ব্যাখ্যা করতেগা অনেক কিতিকুরুম অইতে পারে, পাকরেকুরা দশ গিরিগিথানি হাবিহানে সুপরামর্শ দিলে পরিশ্রম সার্থক অইতই বুলিয়া নিংকরুরি।

২) ভগবান বিষ্ণুর য়্যারি আকচুটি— “বিষ্ণু”র বুৎপত্তিগত অর্থ বিশ্লেষণ করলে হারপেয়ারতাই বিষ্ণু ধাতুতো বিষ্ণুর উৎপত্তি যেহানর অর্থ “বিস্তার” অর্থাৎ বিশ্ব চরাচর হাবি জীবজন্তুর বা প্রকৃতির হাবি বস্তুরমা অন্তর্যামীরূপে বিরাজমান গিরক উগরনাং বিষ্ণু বা বিশ্ব-পালন কর্তা বা প্রজাপালন কর্তা বিষ্ণু।

মহাভারতরমা শরশয্যাশায়ী পিতামহ ভীষ্ম যুধিষ্ঠির মহারাজারাং ভগবান বিষ্ণুর সমপর্কে লিশিং লিশিং নামকীর্তন করেছিল, যেহানর মুখ্য উদ্দেশ্যহান কৃষ্ণনাম। ঔ নাম কীর্তনে ভগবান বিষ্ণুরে “বেলিরাজা,” “ভাস্করদ্যেতি” ইত্যাদি বুলিয়া আখ্যায়িত করেছিল। এহান আমি বৃহদ্রম পুরানে বিষ্ণুর বামন অবতার বর্ণনারমা পেয়ার। তা থকয়া সূর্যস্তুতিরমা হারপেয়ারতাই...

“ওঁজবাকুসুমং সংকাশং কাশ্যপেয়ো মহাদ্যুতিঃ ধ্বস্তারিং সর্বপাপঘ্নং প্রণতোহস্মি দিবাকরম্”।।

যেহেতু ভগবান বিষ্ণু শঙ্খচক্র গদা পদ্মধারী, তা থকয়া হাবি কাম কাজরমা ভগবান বিষ্ণুরে নিংশিং অনা থক। বিশেষ করিয়া ষোলহান নাঙলো ভগবান বিষ্ণুরে নিংশিং অনা থক। থাংনাত ষোলহান নাংসাতকরিয়াদেনা আছে। যেমন— নুরারাপানি দূরেই করানিরকা হজক খেইতে বিষ্ণুরে নিংশিং অনা “ওঁ ওঁ বিষ্ণু” বুলানি, ভোজনরমা “জনার্দন” বুলিয়া নিংশিং অনা, শয়নে বা ঘুমজিতেগা “পদ্মনাভ” বুলানি, লোহং করানিত “প্রজাপতি” হিসাবে নিংশিং অনা, যুদ্ধরমা “চক্রধর” হিসাবে নিংশিং অনা, শক্তি হৌপন দেখলে “গোবিন্দ” বুলিয়া ডাহানি বা সলকরানি, প্রবাসে “ত্রিবিক্রম,” পামপলগোরমা “নারায়ণ,” প্রিয়সঙ্গমরমা “শ্রীধর” বুলিয়া নিংশিং অনা, বিপদকালে “মধুসূদন,” বনরমা “নারায়ণ,” পাবকরমা “জলাশয়ী,” পানিরমা “বরাহ,” টেঙারারমা “রঘুনন্দন” বুলিয়া নিংশিং অনা বারো হাবি কাম-কাজে “মাধব” বুলিয়া কাকেই কারিয়া ভগবান বিষ্ণুরে নিংশিং অনা থক।

৩) দশাবতারর মাহাত্ম্য - “যদা যদা হি ধর্মস্য গ্লানির্ভবতি ভারত।... পরিত্রাণায় হি সাধুনাং, বিনাশায় চ দুষ্কৃতাং। অহং সন্তুভামি যুগে যুগে”। অর্থাৎ যেপেইরমা সনাতন ধর্মর গ্লানি অর বা অইতয়, ওঁপেইরমা দুষ্কৃতিকারী বা পাপীরে বিনাশ করিয়া মুনি ঋষির মুক্তিলাভ বারো সনাতন ধর্মর পুনর প্রতিষ্ঠারকা ভগবান বিষ্ণু বিভিন্ন অবতার রূপে বা তঙাল তঙাল

অবতারলো আবির্ভাব আছে, যেহানরে পুলহাপ করলে হারপেয়ারতাই কৃষ্ণ অবতার। ঔহান দশাবতার স্তোত্রের মাতুমে বাড়ি করে থাংনাত হাজানি আছে।

“প্রলয়- পয়োধি জলে ধৃত বানসি বেদম,

বিহিত- বহিত্র চরিত্রম খেদম্।

কেশব - ধৃত মীন শরীর, জয় জগদীশ হরে ॥

কেশব- ধৃত কূর্ম শরীর, জয় জগদীশ হরে ॥

কেশব- ধৃত নরহরিরূপ, জয় জগদীশ হরে ॥

কেশব- ধৃত বামনরূপ, জয় জগদীশ হরে ॥

কেশব- ধৃত ভৃগুপতিরূপ জয় জগদীশ হরে ॥

কেশব- ধৃত রাম শরীর, জয় জগদীশ হরে ॥

কেশব- ধৃত হলধর রূপ জয় জগদীশ হরে ॥

কেশব- ধৃত বুদ্ধ শরীর, জয় জগদীশ হরে ॥

কেশব- ধৃত কঙ্কি শরীর, জয় জগদীশ হরে ॥

কেশব- ধৃত দশবিধরূপ, জয় জগদীশ হরে ॥

গজর ইকরা দশাবতার স্তোত্র এতা ব্যাখ্যা বা বিশ্লেষণ করলে হারপেয়ারতাই সংসার মালেম এহানরমা যেবাকা প্রলয় অছিল, ঔবাকা হাবি বিশ্ব চরাচর জীব জন্তু এতা হাবিরে জ্ঞান বারো কর্ম- শিক্ষার রূপ দেনারকা বুলিয়া ভগবান বিষ্ণু মাছগোর রূপহান ধরিয়া ঔ লুপ্ত - বেদ পুরাণ উতা উদ্ধার করেছিল। ঔতার থাংনাত ভগবান বিষ্ণু কূর্ম রূপে বা ঙাচুপিগোর বা ডুল্লিগোর রূপহানলো আবির্ভাব অয়া সংসার মালেম এহানরে পিঠিহানাং ঙাককরিয়া থছিল। ঔতার থাংনাত প্রভুয়ে বরাহরূপে বা ছওরগোর রূপহান ধরিয়া দাতগিলো চিরেয়া হিরণ্যাক্ষ্য বুলতারা হিনচাপা ঔগরে বিনাশ করিয়া সংসারহান রক্ষা করেছিল। চতুর্থতঃ ভগবান বিষ্ণু নৃসিংহরূপে অবতার অয়া হিরণ্যকশিপু বুলতারা হিনচাপা ঔগরে সংহার করিয়া ভক্তুর আশা পূরণ করেছিল। ঔতার থাংনাত ভগবান বিষ্ণু বলিরাং পরাজিত দেবরাজ ইন্দ্রে বারো দেবকুল রক্ষারকা বুলিয়া বামনরূপে অবতার অছিল। ঔতার থাংনাত পরশুরামরূপী ভগবান বিষ্ণু নিঃক্ষত্রা পৃথিবী বা মালেমহানরে ধারণ করিয়া ক্ষত্রিয়কুল রক্ষা করে পারেছিল। ঔতার থাংনাত ভগবান বিষ্ণু রাম রূপে অবতার অয়া সত্য- ন্যায় ধর্ম প্রতিষ্ঠা করেছিল। ঔতার পিছেদে ভগবান বিষ্ণু শ্রীকৃষ্ণরূপে অবতার অয়া- মথুরার দানব রাজ কংসরে ধ্বংস করেছিল। নবমরূপে ভগবান বিষ্ণুর বুদ্ধ অবতার, যেহানর মাধ্যমে সংসার মালেমে অহিংসা - ধর্ম প্রতিষ্ঠিত অছিল। দশম পর্যায়ে অর্থাৎ শেষে ভগবান বিষ্ণু সত্য- ধর্ম পুনঃ প্রতিষ্ঠারকা বুলিয়া কঙ্কিরূপে পুনরায় অবতার অছিল। এহানেই বাড়ি করে দশাবতারর মাহাত্ম্যহান বুলিয়া থানি আহান হারপা পারিয়ার।

৪) দশাবতার নির্ণয়ে বিষ্ণুপ্রিয়া মণিপুরীর ভূমিকা— দশাবতারর মাহাত্ম্য ব্যাখ্যা সাপেক্ষে আমার মানুর ভূমিকা নিয়ামপারা। বিশেষ করিয়া রথ- উৎসবে বা কাঙর খেচুরির

পালিৰমা দশাবতারৰ গুৰুত্ব তাৎপৰ্যপূৰ্ণ। কবি জয়দেবৰ নিৰ্দেশিত দশাবতারৰ স্তোত্রৰ মাহাত্ম্য নিৰ্ণয় কৰানিত বিষ্ণুপ্ৰিয়া মণিপুৰী ভক্ত বৃন্দ হাবিহানে নিয়াম গুৰুত্বপূৰ্ণ ভূমিকা পালন কৰতারা। এহান কিন্তু অন্য সমাজে ৯ দিন ব্যাপী আমাৰ সমাজৰ সাদনে পালন কৰতারা বুলিয়া মনে নার। একমাত্র জগন্নাথ মহাপ্ৰভুৰ পুৰীধামে বা ঢাকা দক্ষিণৰ মহাপ্ৰভুৰ আখড়ারমা হয়তঃ উৎসব পালন কৰতারা। যেতাউ অক্ এহান আমাৰ সমাজৰ কৃষ্টিকলা বা ৰুহিবৃষ্টিৰ ডাঙৰ বৈশিষ্ট্য আহান। গাঙ গাঙৰ মালঠেপ বা শ্ৰীমন্দিৰে ৯ দিন কাঙৰ খেচুৰিৰ পালিৰমা কবি জয়দেবৰ প্ৰদৰ্শিত দশাবতার নৃত্য, এলা-নাছা, বা খুপাকইশৈৰ মাধ্যমে উৎসব মুখৰ পৰিবেশ আহানৰ সৃষ্টি অৰ। এৰে উৎসব এহানৰ ঐতিহাসিক তাৎপৰ্যপূৰ্ণ দিক আহান আছে, যেহান থাংনাত খানি চৌৰাপ চৌৰাপ কৰে ফংকৰানি আছে।

কিংবদন্তী ইতিহাস মতে সত্য যুগেস্ত চিনকৰিয়া দ্বাপৰ যুগ লমনিৰ খামতলেদে কলিয়ুগ হমানিৰ ঠিক আগে ভগবান শ্ৰীকৃষ্ণৰে জৰা শবৰ শিকারী গিৰকে যে গাছজাৰৰ ডেঙগত বাদেছিল, ও ডেঙ উগ লিশিং লিশিং বছৰ পিছেদে সমুদ্ৰৰ ঢেউ লাগিয়া উড়িয়া বা পুৰীধামৰ সমুদ্ৰৰ পাৰগত লাগিয়া আছিল ও ডেঙ উগন্ত জগন্নাথ মহাপ্ৰভুৰ মূৰ্তি হংকৰানিৰ সূচনাহান। ওবাকা কলিঙ্গৰাজ (বৰ্তমান উড়িয়া) আৰ্য - ক্ষত্ৰিয় কৃষ্ণভক্ত ইন্দ্ৰদ্যুম্ন গিৰকে হৌপনেদে আদেশ পেয়া জগন্নাথ মহাপ্ৰভুৰ মূৰ্তিগো হংকৰিয়াছিল। ও কাৰণে এবাকা পুৰীধামৰমা পূৰ্ণিমা তিথিত স্নানযাত্ৰা বুলিয়া পালন কৰতারা। এৰে স্নানযাত্ৰা এহান বিষ্ণুপ্ৰিয়া মণিপুৰী সমাজে নিয়ামপাৰা প্ৰচলিত। ইন্দ্ৰদ্যুম্ন মহাৰাজা গিৰকে জগন্নাথ প্ৰভু, বলবদ্র বারো সুভদ্রা এৰে তিনোগিৰ মূৰ্তি হংকৰানিৰকা আনুৰাছিল বিদেশী কাৰিগোৰ উগৰ নাং অনন্ত মহাৰাণা। ও কাৰিগোৰ উগোৰ লগে মহাৰাজাৰ শৰ্ত আহান অছিলতায় সমপূৰ্ণ ২১ দিন ঘৰগোৰমা দুয়াৰ-খিড়কী বন্ধ কৰিয়া শ্ৰী শ্ৰী জগন্নাথ প্ৰভুৰ মূৰ্তি হংকৰানি, হংকৰিয়া লমকৰলে পিছেদে দুয়াৰ খুলানি। কিন্তু ইন্দ্ৰদ্যুম্ন মহাৰাজা গিৰকে ধৈৰ্য ধৰে নুৰাৰিয়া ১২ দিন লালনিৰ পিছেদে দুয়াৰ খুলানিৰ ফলে জগন্নাথ প্ৰভুৰ মূৰ্তিগোৰ আত যাং সমপূৰ্ণ নাছে বুলিয়া প্ৰমাণ আহান।

এহান অইলতায় পুৰীধামৰ চুম্বক য়াৰী আহান। কিন্তু থাংনাত হো থাইনাৰ মণিপুৰ লামৰমা আপা বপা ইবেল গাহিৰ হাকতাকে ১৮৩২ ইংৰাজীৰমা ও সময়ৰ মণিপুৰ ৰাজ গম্ভীৰ সিংহৰ হাকতাকে রথ উৎসব বা কাঙ আসুলানিৰ প্ৰচলন অছিল সিলেটে। এহানৰ প্ৰমাণ আমি ডঃ এম. কীৰ্তি সিংহ গিৰকৰ লেংকৰা "Religious Development in Manipur" লেৰিক হানৰমা ১৬৫ - ৬৬ পৃষ্ঠাৰমা পেয়াৰ- "When still at Sylhet, he (Gambhir Singha) is reported to have quelled a communal riot between the Hindus and the Muslims. The story goes that the Muharam and the Ratha Jatra occurred on the same day. The Nowab of Sylhet Gonarkhan requested the Hindus to defer the celebration of the Ratha-Yatra by one day. But thinking it as insultation, Gombhir Singha dispersed the Muslims with the

Manipuri Trops (both the Meithies and the Bishnupriyas). And as such, the celebration was held in scheduled time, for which he (Gambhir Singha) was hailed as the protector of Hinduism by the people of Sylhet. On his return to Manipur, he introduced the worship of Jagannath. On Sunday, May 20, 1832, a Brahmin Panda has been brought by the instruction of Gombhir Singha, from Puridham or Jagannath kshetra, to prepare the idol of Jogannath with twelve charist, for which, it was performed on a grand scale". (অর্থাৎ মণিপুররাজ গম্ভীর সিংহ সিলেটর নবাব গুণরখান সাহেব গিরকরে তার সৈন্য - সামন্তলো লালফামে জিঙিয়া জগন্নাথ প্রভুর মূর্তিগ করয়েয়া ২০ মে ১৮৩২ ইংরেজীরমা সিলেটে কাঙ উৎসব প্রচলন করেছিল, এহান ডঃ এম কীর্তি গিরকর লেংকরা লেরিকরমা ১৬৫-১৬৬ পৃঃ পেয়ার।) এসাদে করে মৈতৈ বারে বিষুপ্ৰিয়া মণিপুরীর ভিতরে সমাজে কাঙ আসুলিয়া উৎসব পালন করানির পর্বহান আরম্ভ অইল অবিভক্ত সিলেটরমা। এহানর থাংনাত এমন কি খুব সম্ভব ১৮৪৩ ইংরেজীরমা প্রতাপগড় লয়ার খালিবাড়ীর শ্রীমৎ পুণ্ডরীকান্ধ শর্মা এইগা গিরকে সিলেট জিলা সদর কমিশনার গিরকরাংতো অনুমতি বা য্যাথাং লয়া কাঙ আসুলানির প্রচলন আরম্ভ করেছিল। ১৯৪৭ ইংরেজীর মার্চ মাসে সিলেটর সীমানা নির্ধারণ কমিশনার মিঃ রেডক্লিফ গিরকর নেতৃত্বে Referendum বা গণ ভোটর মাধ্যমে সিলেটেত্ত খেইকরিয়া ঔ সময়র করিমগঞ্জ মহকুমার পাথারকান্দি বারো রাতাবাড়ী থানা সহ আসাম প্রদেশর অন্তর্ভুক্তি হিসাবে ঠিক করে দিল। তেবউ আমার সিলেটর বেয়াপা বেইবুনি খালপারর হাতহানর কাঙ উৎসব উপভোগ করানিত আইতারা। এহানর উজ্জ্বল দৃষ্টান্ত স্বনামধন্য কবি-সাহিত্যিক মদন মুখার্জী এইগার স্বরচিত কবিতা “খালপারর কাং/যিতেগাতে আকতা অয়া আলইতে ঠাং ঠাং” কবিতাই প্রমাণ।

এসাদে করে বিষুপ্ৰিয়া মণিপুরী সমাজে ক্রমবর্ধমান গতিতে সিলেটর মাধবপুর জোড়া মণ্ডপেত্ত চিনকরিয়া আসাম ত্রিপুরা, দিল্লী, বোম্বে কলিকাতা ইত্যাদি হাবি ফামে রথ উৎসব চাংখল করে পালন করতারা। কাঙর খেচুরির পালিরমা ৯ দিন ব্যাপী গাবুরাপোয়েই - পুরী জেলেইত্ত চিনকরে বুজন-কনাক হাবিহানে জয় দেব বা দশাবতার স্তোত্র পাঠ করে করে আতর তালি দিয়া এলা দিতারা। এলারমা মাততারা - “নমঃ হরি হে, দশ-অবতার, এক নিরঞ্জনো হরি অনেক আকার”। বরো জগন্নাথ প্রভুরে কাঙহানর গজে কাকরিয়া এলা দিতারা ইমা-ইন্দলে- “জয় জগন্নাথ, রথে চড়িয়া যায়। বৃন্দাবনে শিরোমণিঃ ... গোবর্দ্ধনে স্পর্শ মণিঃ... দিন নাথ, জগন্নাথ, অধম জানি দয়া করো, জগন্নাথ... দীননাথ” ইত্যাদি। বারো জয়দেবর ভিতরে এলা দিয়া মাততারা “খাটল চরা জগন্নাথ, কেহেম চরা জগন্নাথ, আলিয়া ঠাকুর জগন্নাথ...” ইত্যাদি। এসাদে উৎসবমুখর লগে আগর প্রেম ভালবাসা, ভাবর আদান - প্রদান বারো ধর্মীয় মনোভাব ফুটিয়া উঠের। সেন্ধারমা শ্রী মন্দিরে আরতি দিতারা- “জয় জয়শ্রী জগন্নাথ, আরতি

করে”। ...নিরখিত চরণ গোবিন্দ... আরতি করে। ঘনন ঘন আন্টা বজে, বেনু বাজরে... আপদ হরে। (আরতিহানর খামতলেদে ইন্দ্রদ্যুম্ন মহারাজার নিঙে) “ইন্দ্রদ্যুম্ন সিন্ধুর ঘাটে ...রোহিনী নাথ হরে”। এরে জগন্নাথ প্রভুর আরতিৰমা ফুটিয়া উঠেৰ জাতীয় সাংস্কৃতিক বৈশিষ্ট্য। এহান আর আর সমাজে চলহান অতি কম। তা থকয়া জয়দেবৰ দশাবতার স্তোত্রৰ মাতুমে জগন্নাথ মহাপ্রভুর নিংশিং আরতি এলা দিয়া রথ উৎসব পালন করানি এহান বিষ্ণুপ্ৰিয়া মণিপুৰী সমাজে বিশেষ গুরুত্বপূৰ্ণ ভূমিকা আহান, এহানাত কোন সন্দয় নেই।

(৫) খামতলহান - গজ র ইকরা আলোচনা মতে দশাবতারস্তোত্রৰ মাহাত্ম্য ব্যাখ্যা সাপেক্ষে এহানেই পৰিস্ফুট অর যে সংসার মাৰ্লেমৰ জীব চরাচর হাবিৰমা ভগবান বিষ্ণু সময় সময় সত্যধৰ্ম প্রতিষ্ঠাৰকা বুলিয়া বিভিন্ন অবতাবে আবিৰ্ভূত আছে। কিন্তু এতা হাবি আবিৰ্ভাবৰ ভিতরেদে খত কৰিয়া উমকরলে হারপেয়ারতাই বা মনে নিংকরিয়্যারতাই যে ভগবান বিষ্ণু বারো ভগবান শ্ৰীকৃষ্ণ একই স্বৰূপ, লীলার কারণে ভিন্ন ভিন্ন রূপ বারে আরাকৌ কৃষ্ণনাম সংকীৰ্তনে এলারমাউ মাততারা - ব্রহ্মা, বিষ্ণু, মহেশ্বৰ, তিনে হয় একেশ্বৰ। তা থকয়া ভগবান বিষ্ণুৰ হাবি অবতারৰ ভিতরেদে কৃষ্ণ অবতার এহানেই শ্ৰেষ্ঠ অবতার বুলিয়া প্রমাণ পেয়ার। কিয়া বললেতে বিষ্ণুপুৰাণ মতে হারপেয়ারতাই যে - “কৃষ্ণস্ত ভগবান স্বয়ং”। অৰ্থাৎ শ্ৰীকৃষ্ণই ভগবান বিষ্ণু। বিভিন্ন আবতারৰমা বিভিন্ন মহিমাৰ প্রকাশ যেমন- নৃসিংহ অবতাবে হিংসা, কিন্তু ওতা হাবিৰ ভিতরেদে কৃষ্ণ অবতারৰমা ভক্তি, জ্ঞান, কৰ্ম, মাধুৰ্য, ভোগ-লালসা ত্যাগ বারো কৃষ্ণেন্দ্ৰিয় প্রেম ইত্যাদি। প্রসঙ্গত চৈতন্য চৰিতামৃতৰ ভাষাৰমা হারপেয়ারতাই—

“আত্মেন্দ্ৰিয় প্ৰীতিৰিচ্ছা তাৰে বলি কাম,

কৃষ্ণেন্দ্ৰিয় প্ৰীতিৰিচ্ছা, তাৰে বলি কৃষ্ণনাম”।

আরাকৌ বিষ্ণু পুৰাণ মতে - ভগবান বিষ্ণু আকখুরুম মোহিনী রূপ ধারণ কৰিয়া দেবকুল রক্ষার্থে হিনচাপা বিনাশ কৰেছিল বারো আরাক আকখুরুম হয়গ্ৰীব মূৰ্তিৰ বেষহানলো পাতালে গিয়া ব্ৰহ্মাৰ কমণ্ডলুগোত্ত মধুকৈটভৰে হরণ কৰিয়া বেদ উদ্ধাৰ কৰেছিল, একমাত্র পাপী তাপী বিনাশ করানিৰ কারণে। এসাদে কৰে জগন্নাথ প্রভু, বলবদ্র, বারো সুভদ্রাৰ মূৰ্তিৰ বেষহানলো ভগবান বিষ্ণু বা শ্ৰীকৃষ্ণৰ মহিমা অপার। এহান আরাকৌ "Festivals of India" বুলিয়া National Book Trust India, Delhi Publication, Assam State Information Centre লেৰিকহানৰ ১৯ পৃষ্ঠাৎ পৰিষ্কারভাবে হারপেয়ার। ও লেৰিকহানাৎ উল্লেখ আছেতায়- "Since Sri Jagannath is a form of Vishnu and Sri Krishna, Perhaps his most popular incarnation, many of the rituals observed in the Puri temple are associated with events in the life of Sri Krishna's journey from Gakul to Mathura". - অৰ্থাৎ জগন্নাথ মহাপ্রভু ভগবান বিষ্ণু বারো শ্ৰীকৃষ্ণৰ আকৃতিৰ গঠন বারো পুৰীধামে রথ উৎসব পালন বা রথযাত্রা এহান ভগবান শ্ৰীকৃষ্ণৰ গোকুলেত্ত মথুৰা যাত্রা বুলিয়া ইতিহাসে প্রমাণ দেৰ। থাংনাত ও লেৰিকহানৰ ২২ পৃঃ পেয়ারতাই "Perhaps

Jagannath represents not only the past and present, but also the future one of the last rituals in the temple is the musical recitation of the Git Gavinda by Joydeva containing naration of the ten incarnation of Vishnu, the last being kalki, the Avatar of the future. Kalki will destroy all the barbaric in man paving the way for the emergence of perfection. Perhaps, the present incomplete form of Jagannath awaits fulfilment of consciousness of man of tomorrow".

এরে ঐতিহাসিক দূরদর্শিতাসম্পন্ন প্রমাণ এহানেই যথেষ্ট। জগন্নাথ প্রভুর অসমপূর্ণ আত যাং- এহানেই কলির জীব হাবির ভিতরে চৈতন্য উদয় অনা। অর্থাৎ সত্য, ন্যায় ধর্ম প্রতিষ্ঠা করানি।

তা থকয়া দশাবতার স্তোত্রর মাধ্যমে কলির জীব উদ্ধারর সালে ১৪৮৫ সালে শ্রী শ্রী চৈতন্য মহাপ্রভুর ভগবান বিষ্ণু বা কৃষ্ণরূপে অবতার। এসাদে করে আমার সমাজর মানু গৌর ধর্মে দীক্ষিত অনার থাংনাত আরাকৌ কৃষ্ণভক্তি ভাব জবর আছে। এমন কি জয়দেব দশাবতার স্তোত্ররমা রথ উৎসবে জয়দেব দেনার মাতুমে মাততারা- “নমঃ হরি হে দশাবতার ‘...না যাইও গয়া, গঙ্গা, না যাইও বারাণসী। ঘরে বসি জপ নাম সদায়ে তুলসী....’। বারো মাততারা গৌর হরি হে। নবদ্বীপ ছাড়িয়া আইল চৈতন্য ভিখাড়ী। যাইহোক, এসাদে করে দশাবতারর জয়দেবর মাধ্যমে কৃষ্ণনাম বিতরণ বা ষোল নাম বত্রিশ অক্ষর, সেই তারক ব্রহ্ম নাম - এহানেই শ্রেষ্ঠ মাহাত্ম্যহান। যেহান আমার সমাজে পরবর্তীকালে শ্রী শ্রী ভুবনেশ্বর সাধুঠাকুরর আদর্শই জীবউদ্ধারর পথগো বুলিয়া পরিচিতি লাভ করেছে। তা থকয়া এহানরে কেন্দ্র করিয়া সমাজর ভিতরে রথ উৎসব বা দশাবতার স্তোত্রর মাধ্যমে ভগবান বিষ্ণুর বা শ্রী কৃষ্ণর নিঙে উৎসব পালন অর, যেহান জাতীয় বৈশিষ্ট্যর ডাঙর দিক আহান।

তথ্য সংগ্রহ :-

- 1) গোবিন্দার্চন চূড়ামণি - শ্রী শ্রী ভুবনেশ্বর সাধুঠাকুর
 - 2) দেব- দেবী ও তাদের বাহন - প্রণবানন্দ মঠ
 - 3) প্রণব পত্রিকা - পৌষমাস ১৪১৮ বাংলা
 - 4) "Religious Development in Manipur in 18th and 19th century" By Dr.M. Kriti Singha.
 - 5) গীত-গোবিন্দ - কবি জয়দেব রচিত
 - 6) “পৌরি পত্রিকা” - বাংলাদেশ ২০০৬ ইং আষাঢ় মাহা।
 - 7) "Festivals of India" - National Book Trust India, 2006
- (প্রবন্ধ এহান প্রকাশিত আছে নুরা এলা পত্রিকাৎ ২০১০ ইংরাজী, জানুয়ারী বারো রাধামাধব সমাচার পত্রিকা ২০১০ ইংরাজীর মার্চ)। □

মহালয়ার পিতৃপক্ষরমা তর্পনর মাহাত্ম্য

মহালয়া বুলতেই পয়লা মনে অর যে আশ্বিন মাহার বা শরৎ ঋতুর অমাবস্যা তিথি উহান, যে পূণ্য তিথি উহানাৎ শক্তির গিথানক মহিষাসুর মর্দিনী দুর্গা ইমা দ্যৌলিশিং দ্যৌলাশা এতা জিৎতা করানিরকা হিনচাপা বা রাক্ষসকুল বিনাশ করিয়া মালেমরমা আনার ইঙ্গিত শাস্ত্রে মাতের— “যা দেবী সর্বভূতেষু শক্তিরূপেন সংস্থিতা

....নমস্তস্যৈ নমস্তস্যৈ নমস্তস্যৈ নমোহ নমোহ”।

কিন্তু মহালয়ার পিতৃপক্ষ বুলতে হারপেয়ারতাই ঔ পূর্ণিমা তিথির থাংনাকার প্রতিপদ তিথিত্ত অকরিয়া মহালয়া বা অমাবস্যা তিথিপেয়া পক্ষ কাল বা সম্পূর্ণ ১৫ দিন এহান নিক্কা বিয়ানে হিনেয়া নামসা, নিকুন, কাঠিত্ত চিনকরে গারিগোরমা গৌড়ীয়াহান থয়া পিতৃলোকর উদ্দেশ্যে তর্পন করানির গুরুত্ব নিয়ামপারা বুলিয়া শাস্ত্রজ্ঞ পণ্ডিত বারো বামুন-ক্ষেত্রী বৈষ্ণব গিরিগিথানীরাংতো হারপেয়ারতাই— বাপকর গোত্রত্ত চিনকরে বাপক, মালক, বপা-বপির পুরেল হিসাবে হাতহান পুরেল অর্থাৎ- (পিতা, পিতামহ, প্রপিতা মহ, বৃদ্ধ প্রপিতা মহ, মাতা, পিতামহী, প্রপিতামহী, বৃদ্ধ- প্রপিতামহী বারো মামাকলকেইর বারাদেউ মাতা মহী, প্রমাতামহী, বৃদ্ধপ্রমাতামহী) এসাদে করে হাতপুরেল ডাহিয়া মন্ত্র সলকরে সলকরে পিতৃতর্পন করানির বিধান আছে।

তা থকয়া এরে পিতৃলোকর উদ্দেশ্যে তর্পন করানি এহান গজর ইকরা পক্ষকালর ভিতরেদে পালন করানি থক, নিয়ামবলী পালনর গুরুত্ব থাংনাত সাতকরানি অইল।

পিতৃ তর্পনর মাহাত্ম্য :— মহালয়ার পক্ষকালর ভিতরে পিতৃলোকরকা বুলিয়া তর্পন করানির মাহাত্ম্য নিয়ামপারা। পিতৃতর্পন বুলতে- সাধারণতঃ শ্রাদ্ধ কর্মাদিতে- পিণ্ডদান করানির থাংনাত তর্পন করতারা। বারো প্রত্যেক অমাবস্যা তিথিরমাউ মৃত মালক, বাপক, বপাবপিরকা বুলিয়াউ তর্পন করানি অর। কিন্তু উতারমাউ মহালয়ার পক্ষকাল উহানাৎ অর্থাৎ ভাদ্র-আশ্বিন মাহার পূর্ণিমার প্রতিপদ তিথিত্ত চিনকরে অমাবস্যা বা মহালয়া পেয়া পিতৃতর্পন বিধান অনুযায়ী করানির মাহাত্ম্য আছে। (১) কিংবদন্তী ইতিহাস বা জনশ্রুতিমতে হারপেয়ারতাই যে পিতৃলোক বা পূর্বাপুরুষ মৃত এতা দ্যৌ বুলিয়া নিংকরানি অর। তা থকয়া এরে পিতৃলোক বা পূর্বাপুরুষ মৃত এতা মহালয়ার পক্ষকাল ব্যাপী-স্বর্গর দ্যৌরাজা (দেবরাজ) ইন্দ্ররাংতো য্যাথাং লয়া ১৫ দিনরকা বুলিয়া ছুটি নিয়া মালেমরমা আইতারা একমাত্র ঔ মৃত পিতৃলোক দ্যৌ উতা নিজর নিজর জ্ঞাতি গোষ্ঠীর উত্তরসূরীরাংতো তর্পন কাতকরানির (ভোগ্য) সামগ্রী বা বস্তু উতা (যেমন - চউল, কলা, তিল, দুব্গাছ, ফুল ইত্যাদি) লদিয়া আত্মতৃপ্তি পেইতারা। (২) আত্মতৃপ্তি পানার থাংনাত ঔ মৃত পিতৃলোক দ্যৌ উতায় বর দিতারা যে তানুর দারা-সেস্তাল ছৌ হুমারা নুরারা-পানি নায়া পুষ্টি পালয়া থাকা বুলিয়া।

(৩) পিতৃলোকে বর-দিলে কোন কোন সময় দারা-সেস্তাল বা ছৌ-ছুমারা নাইতারা ও গিরিগিথানী উতার মনোবাসনা উতাউ পরিপূর্ণ অর বুলিয়া লোক-বিশ্বাস আছে। হুতুমেউ আমারতা বিশ্বাস জবর বুলিয়া এমন কি মৃত্যু উতায় হউপনেদে পেয়া দেখয়েইতারা। পিতৃপক্ষর ভিতরে তর্পনর (ভোগ্য) সামগ্রী এতা পানার খৌরাং টাটিলো পূর্বাপুরুষ-বেয়াপা মৃত্যু এতা হাগহানাং, নাইলে পানিত, নাইলে বৌহানর লগে, নাইলে গাছ-বিরুদর পাতাত বা ডেঙে কায়া ভর করিয়া বাছেয়া থাইতারা যে কুস্বাকা আমার দারা-সেস্তাল জিয়া-জিপুত-বা বংশাবলী এতায় জল- পিণ্ড দান হিসাবে তর্পন দিতায় বুলিয়া। যেহানরে শাস্ত্রে-মাতের—“ আকাশস্ত নিরালম্ব, বায়ুর্ভূত নিরাশ্রয়ঃ যথা”... ইত্যাদি। এহান অতি লু কথাহান বারো এহানর তাৎপর্য অতি গভীর আছে। যদি কোন গিরক বা গিথানক আগয় এহানরে ঠাচা না করতারা বা পিতৃ-তর্পন পালনর মাহাত্ম্য এহান অবজ্ঞা করতারা, তাইলে পিতৃলোক উতা মনে হীনপেইতারা বারো জিয়া-জিপুত উতার প্রতি দুঃখ অয়া যিতারাগা বুলিয়া কিংবদন্তী য়ারী আছে, ফলে পরিণামে কষ্টভোগ করতারা— এহানাত শ্বৈর্নেই। এসাদে করে স্বর্গন্তপুর্নি মালেমে আইতারা পিতৃলোক এতা ১৫ দিন থায়া মহালয়ার দিন উহান বেলুকা মালেমেস্ত বিদায় নিয়া আলথক স্বর্গরমা যিতারাগা। এমন কি হউপন পেয়া দেখতারা বুলিয়া অনেক গিরিগিথানীর শ্রী মুখেস্ত হুনিয়ার। হয়ত বৈজ্ঞানিক চিন্তাধারালো এহানরে ঘুমজানির পিসেদে অবচেতন মনর মানসিক প্রতিফলন বুলতে পারে। কিন্তু প্রাচ্য বারো পাশ্চাত্য জ্যোতির্বিদ হাবিহানে এরে পিতৃ তর্পনর মাহাত্ম্য স্বীকার করেছি বারো এহানর মাহাত্ম্য জবর বুলিয়া গুরুত্ব দেছি।

যেতাউ অক্ এরে পিতৃ-পক্ষর তর্পনর সময়ত যেতা তর্পন করতারা গিরিগিথানীর উতায় নিরামিষ ভোজন করলে হবা। বারো এরে পিতৃপক্ষর সময় এহানাং গাং-পরগণা তিলয়া পিতৃ লোকর উদ্দেশ্যে “ দিবস-উৎসব” করতারা অনেক গিরিগিথানীয়ে। এহান আমার সমাজর ডাঙর বৈশিষ্ট্য আহান। যেতায় দিবস করতারা, ঔতায় আগেকার দিনে ভোজন করানির বার্তন দিতারা। বারো ঔ দিবসর আরাক মাহাত্ম্য আহান অইলতায়— দিবস-করানির আগেকার রাতি উহান ডিলয়া মানু কিতা ঘুমজিয়া ইনচিক্ চিকইলে ঔপেইত পিতৃলোকর উদ্দেশ্যে মৃত্যু পূর্বাপুরুষ বেয়াপা-গিরিগিথানীয়ে হাতপুৱেল ডাহিয়া এইরা-পানা ধূপ-বর্তি লাগেয়া বার্তন দিয়া আবাহন করতারা। বার্তনর নিয়ম অনুযায়ী এইরা পানা মিলেয়া ৭ তাংখা, কোন কোন ফামে ১৪ তাংখা পেয়া দিতারা। ঔহানর তাৎপর্যহান অইলতায়— পয়লা হাত তাংখার ব্যাপারে তিন পুৱেলর তিন তাংখা, বারো আরাক চারি তাংখা অইলতায়- ব্রহ্মার আকতাংখা, গঙ্গার আকতাংখা, লক্ষ্মী বারো কুবেরর দ্বি-তাংখা। বারো ১৪ তাংখার ক্ষেত্রে সাত পুৱেলর সাত তাংখা বারো বাকী উতা ব্রহ্মা, কুবের, লক্ষ্মী, গঙ্গা— এসাদে করে দিতারা। বারো জিয়া-জিপুত নাপাছে বুলিয়া কুরুকুলর ক্ষত্রিয় শ্রেষ্ঠ ভীষ্মদেবরে তঙাল করে আরাক তাংখা আহান এইরা পানা দিয়া আবাহন করানি লাগের। তানু হাবিরে ভক্তি কাতকরিয়া পিছেকার দিনে “দিবস-উৎসব” করতারা। এহান আমার সমাজে ডাঙর উৎসব আহান। বারো কৃষ্টিকলার ঐতিহ্যর ডাঙর দিক আহান, এহানাত কোন সন্দয় নেই।

তা থকয়া-পিতৃপক্ষরমা তর্পনৰ বাঢ়ি নিয়ম থানি থাংনাত হাজানি অইল—

১) বিয়ানে হিনেয়া- গৌড়ীয়া আচাৰ-নিয়মলো (অৰ্থাৎ মারকিন ফুতিৰ খুণ্ডেই বা নুৰা খুণ্ডেই, নামসা, নিকুন-কাঠি ইত্যাদিৰ ব্যবহার) পছরি বা ঘাটে বা ছড়াহানাত গিয়া সূৰ্যদেব গিরকরে মুঙেদে হমা দিয়া পানিহান ছকয়া (ঘাট, পছরি বা ছড়া নেইঅইলে, ডাঙৰ গামলা আগত পানি বুঝিয়া) মন্ত্ৰহান সলকরিয়া গারিগো সেঙকরিয়া মাতানি লাগের—

“ওঁ গঙ্গেশ্চ যমুনাঐষ্ব, গোদাবরী, স্বরস্বতী, নৰ্মদে সিদ্ধুঃ কাবেরী জলেশ্বিন সন্নিধিংকুরু”। উতার থাংনাত গায়ত্ৰী মন্ত্ৰ উচ্চারণ করিয়া তর্পন- বিধি পালন করানি অর।

২) তর্পন অকরানির ঠিক আগ মুহূর্তে ভারতৰ ঘাট বা ছড়া এতা হাবিৰ সমন্বয় তীর্থস্থান চিহ্নিত করিয়া মন্ত্ৰ সলকরিয়া আবাহন করানি লাগের—

“ওঁ কুরুক্ষেত্রে গয়া গঙ্গা প্রভাস পুষ্করানিচ।

পুণ্যানি এতানি তীর্থানি তর্পন কালে ভবন্তিহ।।

রাধাকুণ্ড, শ্যামকুণ্ড পাবনাখ্য সরোবর।

তর্পন কালে ইহা গচ্ছ মানস-জাহ্নবী তথা”।।

এসাদে করে মন্ত্ৰ এতা সলকরিয়া পূর্বাভিমুখী বারো থাংনাত উত্তর মৈকেয় অয়া পিতৃকুলৰ-মাতৃকুলৰ উদ্দেশ্যে তর্পন করানি অর। তর্পনৰ জিনিষৰমা চউল, কলা, তিল, ফুল দুক্গাছ বু কারিয়া বারো লগে তুলসীৰ পাতা য়ৌকরিয়া তর্পন করানি লাগের। তর্পন করানি এহান আমারতা সাধারণতঃ বামুন পুরোহিতৰেলো করতারা। কিন্তু পারদপক্ষে নিজে তর্পন করলে হবা। তবে মহালয়ার দিনে বামুন-পুরোহিতৰেলো তর্পন করতারা।

৩) যেতাউ অক— তর্পনৰ বিধি-অনুসারে তীর্থ-চিহ্নিত ঘাট-এতা আবাহন করানিৰ থাংনাত ব্রহ্মা, বিষ্ণু, রুদ্র বারো প্রজাপতি আদি দ্যৌ এতার উদ্দেশ্যে মন্ত্ৰ সলকরিয়া তর্পন করানি লাগের।

৪) উতার থাংনাত- আরাকৌ দ্যৌলিশিং-দ্যৌলাশা যেমন-যক্ষ, কিন্নর, গন্ধৰ্ব, নাগ দেবতা, অঙ্গরা, অসুর, সুপৰ্ন (গড়ুর সাদনে পাহিয়া) এতা হাবি ডাহিয়া মন্ত্ৰ সলকরিয়া তর্পন করানি লাগের।

৫) উতার থাংনাত সামবেদৰ রীতি অনুসারে মনুষ্য তর্পন করানি লাগের। যেমন—“ওঁ সনকশ্চ, সনন্দশ্চ, তৃতীয়াশ্চ সনাতনঃ” ইত্যাদি।

৬) উতার থাংনাত মুনি-ঋষিৰে ডাহিয়া তর্পন করানি লাগের। যেমন— “ওঁ মরীচিস্তৃপত্যাং...” ইত্যাদি। অৰ্থাৎ— মরীচি মুনি, ভৃগুমুনি, অঙ্গিরস, পুলস্ত্য, ক্রতু, বশিষ্ঠ বারো নারদমুনি এতারে আবাহন করিয়া তর্পন করানি থক।

৭) উতার থাংনাত যম তর্পন, যেমন— “ওঁ যমায়, ধর্মরাজায়, মৃত্যবে, চান্তকায়শ্চ.... চিত্রগুণ্ডায় বৈ নমঃ”।

৮) উতার পিছেদে কুরুকুলৰ শ্রেষ্ঠ চূড়ামণি জিয়া-জিপুত নাপাছে বৰ্ণ শ্রেষ্ঠ ভীষ্মদেবৰ তর্পন করানি লাগের, যেমন— “ওঁ বৈয়াত্ৰ পদ্যগোত্ৰায় সাংস্কৃতি প্রবরায়শ্চ। অপুত্ৰায় দদ্যামএতং সলিলং ভীষ্ম বৰ্মণে”।।

৯) এফিরতে পিতৃতর্পন অকরানি— তিথি অনুযায়ী “ওঁ ভাদ্রমাসে কৃষ্ণ পক্ষে অমুকবাসরে (দিনহান) অমুক তিথি (তিথিহান) অমুক গোত্রস্য গোত্রর অমুক দেববর্মন (নাংহান) বামুন অইলে (দেবশর্মণঃ) বুলিয়া তর্পন করানি লাগের। সাতপুরেলর আপাবপার নাং (মালক-বাপক উভয় পক্ষ), বারো নুরারলে কমেই তিন- পুরেল নাং ডাহিয়া মন্ত্র সলকরিয়া তর্পন করানি লাগের।

১০) পিতৃ-মাতৃ কুলর তরপনর থাংনাত অগ্নি দেবর তর্পন, ঔতার থাংনাত মৃত্যু মারূপ-মাসাঙর তর্পন করানি থক্। যেমন— অগ্নিদেবর ক্ষেত্রে—

“ওঁ অগ্নিদদ্ধাশ্চ মে জীবাঃ যাস্তু পরাং গতিং।

বারো মারূপ— মাসাঙর ক্ষেত্রে—

“ওঁ আবদ্ধবা বান্ধবা... চাস্মন্তোয়কাজ্জিনঃ”।

১১) ঔতার থাংনাত রাম তর্পন করানি থক্। যেমন—

“ওঁ আব্রহ্মভুবনাল্লোকাঃ দেবর্ষি পিতৃ-মানবাঃ

...ময়া দত্তেনতোয়েন তৃপ্যন্তু ভুবনএয়ম”।

১২) ঔতার থাংনাত লক্ষ্মণ তর্পন পানি করৌ আহানলো করানি থক্। যেমন— “ওঁ আব্রহ্মস্তুত্বপর্যন্তং জগৎ তৃপ্যতু”।

১৩) এফিরতে জিয়া জিপুত নাপেয়া দ্যৌর খয়া পাছি মৃত্যু ঔতার প্রতি মন্ত্র সলকরিয়া তর্পন করানি থক্। যেমন—

“ওঁ যে চাস্মাকং কুলে জাতা অপুত্রাগোত্রিণঃ মৃত্যুঃ।

তে তৃপ্যন্তু ময়া দত্তং বস্ত্র নিস্পীড়নোদকম্।”

এসাদে করে হাবি তর্পনর নিয়ম নীতি এতা লমকরিয়া থাংনাত সেঙকরে হিনেয়া পিতৃস্তুতি বারো মাতৃস্তুতি করানি থক্। পিতৃস্তুতি যেমন— “ওঁ পিতা স্বর্গঃ, পিতা ধর্মঃ, পিতাহি পরমং তপঃ। পিতরি প্রীতিমা পশ্নে প্রীয়ন্তে সর্বদেবতাঃ”। মাতৃস্তুতি যেমন— “ওঁ জননী জন্মভূমিচ্চ স্বর্গাদপি গরীয়সী”।

এসাদে করে হিনেয়া সূর্যদেবরে ভক্তি করিয়া ঘরে আলথক আনা।

খামতলহান :- তর্পন বিধি বিধানাবলী আলোচনার থাংনাত এহান মাতানি মনাউরিতাই যে তর্পনর করন কিতা এতা নব প্রজন্মরকা অতি গুরু দায়িত্বহান। মহালয়ার শেষ লগ্ন পেয়া বাছেয়া তর্পনর ভোগ্যবস্তু এতা গ্রহণ করিয়া আত্মতৃপ্তি অয়া পূর্বাপুরুষ দ্যৌ অছি মৃত্যু এতা জিয়া জিপুতরে বর দিয়া আলথক স্বর্গরমা নিজ নিজ ধামে যিতারাগা বুলিয়া লোকপ্রবাদ আছে। তা থকয়া আমারতা এরে তর্পনর নিয়ম কানুনলো পালন করানি থক, যেহান জাতীয় কৃষ্টিকলা বারো ঐতিহ্যর দিক আহান।

(প্রবন্ধ এহান প্রকাশিত বাংলায় নববার্তা পত্রিকা ২০০৯, কাকেই পত্রিকা ২০০৯ ইং, নুয়া এলা ২০১০ ইং।) □

কানাইর ইমফামর ঐতিহাসিক গুরুত্ব

কানাই প্রভুর ইমফাম সম্পর্কে ইতিহাস হারপানি খানি চিলছে। যেতা যেতা তথ্য পুলকরানি আছে, ওতা থাংনাত সাতকরানি অইল।

কানাই প্রভু অইলতায় অভিষেক করানি আছে হিলর মূর্তি আগো। ও মূর্তি উগোর প্রতিষ্ঠাতা অইলতায় ঠাকুর ফকির বুলিয়া বামুন আগো। ওগোর বাট্টি পরিচয়হান অইলতায় ঠাকুর ফকির সিলেটর করিমগঞ্জর বাঙালী বামুনগো। হাবিহানে তারে “ঠাকুর” বুলিয়া মাতেছিল। বারো মুসলমান বেইবুনিয়ৈ তারে “ফকির” বুলিয়া মাতেছিল। ওহানলো তার সংক্ষিপ্ত পরিচয়হান “ঠাকুর ফকির”।

জনশ্রুতি মতে হারপেয়ারতাই কানাই প্রভুর কাদাত পছরি আগো আছে। ও পছরি ওগো আগোদে (আনুমানিক ৫০০ বছরর গজে) লঙ্গৈই ঘাটহানর ডঙরগো আছিল। ও সময়উহান সুলতানী আমল বারো মুঘল বংশর রাজত্বর সময়হান। ও সময়ত শ্রীহট্ট বা শ্রীভূমি এলাকার উজানেদে পেয়া (এবাকার করিমগঞ্জ বারো কানাই প্রভুর ইমফামহানসহ প্রতাপগড় পেয়া) বঙ্গদেশর নবাবর করদ রাজ্যহান অয়া আছিল।

ঠাকুর ফকির বামুন এগো যেবাকা ওরে ডঙর উগোত হিনানিরকা ল্বু হানাত লামতেগা কিগো আগো যাংহানাত থেঙইল, ওপেইত ঠাকুর বামুন এগো সন্দয় করিয়া বুরদিয়া আতহানলো তুলিয়া দেহেরতায় বিগ্রহ শিলামূর্তি আগো, নমুনাহান ভগবান শ্রীকৃষ্ণর ত্রিভঙ্গ ভঙ্গীমা রূপহান। ও মূর্তি উগো কাদাবারার মানু হাবিয়ে ডরপেয়া যতন করিয়া থাছিল। কিন্তুমান আচানকহান অইলতায়— যেবাকা দিনর বেলা ঠাকুর ফকির গিরকে ডঙরগোত ও মূর্তি উগো নিকালাছিল, ও রাতিউহান হউপনেদে মহাপ্রভু গিরকে ওরে শিলা মূর্তি উগো অভিষেক করানিরকা ঠাকুর ফকির গিরকরাং মাতল। থাংনাকার দিনে লগে লগে ঢাক, মাংকাং, সেলপুঙ, মইপুং কিতা রহেয়া হাবিহানে ও শিলামূর্তি উগো কাদার অশ্বথ গাছজারর (কদমজারর) গুরিত অভিষেক করিয়া থাছিল।

আরাক আকসাদে য্যারীখানি হারপেয়ারতায়, কানাই প্রভুর পছরিগো খুলানির সময়ত কোন পানি নেই। ফলে পানি পানার সালেদে আরাকৌ ‘ল্বু’ করে খুলতেগা বিগ্রহ শিলা মূর্তিগোর গজে ছেদহান পড়ানির লগে লগে রকতর ছতগো জবর আছে, পিছেদে পানি নিকুলানি অকরেছিল। ও রাতি উহান মহাপ্রভু গিরকে হউপনেদে ও বিগ্রহ শিলামূর্তি উগো অভিষেক করানিরকা দেহাছিল। ফলে ওরে সময়র মানু হাবিহানে তিলয়া কানাই প্রভু গিরকরে অভিষেক করেছিল।

গজর ইকরা য্যারী এতা অতীতর ইতিহাস। ওতার লগে আরাক তথ্যখানি থাংনাত লেংকরানি আছে।

কানাইপ্রভুর মাটিহান (যেপেইত অভিষেক করেছিল ফাম উহান সহ ইমফামহান) দান করেছিল গিরক উগো অইলতায়- বাদশাহ আলী আহমদ চৌধুরী বুলিয়া জমিদার আগো। তার রাজ্যসীমা অইলতায় দক্ষিণে জফরগড় (এবাকার বারৈগ্রাম) বারো পশ্চিমে প্রতাপগড় পেয়া প্রায় সাড়ে তের হাল জাগাহান।

যেতাউ অক, এতাহাবি যদিও কাল্পনিক য়ারী, তেবউ কানাই প্রভুর ইমফামহানর যথেষ্ট ঐতিহাসিক গুরুত্ব আছে। কিয়া বুললেতে যতই দিন লালয়া যারগা, ততই মানুর মনে সন্দয় দেহা দেনায় কানাই প্রভুর মন্দির, আখড়া বা মালঠেপ এতা হংকরানি অকরলা। কদম গাছ জারর কাদাত মন্দিরশৌ আগ হংকরিয়া আপাততঃ কানাই প্রভুর মূর্তিগো বারো লগে পুরীধামেত্ত বারো রাধাকুণ্ডধামেত্ত রাধাকৃষ্ণর মূর্তি বারো জগন্নাথ প্রভুর মূর্তি প্রতিষ্ঠিত অছিল।

কানাই প্রভুর আখড়ার চারিবেদে বৈষ্ণব মানু গাঙ পালয়া আছি ঔতারমা বিশেষ করিয়া বিষ্ণুপ্রিয়া মণিপুরী মানুর সংখ্যা কানাই প্রভুর কাদাত আছি। প্রায় উন্নিশ শতকর হমবুকুত্ত ঘর পালয়া আছি বুলিয়া অনুমান। কানাই প্রভুর নাংহানলো গাঙহানর নাংহান কানাই। উন্নিশ শতকর আগে অর্থাৎ ঠাকুর ফকিরর পরে আর কোন সেবাইত বা পূজারী আছিল। বুলিয়া সঠিক প্রমাণ নাপেয়ার। ঔহান উদাসী আশ্রমহান আছিল।

কিন্তু পিছেদে তথ্যর নিদর্শনলো হারপেয়ারতায়— ১৮১৫ সালে কানাই প্রভুর সেবাইত বা পূজারীগো— শিষ্যানুক্রমে আছিলতায়— বালকদাস পূজারী বুলিয়া বামুন আগো। ঔগোর থাংনাত শ্রী রামকৃষ্ণ পূজারী— সেবাইতগো। ঔতার থাংনাত শ্রী গৌরচরণ মহন্ত বারো শ্রী গুরুচরণ মহন্ত। এসাদে করে এবাকার কানাই প্রভুর পূজারী বা সেবাইতগো অছেতায় শ্রীশ্রীকৃষ্ণপদ গোস্বামী মহন্ত গিরক লগে তার শিষ্য বারো সেবাদাসী আগ। এরে গিরক এগোর পরিচালনাত এবাকা কানাই প্রভুর আখড়াহান চলের। কানাই প্রভুর ইমফামে ক্ষেতি বারি খানি চলের বারো ভক্তবৃন্দর সাহায্য কিতালো আশ্রমহান মোটামোটি চলের। বারো কানাই প্রভুর নাঙে বাজার আহান কানাই বাজার বুলিয়া আছে। বারো কানাই প্রভুর আখড়ারমা আমার মানুর ভূমিকা জবর। আরতি করিয়া বারো জয়দেবর এলা দিয়া কাং আছুলতারা বারো রাতি জাগরণ করিয়া বাসক, খুপাখুচেই কিতা দিতারা। এলা দিয়া হাবি বিভোর অয়া কাদতারা। হুত্তমেউ মাত্তে গেলেগা ঔদিন উহানী পুরীধামর জগন্নাথ মহাপ্রভুর মেলাহানর সাদনে মালর। ঔপেইত কবির বাণী উতা মনে পড়ের— “রথযাত্রা, লোকারণ্য, মহাধুমধাম। ভক্তেরা লুটায় পথে করিছে প্রণাম।।” ঔ কানাইর কাঙর সময় উহানাত মনে অরতায়, কানাই প্রভু যদিও অতীতর বিগ্রহ শিলা মূর্তি আগো, তেবউ হিন্দু মানুর পবিত্র তীর্থস্থানহান। ঔ রথরসময়ত আমার বিষ্ণুপ্রিয়া মণিপুরী বেয়াপা ইমা ইন্দলে এলা দিয়া—

“পার কর জগবন্ধু, পার, কর মোরে,
অধম জানি নৌকা প্রভু লইয়া যাহ মোরে।”

গেলগা মারি কানাইর কাণ্ডে গিয়া এসাদে এলা হুনিয়া বিভূলা অয়া আছু ঔপেইত মুসলমান বেয়ক আগোয় মোরে মাতল “বাবু, এই কানাইর মাটিটা আমরার একজন বাদশাই দিয়া দিছে। এখন আমরার কত আরাম অইছে”। পিছেদে আংকরলু, “কে সেই বাদশাহ” মুসলমান বেয়ক ঔগোয় মাতল, ‘কইতাম পারতাম নাই’। ঔ মুসলমান বেয়ক ঔগো যানার খানি পিছেদে আরাক বাঙালী কৈবর্ত বেয়ক আগোয় আয়া মাতল, ‘বাবু। এইটার মালিক অইল, আমাগো সিলেটর মানুষ’। লগে লগে মি কবির বাণী নিংশিঙ অইলু—

“রথ বলে আমি দেব, পথ বলে আমি

মূর্তি বলে আমি দেব, হাসে অন্তর্যামী”

খানি পিছেদে মোরতা হুস্হান হমেইল— যদি পরম করুণাময় সৃষ্টিকর্তার কৃপা নাথাইলইসতে, ঔরে দয়াবান বাদশাহ আলী আহমদ চৌধুরী গিরকে কানাই প্রভুর মাটিহান (কানাইর ইমফাম) দান নাকরলয়স। অবশ্য এহানাত তনুবাৰু সিংহ গিরকরতাউ অনেক অবদান আছে। এরে গুরুত্ব এহানেই কানাই প্রভুর ইমফামর ঐতিহাসিক গুরুত্বহান, যেহান রথর সময়ত ভক্ত বৃন্দ হাবিহানে এলা দিয়া মাত্তারা—

“পার কর দীননাথ, পার কর দয়াময়।

জগবন্ধুর দরশনে মন রথে চলিয়া যায়।”

(প্রবন্ধ এহান বাংলাত প্রকাশিত ‘অগ্নিবান’ পত্রিকা, করিমগঞ্জ ১৯৯০ ইংরাজী বারো আমারঠারে ফাগু পত্রিকা ১৯৯০ ইংরাজী)। □

বিষু বা লামর দ্যৌ (চেরউ)

১) অকরাগ—বিষু বা লামর দ্যৌ বুলতে পয়লাই হারপেয়ারতাই পুরানা বছর সেচিয়া যানা বারো নুৰা বছর সিলকরিয়া কাকেই কারানির খেলতামহানর নাং লামর দ্যৌ বা বিষু বা চেরউ। বারো আরাক য়ারী আহান অইলতায়— আমার মানুয়ে লামর দ্যৌ এহানরে চেরউ বুলিয়াউ মাত্তারা। কারণহান কিহান? লামর দ্যৌর গুরুত্ব বা তাৎপর্য কিহান? গতিকেই আমার সমাজরকা এরে লামর দ্যৌ বা চেরউ এহান ডাঙর রুহিবৃত্তি বা কৃষ্টি আহান হিসাবে পরিচিতি লাভ করেছে, এতা য়ারী খানি সামকরিয়া থাংনাত সিজিল করানি আছে, কোন কিছুর লেইলেক অইলে ইকরিয়া সুপরামর্শ দেনারকা পাঠক-পাঠিকারাং হেইচা থাইল।

২) লামর দ্যৌর ব্যাখ্যা (তাৎপর্য, গুরুত্ব বা বিশেষত্ব) :— ভূতত্ত্ববিদ বারো জ্যোতির্বিজ্ঞানীর চিন্তাধারা মতে বিষুর তাৎপর্যহান অছেতায় সমগ্র পৃথিবী বা বিশ্বব্রহ্মাণ্ড এগো গোলাকৃতিগো বা গোলাকার রূপ আহান। এরে গোলার্ধ পৃথিবী এগর লগে ঋতু পরিবর্তনর সম্পর্ক আছে। দ্বি মাহার ঋতু আকেইহান করিয়া ছয়ঋতুর বারমাসে বছরহান বুলিয়া হারপাছি। মাহার লগে ঋতুর সম্পর্ক আছে বুলিয়া বছর লমনির দ্বিযো মাহারে বসন্ত ঋতু বলতারা বারো ঋরহান লময়া গরমর সময়হান গুজরানি অকরের। ভূ-বিজ্ঞানীর মতেই বিষুবরেখাহানর দক্ষিণ গোলার্ধদ্বপুৰি উত্তর গোলার্ধে পৃথিবীর অবস্থান। ফলে সময়হান মহাবিষুব সংক্রান্তি বুলতারা। জ্যোতির্বিজ্ঞানীর মতে ঋতু পরিবর্তনর লগে গ্রহ-নক্ষত্রর সম্পর্ক আছে। ঔ কারণে দ্যৌর নিঙে নুৱারা পানি নায়া হবায়া থানারকা বুলিয়া বছর সিলকরানির পরে দিন, তিথি চেয়া গ্রহ-নক্ষত্রর পূজার কাম কিতা করতারা। এহানর বিশেষ তাৎপর্য আছে। তা থকয়া এরে নুৱা বছরর কাকেই কারানির খেলতাম এহানরে মহাবিষুব সংক্রান্তি বুলতারা বারো আমার পূৰ্বাপুরুষরাংতো চিনকরে বেয়াপায় হো-থাইনাকার মণিপুররমা বন-জঙ্গল-কাটা সেংকরিয়া লাম খুলিয়া রাজা পালয়া রাজত্ব করেছিল। প্রমাণ- ক্ষুমল, মৈরাঙ, আঙম বারো লোয়াং গোষ্ঠীর মানু।

ইতিহাস পর্যালোচনা করলে হারপেয়ারতাই মণিপুর লাম এহানরমা আর্য-ক্ষত্রিয় মানু বসতি করানির আগেত্বই আদিম যুগরমা দ্রাবিড় বা অনার্য জাতর মানু কিরাত বা শিকারী এতায় তিব্বত টেঙারাত্তো আয়া মণিপুর ফামে লাম খুলিয়া হমাছিহা। তানুর উপাসক দ্যৌগ মহাদেব গিরক বুলিয়া হারপেয়ার। ঔ সময়রমা মণিপুর এহান নিঘোর বনজঙ্গল আছিল। গতিকেই ঔ মহাদেব গিরক মণিপুর লাম-এহানরমা জাত-জাতর ফুল সাতছে হবাহান দেহিয়া মণিপুর লাম এহানরে “অরণ্য-নগর” নাংহান দিয়া দুর্গা ইমারে মণিপুররমা বিরাজ করিয়া খেলা লীলা করানির কথা মাতেছিল।— এহানর প্রমাণ ‘ধরণী সংহিতা’রমা পেয়ার—

“অরণ্য-শোভনং দৃষ্টা বিবিধ কুসুম যুক্তং।

শংকরেণ নিরুন্ত্যন্তদরণ্য নগরং নৃপঃ” ॥ ১

গতিকেই মহাদেব গিরকর লামহান তিব্বতৰ কৈলাশ টেঙাৰাগো। ঔ কৈলাশ টেঙাৰাত্ত
মণিপুৰৰ জাত জাত ফুল সাতছে হবাহান দেহিয়া দুৰ্গা ইমারেলো আয়া মণিপুৰৰ লামৰমা
আয়া বিৰাজ কৰিয়া খেলা লীলা কৰেছে বুলিয়া অৰণ্যনগৰ নাংহান থদেছে বুলিয়া হাৰপেয়াৰ।

যেতাউ অক-এতা হাবিৰ থাংনাত আৰ্য-ক্ষত্ৰিয় মানু বসতি বিস্তাৰ কৰানিৰ হাকতাকে
মণিপুৰ লামৰমা গাছ-বিৰুক, হিলৰ লুমপাক, বারো ঘাট-ছড়া, খং-বিল, সুরুঙ এতাৰেউ
অনন্ত নাগ বা সৰ্পদেবতা বারো হিলৰ লুমপাক এতাৰে মহাদেব সাকয়া আছে নিঙে, ঘাট-ছড়া
এতাৰে গঙ্গা ইমাৰ নিঙে, খং-বিল-সুরুঙ উতাৰে পাহাংপা (পাখাংবা) নিঙে বৈদিক রীতি
নীতিলো পূজাৰ প্রচলন কৰেছি। ঔতাৰ লগে থাইনাকার মণিপুৰৰমা অগ্নিপূজা বা জ্বিৰ দ্যৌগ
হিসাবে বারো সূৰ্যদেব গিরকৰে বেলি রাজা নিঙে পূজাৰ প্রচলন কৰেছি। ঘৰে ঘৰে আমাৰতা
আজি উদালহান বা ফুংকাহান বুলিয়া মাতিয়াৰ, এহানউ ঔবাকার অগ্নিপূজাৰ যজ্ঞগো বা
অগ্নিকুণ্ডগো হিসাবে ব্যবহার কৰেছিলা বুলিয়া অনুমান কৰে পাৰিয়াৰ। বারহ যেহেতু আৰ্য-
ক্ষত্ৰিয় গোষ্ঠী দাপা দাপা মহাভাৰতৰ যুগেন্ত পুৰি আয়া মণিপুৰৰমা হমাছিহা, তা থকয়া বিষ্ণুমূৰ্তি
পূজাৰ প্রচলন এহানউ থাইনাকার মণিপুৰৰমা প্রমাণ পেয়াৰ। লগে মহাদেব-দুৰ্গাৰ স্থিতি
অনুযায়ী শিব দুৰ্গামূৰ্তি পূজা বারো বিষ্ণুপূজাৰ প্রচলন আৰ্য সভ্যতাৰ ধাৰক-বাহক হিসাবে
মণিপুৰে মহাভাৰতৰ যুগেন্ত পুৰি প্রচলিত এহান সম্পৰ্কে বিখ্যাত ঐতিহাসিক R.M. Nath
গিরকৰ মন্তব্য আহান থাংনাং ফংকরানি অইল—— " A copper plate of king
khongtekcha dated 721 saka (799 A.D.) written in Archaic Manipuri script
starts with salutation to God 'Hari' and inculcates the worship of Siva and
Durga for wordly gains. Full Brahmanical influence prevailed and the
prevalent faiths in the neighbouring kingdom of Kamrupa, where an image
of Vishnu had been installed at Barganga, at the foot of the Mikir Hills
and images of Durga, Siva and Vishnu were being worshipped at Deopani
at the foot of the Naga Hills crept in over the bordering hills along with
the Kamrupi army, whom the Manipuri king apparently requisitioned by
establishing an alliance with the powerful emperor of Kamrupa of the
Mlechha dynasty.

The Kamrupi soldiers settled in Manipur and mixing with the
Kalachais controlled the affairs of the state for several generations. Their
head quarters were at Vishnupur, so named after the tutelary deity Vishnu.
Their language developed into a mixed dialect seperate from that prevalent
in Manipur and they were designated by a seperate name Vishnu-Purias
(now Pronounced as Vishnupriyas), to distinguish them from the Meiteis

who came afterwards."2 অর্থাৎ- মণিপুররাজ খংটেকচার আমলে ৭৯৯ খৃঃ প্রত্নতত্ত্ব সম্পর্কিত মণিপুরী লিপিত লিখা আছেতায়— ভগবান 'হরি' বা প্রভুরে ভক্তি জানানি আছে বারো শিব-দুর্গার উপাসনার উল্লেখ আছে। আরাকৌ উবাকা মণিপুর লামে ব্রাহ্মণ্য ধর্মর প্রভাব পড়েছে, যেহান কাদার কামরূপ (আসাম) রাজ্যরমা পরিলক্ষিত আছে, ঔহানর প্রভাবে মিকির পাহাড়র পাদদেশ বারগঙ্গারমা অভিষেক করানি আছে বারো নাগাপাহাড়র পাদদেশ দেওপানিরমা, শিব-দুর্গা বারো বিষ্ণুমূর্তির পূজার প্রচলন লিপিবদ্ধ আছে। ফলে ঔবাকা মণিপুরর লগে কামরূপর গভীর বন্ধুত্ব থানার ফলে সুসম্পর্ক গড়িয়া উঠেছে। ঔবাকা মণিপুর বারো কামরূপ সম্পর্কর কেন্দ্রস্থল বিষ্ণুপুর। ফলে ঔ সময়র বিষ্ণুমূর্তির উপাসক মানু উতার টটরানির ভাষা উহান মণিপুরর বাসিন্দার কথ্যভাষা উহান বিষ্ণুর উপাসক মানু উতার ভাষাহানর লগে খানি তঙাল; যেহান সংস্কৃত ভাষায় সামঞ্জস্যপূর্ণ, ঔ ভাষা টটরতার মানু উতা তঙাল করে বিষ্ণুপরিয়া বুলিয়া পরিচয় দিতারা (বিষ্ণুপ্রিয়া), একমাত্র মৈতৈ ঠারেত্ত তঙাল করানিরকা, যে মৈতৈ ভাষাগোষ্ঠী পিছেদে আয়া মণিপুররমা হমাছিহা বুলিয়া ঐতিহাসিক R.M.Nath গিরকে উল্লেখ করেছে। এরে মন্তব্য এহান যথেষ্ট তাৎপর্যপূর্ণ; কারণ বিষ্ণুপ্রিয়া ভাষা গোষ্ঠী যে মণিপুর ইমালামর পুরানা বা আদি বাসিন্দা, এহান প্রমাণরকা উল্লেখ করানি অইল।

এসাদে করে হো থাইনাকার মণিপুররমা বৈদিক নিয়ম নীতিলো পূজা পার্বনর প্রস্তুতি চলহান অয়া আহের। যেহেতু মণিপুর ইমালাম এহান মুঙ ভারতর সেকপীলহান, তা থকয়া বেলিরাজা গিরকর মিঙালহানউ পয়লা বিয়ানকার সালফু সালফু অনার পিছেদে কৈলাস বা নোমাইচিং (রবিবার) বুলতারা টেঙারা উগত আয়া রঙখা রঙখা অয়া পড়ের বুলিয়া ঔ টেঙারা উগরে হাবিহানে হমাদিতারা বারো মণিপুরর পূর্বাপুরুষ গিরিগিথানী হাবিহানে চৈত্র সংক্রান্তির দিনে অর্থাৎ পুরানা বছর বিদায় লয়া নুয়া বছর ঔক্করানির খেলতামে লামর দ্যৌর ভেট কিতা দিয়া হমাদিতারা। ৩

ঠিক ঔসাদে ইমফলর ২৩ মাইল দক্ষিণে (৩৬কিমি) লাঙাখেল টেঙারাগোরমা বারো কাদার খঙজং ঘাটহানার কাদাত বা পারগত ভরদ্বাজ বারো কাশ্যপ গোত্রীয় বংশর মানুয়ে লামর দ্যৌ হমাদেছি। বিষ্ণুপুরর বিষ্ণুমন্দির বা রাজপ্রাসাদর কাদাত লকতাকর পারেদে মণিপুর লামে হো থাইনাকার বেয়াপায় লামর দ্যৌ হমাদেছি বুলিয়া জনশ্রুতি প্রচলিত। ৪ গতিকেই প্রকৃতি ইমার বুকগত টেঙারা সিংখেই সেংকরিয়া খং-বিল-ঘাট-ছড়া হং করিয়া গাং-লেইকীর মানু বসত বাড়ী করেছে। বুলিয়া ঔ লাম উহানর গিথানক উগরে লাম-লেইমা (Village-goddess) বুলিয়া ভেট কিতা দিয়া লামর দ্যৌ বুলিয়া হমাদেছি।

৩) লামর দ্যৌর দিনহান কিয়া চেরউর দিনহান বুলতারা। কারণহান অইলতায়— জনশ্রুতিমতে আগেকার বেয়াপায় বিশেষ করিয়া বর্মী যুদ্ধর হাকতাকে অরার ভাগনর পিছেদে মণিপুর

ইমালাম এরে দিয়া কাছাড়, ত্ৰিপুৰা, সিলেট, ভানুঘাট, আসাম এসাদে সিলনিৰ হাকতাকে জঙ্গল, কাটা সেংকৰিয়া লাম বুলিয়া বসতি অনাৰ থাংনাত বছৰ সিলকৰানিৰ খেলতামে অৰ্থাৎ চৈত্ৰ সংক্ৰান্তিৰ দিনে লামৰ দ্যৌ বিভিন্ন সামগ্ৰীলো পূজা দিয়া হমাদেছি, ঔবাকা পাহিয়া পলি, বিশেষ কৰিয়া চেরউ পাহিয়া এতা লামৰ দ্যৌৰ দূত বা সাক্ষী হিসাবে ঔ পূজাৰ খাদ্য সামগ্ৰী উতা খেইতারা উহান দেহিয়া এতা লামৰ দ্যৌৰ দূত বুলিয়া মনে কৰেছি। ঔ কাৰণে বিঘূৰ বা লামৰ দ্যৌৰ দিন এহানৰে চেরউৰ দিনহান বুলিয়া মাত্তারা। এহান লোক বিশ্বাস হান (Folk faith), এবাকা অবশ্য লামৰ দ্যৌৰ দিন এহানৰে চেরউৰ দিনহান বুলিয়া মাতানিৰ চলহান কমনি অকরল। অসমীয়া গিৰিগিথানীয়ে এহানৰে ভোগালী বিহু বুলতারা বারো বাঙালী সম্প্ৰদায়ে এহানৰে চৈত্ৰ সংক্ৰান্তি বুলতারা। তবে আমাৰতা নুৰা বছৰৰ পয়লাকাৰ দিন উহানাতউ অনেকে লামৰ দ্যৌ হমা দিতারা।

৪) লামৰ দ্যৌৰ উপকৰণ সামগ্ৰী :— লামৰ দ্যৌৰ উপকৰণ সামগ্ৰী হিসাবে হাৰপেয়াৰতাই— সাধাৰণতঃ ঘৰ-দোয়াৰ পৰিষ্কাৰ কৰিয়া কল খেড়ি-বাতৰাৰি দাৰেয়া নিৰামিষ পাকদ্ৰব্যলো রাধিয়া ঘৰৰ ভিটাগো লালয়া মুঙে পথগৰ তলে ফাম সেংকৰিয়া লেপিয়া হিনানিৰ থাংনাত শুদ্ধ পাতা-লাতল আগত ভাত, ডাইলৰ হৌ ইত্যাদি নিৰামিষ জাতীয় পাকদ্ৰব্য, কলা, সেলকম, ফলমূল, এইরা পানা তাংখা ধূপ বৰ্তি কিতা লাগেয়া পয়সা দিয়া লাম খুলিয়া দ্যৌৰ খয়া পাছি গিৰিগিথানীৰে দেবতাজ্ঞানে হমা ভক্তি কাতকৰিয়া ছৌ-ছুমাৰাত্তো চিনকৰে হাবি নুৱাৰাপানি নায়া হবাতালা অয়া থানা বারহ পুৰানা বছৰৰ কৌলিগালি কল্লিং কিতা কৰুৱিয়া নুয়া বছৰৰ খেলতামে আইতারা দ্যৌৰে হমা দেনা, তানুৰাং বৰ মাগানি যাতে— ঙ্কৰানিৰ নুয়া বছৰ এহানাং নুয়া উদ্যমলো কঠিন পথগৰ মোকাবিলা কৰে পাৰানি বারো নিজৰ বারো দেশৰ দশৰ উন্নতিৰ কাম কৰে পাৰানি।

এতাৰ লগে আৰাকৌ য়াৰী আহান অইলতায় আমাৰ বেয়াপা গিৰিগিথানীয়ে কৰিয়া গেছিগা ৰীতিহান অইলতায়—লামৰ দ্যৌৰ দিনে বার বাজিত ঘাট, ছড়া বা পহুৱিত হিনানিৰ ঠিক প্ৰাক মুহূৰ্তৰ উপেইত কলাপাতা টুকৰা আহানাং দলা ফুল কতগো চউল তিল কতগো পুলকৰিয়া মূৰগৰ গজে আহি জিপেয়া খুচেই কিতা পাত্ৰলো পানি ডালিয়া হিনানি বারো নিংকৰিয়া বৰ মাগিয়া হমাদেনা—যাতে নুয়া বছৰৰ খেলতামে আইতারা দ্যৌ এতায় বৰ দিতারা যে নুয়াৰা পানি নায়া হবায়া থানা।

লামৰ দ্যৌ হমাদেনাৰ উপকৰণ সামগ্ৰীৰ মাতুমে আৰাক বিশেষত্ব আহান অইলতায়—ইমা-ইন্দল বেয়াপায় লামৰ দ্যৌ হমাদেনাৰ দ্বি-আকদিন আগেত্ব পুৰি ঘৰ খুন্তিঙে চউল বা তাংখা লিকল চান্দা কৰিয়া পুলহাপে জমেয়া ঔৰে ধন সাম্পাল উতালো লামৰ দ্যৌ হমাদেনাৰ আগেকাৰ দিনে দ্যৌৰ মন্দিৰে বা লেইফামে লামৰ দ্যৌ হমাদেনাৰ মাতুমে খৰচ কিতা কৰিয়া কাতকৰতারা বারো লামৰ দ্যৌৰ দিনে বেয়াপা দুগ বারো বুজন আগো মেইপাগো হিসাবে

লগরগ অয়া গাং লেইকী সিদ্দালো বুলিয়া লপুকে লামর দৌরে ভেট দিয়া হমাদিয়া লামলৈমাং বর মাগতারা যাতে বিপদ-আপদ নুরা পানি নায়া থানা।

৫) ফামে ফামে লামর দৌ হমা দেনার নিয়ম নীতি :— খমকরা তথ্যমতে হারপেয়ারতাই যে লামর দৌ হমাদেনার নিয়মনীতি এতা হো থাইনাকার মণিপুৰেত্ত প্রচলন অয়া সিলছে। হয়তঃ ঔবাকার হমাদেনার নিয়মনীতি এবাকা খানি তঙাল অইতে পারে; কিন্তু উদ্দেশ্যহান আকহান। বিশেষ করিয়া মণিপুৰ ইমার লাম এরে দিয়া অরার ভাগনর হাকতাকে আমার মানু দাপা দাপা অয়া জিরিবাম অয়া আইতে পয়লাই জিরি নদীহান (ঘাটহান) ভেট কিতা দিয়া পূজা করিয়া লালয়া বৈরাক ঘাটহানাং ফলমূল এইপাত ধূপবর্তি কিতা দিয়া নুরা লামে যিয়ারগাতা বুলিয়া হমা দিয়া লালছি। এসাদে করে কাছাড়, হাইলাকান্দি, গড়েরবন, সিংলা, প্রতাপগড়, কলাসর, তাখেন, সিলেট, ভানুঘাট এসাদে ফামে ফামে সিলছি। কাটা, বন সেংকরিয়া লাম খুলিয়া বসতবাড়ী করেছি বুলিয়া নিজর গাং, লেইকী পরগণা উতার পয়লা লাম খুলিয়া পড়েছি উগই লাম উহানর গিরকউগরে দৌগ নিঙে বারহ লগে প্রকৃতি ইমার অঙ্গ হিসাবে লাম বা মাটি উহানর গিথানক উগ লামলৈইমা বা লাম গিথানক (Village goddess) দৌগ হিসাবে পরিগণিত আছে বুলিয়া উতারে লামর দৌ নিঙে পুরানা বছর সিলকরিয়া নুরা বছর ঙ্করানির খেলতামে পূজা করিয়া হমা দিতারা।

এসাদে করে মণিপুৰ লামে যেসাদে নঙাইখং, নাচৌ, খুনৌ, হেইরুক, লেইমাথল, ঙেইখং, লেইসাবিথল ইত্যাদি ফামে ফামে ঘাট, ছড়ার পার বা লপুকে বারো লকতাকর পারেদে বারো বিষ্ণুমন্দিরে লামর দৌর ভোগ দিয়া হমা দিতারা ঠিক ঔসাদে আমার বেয়াপা এতায় এবেদে ফামে ফামে লামর দৌর পূজা করিয়া হমা দিতারা এহান থাংনাত খানি চৌরাপ চৌরাপ করে লেইতেরেঙ করানি অইল—

১) আগেই উল্লেখ করানি অছিল যে লামর দৌর দিনে সিদ্দালো বেয়াপা দুগ বিয়ানে বারো মুরুষীগো হিসাবে মেইপা আগো বেনী আগ লাগেয়া ছাতি আগো বারো বাহার চুঙ কতগো চিপেয়া গাং বা লেইকীহানর অকরাগোন্ত মুঙর পথগলো নাইলে পিঠির পথগ ইলয়া লপুকে গিয়া লেইকী লমনির উপেইত সিদ্দা উতা দৌর মন্দিরে দিয়া ফলমূল কিতা ধূপবর্তি লাগেয়া লেইকী বা লাম উহানির ছৌমারান্ত চিনকরে কনাক বুজন হাবি নুরা পানি নায়া থাকা বুলিয়া হমা দিতারা বারো লামলৈইমাং বর মাগতারা যাতে নুরা বছরর কাম কাজ এতা হবায়া যাকগা বুলিয়া। পয়লা লাম খুলেছি মুরুষি গিরক-গিথানক উতারে দৌর নিঙে বেয়াপা দ্বিয়গি বারো মুরুষি উগয় হমা দেব। এহান হো থাইনাকার মণিপুৰর মাইবা-মাইবীর পরিচয় খানি পেয়ার।

এবাকার লামর দৌর দিনে বেয়াপা দ্বিয়গি বারো মুরুষী মেইপা উগর লামর দৌর হমা দেনার রীতিনীতি খানি দেহিয়ার। চাম্ফুসিক দৃষ্টান্ত আহান দেনা অইল-যেমন-হিংগালার

পূর্ব কৃষ্ণনগর গাঙে লামর দ্যৌর দিনে বেয়াপা দুগ বারো মুরুষী মেইপা আগো এসাদে করে খেড়র বেনীগো লাগেয়া ধূমা ফুদে ফুদে বেয়াপা দ্বিয়গির লগরগো হিসাবে এইপাত কিতালো গাংহান লমনির উপেইত লপুকে রূপার গাঙর বিলগোরমা ভেট দিতারা বারো ধূপবর্তি লাগেয়া হমা দিয়া লামলৈইমা গিথানকরে বারো লাম খুলেছে গিরক উগরে দ্যৌগ নিঙে হমা দিতারা। রূপার গাঙর ও বিল উগরে আগেদে গারদগো বুলিয়া মাত্তে হুনেছু। ও বিল উগত পুংকৃষ্ণনগরর ঘাটর পার এগর লাম খুলেছি গিরক-গিথানক দ্বিয়গো অইলাতায় পরমানন্দ বারো রমণী। এগি লামর দ্যৌগী নিঙে হমাদিতারা। এহান মোর দ্যৌর খয়া পেইলগা ইমারাংতো হুনেছু য়ারীহান। এহান লামরদ্যৌ হমাদেনার রীতিনীতিহান আগেদে বেয়াপারেলো ইমায় করিয়া গেছেগা রীতিহান। ঠিক উসাদে পাতিয়ালা বা চান্দরগাঙ এহানউ পয়লা লামহান অকরেছে গিরক উগর নাং চান্দ বুড়া।

২) প্রতাপগড় লয়ার বেয়াপা গিরিগিথানীয়ে আগেদে লামর দ্যৌর দিনে মুণ্ডমালা গোরমাউ লামর দ্যৌ হমাদেছি বুলিয়া হুনেছু। বারো আগেদে গাং-লেইকী সিলছি হাকতাকে এমনকি পুমপুলর টেঙারাগোরমাউ লামর দ্যৌ হমাদেছি।

৩) ঝাপিরবনর বেয়াপা গিরিগিথানী উতায় পেয়া নিজর লপুক, ঘাট ছড়ার পারে বা টিলারমা লামর দ্যৌ হমাদিতারা।

৪) কাছাড়র মেহেরপুরর পশ্চিম সিঙ্গারীরমাউ বেয়াপায় লামর দ্যৌর দিনে লউতলর বিলগর পারে লামর দ্যৌ হমা দিতারা বারো অন্যান্য ফামে যেমন-বিক্রমপুর, কাটাখাল, নরসিংপুর, এসাদে ফামে ফামে নিজর এলাকারমা লামর দ্যৌ হমাদিতারা।

৫) ঠিক ওসাদে ত্রিপুরা, সিলেট, ভানুঘাট ইত্যাদি ফামে নিজর ঘাট ছড়া বারো ভানুবিলর পারে লামর দ্যৌ হমা দিতারা।

এমন কি অনেক ফামে দিনে বা সেন্দারমা ডাক-কর্তান মইপুং রহেয়া হরিনাম সংকীর্তন করিয়া ঘরে ঘরে গিয়া লামহান হাবি পরিক্রমা করিয়া লামর দ্যৌর দিনে পুরানা দ্যৌ সেচেয়া নুৰা দ্যৌরে হমা দেনার রীতি নীতি লোকবিশ্বাস হিসাবে দেহিয়ার।

৬) লামর দ্যৌর আরাক খানি বৈশিষ্ট্য :— যেহেতু লামর দ্যৌ এহান আমার সমাজর ডাঙর কৃষ্টি বা রুহিবৃত্তি আহান, গতিকেই আরাকখানি বৈশিষ্ট্য অইলতায়-লামর দ্যৌর দিনেত্ব বা বিঘুর দিনেত্ব সম্পূর্ণ ৫ দিন এহান দসু খেলানি বা লিকল খেলানির রীতিনীতি সমাজে প্রচলিত আছে। গাবুরাপুৰেই বারো পুরিজেলেইন্ত চিনকরে সেন্দারাতি দসুখেলানির রীতিনীতি আছে। রাতি ফুবানির আগে সেলকম চিপিয়া চরেদে আনিয়া উতালো ক্ষীর প্রসাদ হংকরিয়া আনন্দ উপভোগ করানির নিয়ম আছে। আজিকালি এহানর চলহান সুপকরে নেই বুলানি য়াকরের। এহান কিন্তু সমাজর কৃষ্টিকলার অঙ্গ আগো। এরে লামর দ্যৌর পাচদিনকার ভিতরে বিরনর চউলর পিঠা খানার রীতি-নীতি প্রচলিত আছে।

৭) খামতলহান :- গজর উল্লেখ করা তথ্যমতে-লামর দ্যৌর বিশেষত্ব বা গুরুত্ব বারো তাৎপর্য ফংকরানি অইল। খামতলেদে এহান উল্লেখ করে পারিয়ার যে চৈত্র-সংক্রান্তির দিন এহানেই লামর দ্যৌর বা চেরউর দিনহান, কোন কোন ক্ষেত্রে বৈশাখর পয়লাকার দিনহান, যে দিনহান পুরানা বছরর কল্লিং ককরিয়া নুয়া বছর ঙ্করানির কাকেই কারের। ঔদিন আমি লামর দ্যৌরে হমা দিয়া হবায়া থানার বর মাগিয়ার। তা থকয়া লামর দ্যৌর পুলহাপে তাৎপর্য বা বিশেষত্বহান অইলতায়— নুয়া বছরর খেলতামে হবা ভালা অয়া নুয়া উদ্যমে বছরর কঠিন পথগো মোকাবিলা করিয়া নিজর তথা দেশ দশর কাম করিয়া যানা, যেহান সমাজর উন্নতির লক্ষণহান। কিন্তুমান মণিপুরর চন্দ্রবংশীয় বজ্রবাহনর বংশধর খুমল, মৈরাঙ, আঙম, লোয়াং ইত্যাদি রাজবংশর মানু লাম খুলিয়া রাজা পালয়া আছিল। হাকতাকে সুপকরেউ না খালকরেছিল। যে তানুর উত্তরসূরী বংশাবলীর ভবিষ্যত পথগো কঠিন অয়া আহের। ফলস্বরূপ তানুর গৃহবিবাদর ফলে তিব্বত মঙ্গোলীয় মৈতৈ গোষ্ঠীর মানু মণিপুররমা রাজা পালইলা বারো খুমল, মৈরাঙ, আঙম, লোয়াং গোষ্ঠীর মানু মণিপুর ইমালাম বেলেয়া কাছাড় ত্রিপুরা, বাংলাদেশেদে সিলইলা। বারো ইমপানি সাক্ষী হিসাবে থাইলা লোকতাকর পার, বিষ্ণুপুরর বিষ্ণু মন্দির, নিংথউখঙ, হেইরুক, নাচৌ, খুনৌ, নিংশিং লামর দ্যৌ। বছর খুন্তিঙে লামর দ্যৌ হমাদিতাঙাই- “নিংশিং অইতাঙাই বিষ্ণুপুরর কোন্সুং, ইবেলর মুকসী য়ারী, বিষ্ণু পুরর হাগহান দেহুরি রঙখা, রঙখা”। কিন্তু আজি আমি এবেদে নিজর সমাজর উন্নতির হকে বিভিন্ন সংগঠনর ভিতরেদে একত্রিত মনোভাবলো সরকাররাংতো দাবী আদায় করিয়া চাংখল করানি, সাহিত্য ভাণ্ডার শ্রীবৃদ্ধি করিয়া কনাক পাঠ চাংখল করানি, লামর দ্যৌ হমা দিয়া বর মাগিক- যাতে আমার সমাজর মানুর কৃষ্টি রক্ষা অনি, বিভিন্ন সংগঠনর কর্মকর্তা একঅয়া আরাকৌ মুঙেদে কাকেই কারানি। জয় ইমা বিষ্ণুপ্রিয়া।

তথ্য খমকরানি:-

- ১) পাঞ্চজন্য অজুর্নী সংখ্যা, ৫ সংস্করণ, সাহিত্য সভা, শিলং ১৩৮১ বাংলা পৃ :- ৪৫।
 - ২) “Back ground of Assameses culture— RM Nath, পৃ :- ৮৮।
 - ৩) পাঞ্চজন্য অজুর্নী, ৫ সংস্করণ— ১৩৮১ বাংলা পৃ :- ৪৮।
 - ৪) পিতৃপক্ষত পিতৃতর্পন— উপেন্দ্র চন্দ্র সিংহ, শিলচর, প্রকাশিত- ১৯৯৩ ইং পৃ :- ৪০।
- (১৯৮৭ ইং অক্টোবর মাহারমা প্রকাশিত “ফাগু” পত্রিকার “লামর দ্যৌ” প্রবন্ধহান খানি পরিবর্তন বারো পরিবর্ধন করানি অইল) □

সমাজর তিনগো ধর্মপ্রাণ সিদ্ধপুরুষ

বিষুগপ্রিয়া মণিপুরী সমাজর তিনগো ধর্মপ্রাণ মহাপুরুষর নাং বারো তানুর ধর্মীয় কার্যকলাপ বা কর্মপ্রচেষ্টার চুম্বক য়ারীখানি থাংনাত ফংকরানি অইল। ধর্মপ্রাণ মহাপুরুষ বা সিদ্ধপুরুষ গিরক তিনোগি অইলাতায়— (১) প্রতাপগড় লয়ার খালিবাড়ীর (মন্ত্রীগ্রাম) শ্রীমৎ পুণ্ডরীকাক্ষ শর্মা (২) বিক্রমপুর পরগণার বারোপুরা গাঙর (বর্তমান ভুবনেশ্বরনগর) শ্রীল ভুবনেশ্বর সাধুঠাকুর বারো (৩) প্রতাপগড় লয়ার নালীবাড়ীর পারুয়াগাঙর মহাযোগী আথোইবাবা গিরক। এরে লেংকরা প্রবন্ধ এহানাত মহাপুরুষ তিনোগির বাঢ়ি বা সাম্পা বিবরণ খানি বামুন, ক্ষেত্রী, বৈষ্ণব ভক্ত মানাই দশ গিরিগিথানীর মুঙে ফঙকরতেগা বা পাকরতে কোন কিত্তি কুরুম অইলে হারপাকুরা ভগবদ-প্রেমী ভক্ত মানাই গিরিগিথানীয়ে লিখিতভাবে দয়া করিয়া সুপরামর্শ দিয়া হবা পথগো ইলকরে দিলে লেখকে কৃতার্থ অইতয় বুলিয়া নিংকরের।

(১) শ্রীমৎ পুণ্ডরীকাক্ষ শর্মার কামকাজর বিবরণ :— বঙ্গদেশে ত্রয়োদশ শতিকারমা সেনবংশর রাজত্বর হাকতাকে রাজা লক্ষ্মণ সেনর সময়ত ঔ সময়কার সভাসদ কবি জয়দেব গোস্বামী গিরক শ্রী শ্রী গোবিন্দজীউর সাক্ষাৎ দর্শন প্রাপ্ত কৃষ্ণপ্রভুভক্ত বৈষ্ণব কবি আগো আছিল। ঔ কবি জয়দেব গোস্বামী গিরক বঙ্গদেশর মুসলমানর অত্যাচারে হিন্দুধর্মর গ্লানি বারো প্রভুর সেবা পূজার কামে শ্বৈনেই বাধা অয়তয়হান হারপেয়া সহধর্মিনী সতী পদ্মাবতীরেলো শ্রী শ্রী গোবিন্দজীউর স্বপ্নাদেশে প্রভুর মূর্তিগোলো বৃন্দাবন ধামে বিভিন্ন দেবমন্দির পরিক্রমা করিয়া থাংনাত রাধাকুণ্ড বারো শ্যামকুণ্ডর পারগৎ আয়া ফউঅইলহা, যেহান শ্রী শ্রী রাধাকৃষ্ণর নিত্য বিলাসভূমির ফামহান। ঔরে ফামউহানর ভিতরেদে বিছারেয়া শ্যামকুণ্ড বারো বিশাখাকুণ্ডগোর হাদিগৎ যে ফামহান আছিল, ঔহানর কাটাবন সেংকরিয়া উপযুক্ত মন্দির শৌ আগো হংকরিয়া শ্রী শ্রী গোবিন্দজীউ প্রভুর সেবা-পূজা করানি অকরল। এসাদে করে কতমাহা সেবাপূজা করানির থাংনাত সতী পদ্মাবতী ভব মালেমেস্ত চির-বিদায় নেনার পরে জয়দেব গোস্বামী গিরকর গারিগোউ অন্তিম দশাত ফরঅনির লগে লগে উপযুক্ত শিষ্য আগোরাং সেবাপূজার দায়িত্বহান সমঝোয়া পৌষ সংক্রান্তির দিনে এ-ভব মালেমেস্ত চির-বিদায় নিলগা।

কিন্তুমান কিংবদন্তী ইতিহাস বা জনশ্রুতি মতে হারপেয়ারতাই যে জয়দেব গোস্বামী গিরক চির বিদায় নেনার প্রাক-মুহুর্তে উপযুক্ত শিষ্য উগরাং দায়িত্বহান দেনার সময়ত মাতেছিল যে শ্রী শ্রী রাধামাধব জীউ সেবাপূজার ফাম-এহান অদূর ভবিষ্যতে কোন লেইরাপা সমাজর কোন বামুন ক্ষেত্রী বৈষ্ণব ভক্ত আগয় ভিক্ষা মাগলে বিনামূল্যে দান করিস বুলিয়া মাতেছিল। বারো ঔ শিষ্য উগো দ্যৌর খয়া পানার আগে পরবর্তী শিষ্য উগরাং এহান কানমন্ত্রহান হিসাবে দেনার ইঙ্গিত দেছিল বারো কারেউ নাবাগানিরকা এহান মাতেছিল। এরে কানমন্ত্র এহান বছর-বছর, যুগ-যুগ ধরিয়া চলিয়া আয়া পরবর্তীৎ ১৮ শ শতিকারমা খামতলেদে শ্রীমৎ পুণ্ডরীকাক্ষ এইগার ভাগ্যে তীব্র সাধনার বশবর্তীতে বিশাখাকুণ্ডর পারগোরমা এরে ফামএহান জুটিল।

আগেকার প্রভুপাদ জয়দেব গোস্বামী গিরকর য্যাথাংমতে পরবর্তী মহন্ত-গোসাইর স্বপ্নাদিষ্টে ফাম এহান প্রতাপগড় লয়ার খালিবাড়ীর শ্রীমৎ পুণ্ডরীকান্ধ শর্মা এইগা গিরকে তীর সাধনার ফলে বিষুগপ্রিয়া মণিপুরী লেইরাপা সমাজরকা বুলিয়া ভিক্ষা মাগিয়া এরে শ্রী শ্রী রাধামাধবজীউ প্রভুর ফামএহান বিনামূল্যে দানসূত্রে লাভ করেছিল, যেহান বিষুগপ্রিয়া মণিপুরী সমাজর উন্নতির হকে ডাঙর অধ্যায় আহান।

থাংনাত শ্রীমৎ পুণ্ডরীকান্ধ শর্মা এইগা গিরক তার যজমান-জিপুত যেতা বৃন্দাবন ধামে তীর্থ পরিক্রমাত লগে গেছিলাগা, ঔতারে আলথক ঘরে দিয়া পেঠেয়া দেশে-গাং-ঘরে-সভা সমিতি প্রচার করিয়া শ্রী শ্রী রাধামাধব জীউর প্রভুর মন্দির হংকরানির চেষ্টা করেছিল। পরবর্তীতে শ্রীমৎ পুণ্ডরীকান্ধ শর্মা এইগা গিরক নিজে ধামেত্ত ফিরিয়া আয়া প্রতাপগড়, হিঙ্গালা, ত্রিপুরা, কাছাড় বারো সিলেট এসাদে করে লয়ায় লয়ায় দশ গিরিগিথানী হাবিরেলো সভা-সমিতি করিয়া ভিক্ষালব্ধ চান্দালো শ্রী শ্রী রাধামাধবজীউর মন্দির প্রতিষ্ঠা করানিরকা সেংকরে শ্রী শ্রী রাধাকুণ্ড ধামে গেলগা।

এসাদে করে ১২৭৩ বাংলার (১৮৬৬ইং) শুভ-দোল-পূর্ণিমা তিথিরমা শ্রী শ্রী রাধামাধবজীউ প্রভুর শ্রীমন্দির ভক্তবৃন্দ হাবির সাহায্যালো হংকরলো। এরে প্রভুর শ্রীমন্দির হংকরতে বারো মালঠেপর উন্নতিকল্পে সমাজর ঔ সময়কার অগ্রদূত শ্রী তনুবাবু সিংহ, এ, সি, এস অফিসার গিরকর ভূমিকা বারো অবদান অপরিসীম, বারো লগে আর আর নাষ্টীয়ালা সমাজসেবী ভক্তমানাই গিরিগিথানীর ভূমিকাউ কম নাগয়।

তা থকয়া এরে ১২৭৩ সালর (১৮৬৬ইং) শুভ-দোল-পূর্ণিমা তিথি এহান বিষুগপ্রিয়া মণিপুরী সমাজর ঐতিহাসিক চিরস্মরণীয় দিন-আহান। কারণ এরে শুভ তিথির খেলতামে সমাজর পক্ষন্ত শ্রী শ্রী রাধামাধবজীউ প্রভুর মন্দির লিংখাত করেছি দিনহান। বারো এরে শুভতিথি এহানর আরাক তাৎপর্যপূর্ণ দিক আহান অইলতায় শ্রীশ্রী রাধামাধব জীউ মন্দির প্রতিষ্ঠাতা সেবাইত শ্রীমৎ পুণ্ডরীকান্ধ শর্মা এইগা গিরকরতাউ জন্মতিথিহান বারো দ্যৌর খয়া পাছেতাউ ১২৮২ সালর এরে শুভ দোল পূর্ণিমা তিথি এহানাং। তা'থকয়া এরে শুভ দোল পূর্ণিমা তিথিত্ত অকরিয়া পঞ্চম দোল অর্থাৎ দোল পূর্ণিমার পাচদিনকার দিন উহানাং শ্রীমন্দির প্রতিষ্ঠা দিবস হিসাবে শ্রী শ্রী রাধামাধবজীউ সেবা পূজা সমিতিয়ে সমাজর পক্ষন্ত পালন করতারা। তা আরো সমাজর হাবি থাকর ভক্তবৃন্দ হাবিহানে গুরুত্ব সহকারে এরে শুভ দোল পূর্ণিমান্ত চিনকরে পঞ্চম দোল পেয়া শ্রদ্ধা, ভক্তি বারো প্রেম-ভালবাসা সহকারে নিংকরানি থক্।

এতা ছাড়া শ্রীমৎ পুণ্ডরীকান্ধ শর্মা এইগা গিরকর আরাক ডাঙর কৃতিত্বর দিক আহান অইলতায়— খালপারর কাঙ। অর্থাৎ খালিবাড়ী লয়ারমা রথ-যাত্রা উপলক্ষে কাঙ আসুলেছিলাতা আজিত্ত পুরি প্রায় ১৫০ বছরর গজে। এহানাং মুখ্য ভূমিকা নেছিলগাতা

শ্রীমৎ পুণ্ডরীকাক্ষ শর্মা এইগা গিরকে। কাঙ উপলক্ষে শ্রীমৎ পুণ্ডরীকাক্ষ এইগা গিরকে মেলা আহান বহানিরকা বুলিয়া ঔ সময়কার অবিভক্ত সদর সিলেট জিলার উপায়ুক্ত (ডি, সি,) গিরকরাংতো অনুমতি আনেছিলগা বুলিয়া তথ্যমতে হারপেয়ার। ঔ সময় নয়াডহর লঙ্গেইহানর পশ্চিম পারে বহেছিল মেলাউহানরে “পুণ্ডরীকাক্ষ কাঙ” বা বেয়াপায় পুনতিরিকার কাং বুলিয়া মাতেছিল। ঔহানরে কেন্দ্র করিয়া থাংনায়- থাংনায় খালপারর হাতহান গাঙর ধর্মীয় মনোভাবর পুণ্যচেলপা গিরিগিথানী ভক্তবৃন্দ হাবিয়ে মিলিয়া মন্ত্রীগাঙর পিঠির লপুকে হাতহান কাঙ আসুলানি বারো মেলা বহানি অকরলা হাতদিনকার দিন উহানাং। এহানরে কেন্দ্র করিয়া অনেক সাহিত্য ভাণ্ডারর সৃষ্টি অইল, যেহানর প্রমাণ সমাজর বিখ্যাত সাহিত্যিক কবি মদনমোহন মুখোপাধ্যায় গিরকর রচিত “খালপারর কাঙ”। যেতাউ অক-এরে খালপারর কাঙর সৃষ্টি পুণ্ডরীকাক্ষ এইগা গিরকর জীবনর কৃতিত্বর আরাক ডাঙর বৈশিষ্ট্য আহান।

কাজেই শ্রীমৎ পুণ্ডরীকাক্ষ শর্মা এইগার সামপা য়ারী বা আলোচনার ভিতরেদে এহান হারপেয়ার যে এইগা গিরক পয়লা থাকর একনিষ্ঠ প্রভু-ভক্ত তথা সমাজ সেবী আগো বারো ধর্মপ্রাণ-সিদ্ধি-পুরুষ আগো। ঋষিতুল্য বুলিয়া এইগা গিরক ব্রহ্মাৰ্ষি পুণ্ডরীকাক্ষ শর্মা বুলিয়া আখ্যা দেনা আছে। গিরকে খানা-পিনা বাদ দিয়া, ঘুম-তুম বেলেয়া কায়োমনোবাক্যে লেইরাপা বিষ্ণুপ্রিয়া মণিপুরী সমাজরকা ধর্ম-মন্দির বা ধর্মশালা আগো তীব্র সাধনার বশবর্তীলো স্বয়ং শ্রী শ্রী গোবিন্দজীউর কৃপাপ্রাপ্ত অয়া রাধাকুণ্ড ধামে বিনামূল্যে বারো দানসূত্রে শ্রী শ্রী রাধামাধবজীউ মন্দিরর মাটিহান পানা বারো শ্রী শ্রী জগন্নাথ মহাপ্রভুর রথা যাত্রা উপলক্ষে সপ্তরথ প্রচলন বারো কবি জয়দেবর এলার প্রবর্তন, এতা নিঃসন্দেহে সমাজর পক্ষে ডাঙর অবদান আহান। ঔ শ্রী শ্রীরাধামাধব জীউর একনিষ্ঠ ভক্ত প্রাণপুরুষ এইগা গিরকর স্মৃতি সভা, জন্ম জয়ন্তী বারো মৃত্যু-বার্ষিকী হাবিতা এইগা গিরকর আদর্শ অনুসরণে আমারতা উৎসবর মাধ্যমে পালন করানি থক। এইগা গিরকরাং হিংসা-নিন্দা, আত্মলোভী নেয়নি, সমাজর উন্নতিবিধানকল্পে স্বার্থত্যাগ বারো দলাদলি দূরেই করানি এতা নিঃসন্দেহে এইগা গিরকর চারিত্রিক বৈশিষ্ট্য। এইগা গিরকর উদার মনোবৃত্তি অনুকরণে আদর্শ উতা পালন করানি; নতুবা ইতিহাস আমারে ক্ষমা নাকরতয়।

(২) শ্রীল ভুবনেশ্বর সাধুঠাকুরর সামপা য়ারীখানি :— শ্রীল ভুবনেশ্বর সাধুঠাকুর ১২৭৭ সালর ১০ ই কার্তিক শুক্লা ভাত্ দ্বিতীয়ার দিনে সাধুঠাকুর জরম অছিল। বনাককালেত্ব সাধুঠাকুররতা ঈশ্বর-ভক্তির প্রতি প্রবল বৈরাগ্য ভাব হমানিয়ে ১৮ বৎসরে আগরতলার মীনেশ্বর সার্বভৌম ভট্টাচার্য গিরকর ঘরে গিয়া মুন্ধবোধ- ব্যাকরণ কিতা পাকরিয়া জ্ঞান লাভ করানির থাংনাত ভারতর চারিধাম তীর্থ পরিক্রমার সুযোগ লাভ করল। এসাদে করে শ্রীল ভুবনেশ্বর সাধুঠাকুর ভারতর চারিধাম পরিক্রমার শেষে বৃন্দাবন ধামে আয়া ফউঅইল। ঔপেইত শ্রীল কৃষ্ণদাস বৈরাগ্য ঠাকুর গিরকরাং দীক্ষিত অয়া ভজন-সাধন বারো ভক্তি আরাধনার

মাধ্যমে ব্রজবাসীর মন জয় করেছিল। ঔ সময়ত বৃন্দাবন ধামে থাইতে হাদি হাদিত শ্রীমৎ পুণ্ডরীকাক্ষ এইগা গিরকর সেবাইত হিসাবে প্রতিষ্ঠিত রাধাকুণ্ড শ্রী শ্রী রাধামাধব জীউর শ্রীমন্দিরে আখড়াত গিয়া সাধুঠাকুর নিজে তালাবি করলগা। ঔ একনিষ্ঠ সাধক শ্রীল ভুবনেশ্বর সাধুঠাকুরর ভগবৎ-সান্নিধ্য লাভর অলৌকিক ঘটনা কতহান বাঢ়ি করে থাংনাত সাতকরানি অইল।

(ক) কাম্যবনে শ্রীল ভুবনেশ্বর সাধুঠাকুর শ্রী শ্রী গোবিন্দজীউর সান্নিধ্য লাভরকা সাধনার ভিতরেদে হাপ্তা আহানর চুয়া খানা-পিনা-ঘুমজানি বাদ দিয়া কায়োমনোবাক্যে কৃষ্ণনাম জপিয়া আহির পানি ডল ডলেয়া কাদিয়া থানার পিছেদে শ্রী শ্রী রাধারানীর কৃপাদৃষ্টিলো ললিতাজীর ব্রজ-গোয়ালিনীর ছদ্মবেশে ফলর পেলী আগো মুরগত করিয়া সাধুঠাকুররে হজাক করিয়া দিব্য শক্তি দান করিয়া আতহানাত ফলর পেলীগো দিয়া দিল বারো মাতল যে এরে ছনার পহুরি এগত হিনেয়া প্রভুরাং কতগো কাতকরিয়া সেবাকর বুলিয়া অন্তর্ধ্যান অইলী। পিছেদে সাধুবাবায় হজাক অয়া আহিগো মেলিয়া চেইতে মাতল ছনার পহুরি উগউ নেই বারো মাতল ব্রজ গোয়ালিনী উগউ না দেহের। এসাদে করে শ্রীল ভুবনেশ্বর সাধুঠাকুর স্বয়ং শ্রী শ্রী গোবিন্দজীউর সাক্ষাৎ দরশন পাছিল।

(খ) থাংনাত শ্রী শ্রী রাধারানীর স্বপ্নাদেশ পেয়া নবদ্বীপ ধামে আয়া শ্রী শ্রী চৈতন্য মহাপ্রভুর শ্রী মন্দিরে সেবাইতগো নিযুক্ত অছিল। বারো পিছেদে স্বপ্নাদেশে শ্রী শ্রী গোবিন্দজীউর বিগ্রহ, শ্রী শ্রী রাধারানীর বিগ্রহ বারো শ্রী শ্রী চৈতন্য মহাপ্রভুর বিগ্রহ প্রতিষ্ঠারকা দেব-মন্দির ইত্যাদি ১৩৩২ সালর মাঘী-পূর্ণিমা তিথিত প্রতিষ্ঠা করেছিল বারো ঔ শ্রীগোবিন্দ মন্দিরে সেবাইত হিসাবে দীর্ঘ কয়েক বছর আছিল।

(গ) থাংনাত— শ্রী শ্রী গোবিন্দজীউর সেবা পূজার সময়ত আকখুরুম পুরীধামে গিয়া শ্রী শ্রী জগন্নাথ মহাপ্রভুর সাক্ষাৎ দরশন লাভ- করেছিল। এতা অলৌকিক ঘটনা খানি-সাধুঠাকুরর তীব্র সাধনার ফলশ্রুতি।

শ্রীল ভুবনেশ্বর সাধুঠাকুর নবদ্বীপে সেবাপূজারমা থায়াউ রাধাকুণ্ডধামর শ্রী শ্রী রাধামাধবজীউ মন্দিরগোর উন্নতিরকা বুলিয়া দৃষ্টি থছিল। ঔ সময়ত সাধুঠাকুরে নিজে তার একান্ত অনুগত শিষ্য ঔ সময়র উচ্চ-শিক্ষিত শ্রীতনুবাবু সিংহ, এসি এস গিরকরে শ্রী শ্রী রাধামাধবজীউর মন্দিরর উন্নতিকল্পে সাহায্য করানিরকা সু-পরামর্শদেশিল; যেহান তনুবাবু সিংহ গিরকে অক্ষরে অক্ষরে পালন করেছিল। এতা নিঃসন্দেহে ধর্মপ্রাণ মহাপুরুষ শ্রীল ভুবনেশ্বর সাধুঠাকুরর কার্যকলাপর প্রমাণ বারো চারিত্রিক বৈশিষ্ট্য।

খামতলহান :— খামতলেদে এহান মাতানি মনাউরিতাই যে শ্রীল ভুবনেশ্বর সাধুঠাকুরর জীবনর ফলশ্রুতি হিসাবে ভগবৎ সান্নিধ্য লাভ বারো থাংনাত নবদ্বীপ ধামে গোবিন্দ বাড়ীত শ্রী শ্রী গোবিন্দজীউর মন্দির লিংখাত করিয়া অন্য সমাজর মুণ্ডে নিজস্ব অস্তিত্ব বারো

ধর্মীয় মনোভাব প্রতিষ্ঠা করানি, এহান বিষ্ণুপ্রিয়া মণিপুরী সমাজর ডাঙর অবদান আহান। সাধুঠাকুরর জীবন দর্শন আলোচনা করলে হারপেয়ারতাই— সাধুঠাকুরর অন্তরে কৃষ্ণপ্রেম-ভক্তি বারো নিঃস্বার্থ সেবা ফুটিয়া উঠেছে। ঔ সময় ভারতর বিভিন্ন ফামর পণ্ডিতবর্গর সম্মেলনে নিজস্ব মতামত প্রকাশ করিয়া কৃষ্ণ নামর মাহাত্ম্য সম্পর্কে প্রমাণ করেছিল যে “হরে কৃষ্ণ হরে রাম ... ইত্যাদি ষোল নাম বত্রিশ অক্ষর জপ্য বারো কীর্তনীয়”। ঔ তারক ব্রহ্ম নাম জপ করানি বারো লৌকরে লৌকরে কৃষ্ণ নাম মহা সংকীর্তন করানি— এহানই কলিযুগে মুক্তির একমাত্র পথগো বুলিয়া প্রমাণ করেছিল বারো সর্বজন স্বীকৃত অছিল। এহান নিঃসন্দেহে বিষ্ণুপ্রিয়া মণিপুরী সমাজর গৌড়ীয় বৈষ্ণব ধর্মাবলম্বীর পথগো। ঔ শ্রীল ভুবনেশ্বর সাধুঠাকুর শ্রী শ্রী রাধাকৃষ্ণর ভক্তি-প্রেম বারো ভগবৎ সেবার বাণী হিসাবে বৃহত্তম “গোবিন্দার্চন চূড়ামণিঃ” বুলিয়া বিখ্যাত লেরিক হান সংকলন করেছিল; যেহানর ভাব-রস অনুধাবন করানি চিলসে, অপার সমুদ্র হানাৎ হাতুরানির চেষ্টা করানির সমান।

যাইহোক, এসাদে করে সাধুঠাকুর তীব্র সাধনার ভিতরেদে নিজর জীবনে স্বীয় কৃতকর্মর মাধ্যমে শ্রী শ্রী গোবিন্দজীউর মন্দির প্রতিষ্ঠা করে পারেছিল বারো সেবাইত হিসাবে পরবর্তীতে শ্রদ্ধেয় তনুবাবু সিংহ গিরক, শ্রীকৃষ্ণকুমার সিংহ বারো শ্রী হরিদাস সিংহ বারো থাংনায় থাংনায় সমাজর বহু সেবাইত এবুঝ পেয়া শ্রীমন্দির সংরক্ষণ করিয়া থছি। এহান সমাজর প্রতি ডাঙর অবদান আহান। ঔ সাধুঠাকুরর আদর্শানুসারে তার জন্ম জয়ন্তী বারো জীবন দর্শন উৎসব আকারে পালন বারো আলোচনা করানি থক।

(৩) মহাযোগী আথোইবাবা :— বিষ্ণুপ্রিয়া মণিপুরী সমাজরমা রাঙমাচু বেলিহানর সাদনে আবির্ভাব অছিল মহাযোগী আথোইবাবা। সমাজর কোন কাঞ্চলর হাবি গিরিগিথানীয়ে বোধ হয় এবুঝ পেয়া হবাকরে আথোইবাবার য্যারী-পরী-কিতা পরিষ্কার নাছি। জনশ্রুতি বা খমকরা তথ্যমতে হারপেয়ারতাই যে আথোইবাবা গিরক ১২৪৫ সালর ২১ বৈশাখ অক্ষয় তৃতীয়ার দিনে জরম অছিল। গিরকর ঘর প্রতাপগড় লয়ার দেওলাখাল ছড়াহানর পারগৎ গাং-লেইকী লেপছি নালিবাড়ীর পারুয়াগাঙে। আথোইবাবার পিতৃদেবর নাং তাম্র সিংহ বারো মাতৃদেবীর নাং মালতী দেবী।

আথোইবাবার অলৌকিক ঘটনা কতহান :— (ক) কনাক-কালেত্ত পুরি সাধুঠাকুরর সাদনে আথোইবাবার শিবপূজা বারো কৃষ্ণ প্রভু-ভক্তি বারো প্রেম জবর অছিল। আথোইবাবার পাংকাল গাবুরাপোরা কালেও জবর অয়া অনেক শক্তির পরিচয় দেছিল। তা আরো পাংকালপা আথোইবাবা ১২৭৫ সালে (১৮৬৮ইং) ব্রহ্মত্ব লাভর সালে ঘর-বাড়ী বেলেয়া কৈলাশহরর উনকোটি তীর্থর শ্রী মন্দিরে ধ্যানে মগ্ন অইল। খানা-পিনা-ঘুম-তুম বেলেয়া হাপ্তা আহানর চুয়া ধ্যান করানির থাংনাত পুন্নিংয়ৌপা সাধন ভজন দেহিয়া মহাদেব গিরক নিজে সন্তুষ্ট অয়া স্বয়ং মূর্তি পালয়া হৌপনেদে প্রভুর দর্শন পানার আর্শীবাদ দিল।

(খ) থাংনাত মহাদেবর স্বপ্নাদিষ্ট সাধনার বশবর্তী অয়া আথোইবাবা গিরক প্রভুর মিল্লেং পানার খৌরাং টাটিলো গভীর ভাবে ধ্যান করানি আরাকৌ জবর অইল। পিছে পিছে দূরেইর বারো কাদাবারার মানু উনকোটি তীর্থ দর্শনে আয়া আথোইবাবারে চিনানি হীন পেইলা। এসাদে করে অবস্থার খেলতামে পেইরাক পেইচিল দিন আহান কৈলাশহরর কাদাবারার গাঙর গাবুরাপোরেই তিনগো কৃষ্ণনাম সংকীর্তন করে করে উনকোটি তীর্থরমা আয়া দেখলা যে লেংটিহান পিদেছে সাধু আগো নাম জপ করিয়া ধ্যানে মগ্ন আছে। পিছেদে ঔরে অবস্থা উহান দেহিয়া ঔ গাবুরাপোরেই তিনোগয় আথোইবাবারে আংকরানি অকরলা। থাংনাত আথোইবাবায় উত্তেজিত অনার পেইরাক পেইচিল অয়া পিদেছে লেংটিউহান চিপিয়া নিয়াম পারা পানি নিকালানি অকরল। ঔহান দেহিয়া গাবুরাপোরেই উতা আলথক ঘরেদে আয়া প্রচার করানি অকরলা, সিদ্ধিপুরুষগো উনকোটিরমা আথোইবাবা। এসাদে করে যোগ সাধনায় সিদ্ধিলাভ করল বুলিয়া মহাযোগী আথোইবাবা বুলিয়া চতুর্দিকে প্রচার অনা অকরল।

গ) আথোইবাবার বাহনগো অছিলতায় বারআতর (১২হাত) বাঘগো কলাশরর কাদাবারাদে বুলতে সালইলে বাঘগোর গজে কায়া গেছিলগা বুলিয়া কৈলাশহরর ঔ সময়কার পুকচেল সিংহ গিরকর থতাস্তো হুনেছি বুলিয়া মাতেছিল। বারো পিছেদে অনেক শিষ্য আথোইবাবারাং দীক্ষা লইলা। যেতাউঅক্ এসাদে করে মহাযোগী আথোইবাবা উনকোটি তীর্থর শ্রীমন্দিরে প্রভুর সেবারীগো হিসাবে কাম করেছিল। শেষ বয়সে আথোইবাবা কুস্তমেলারমা হরিদ্বারে যাত্রা করল। যাত্রার আগে ঔপেইর শিষ্য বা পড়ুয়া লকেইরে প্রভুর সেবা করিয়া যানার য্যাথাং দেছিল। পিছেদে হরিদ্বারে কুস্তমেলা দর্শন করিয়া থাংনাত আথোইবাবা গিরক বদরিকাশ্রমে যাত্রা করিয়া ফউঅইয়া আজীবনরকা শিলামূর্তি রূপলো প্রভুর সেবারমা ইহলীলা সংবরন করেছিল বুলিয়া হারপাছি।

তা থকয়া, এরে মহাযোগী আথোইবাবা গিরকর নিঙে শ্রীমন্দির হংকরানি বারো গিরকর নিঙে জন্ম জয়ন্তী বারো জীবন দর্শন আলোচনা উৎসব আকারে পালন করানি থক্। ঔহান অইলে সমাজরমা গিরকর আদর্শ উতা প্রকাশ পেইতয়, যেহান আমারতা একান্ত দায়িত্ব বারো কর্তব্য। এসাদে ধর্মপ্রাণ মহাপুরুষ আগোর জীবনী বারো কার্যকলাপ প্রকাশ করিয়া তার আদর্শ অনুসরণে প্রচার করানি থক্।

খমকরা তথ্যমতে খামতলে এহান মাতানি থক যে রাধাকুণ্ড ধামে বিষ্ণুপ্রিয়া মণিপুরী সমাজর ধর্মপ্রাণ সিদ্ধপুরুষ শ্রীমৎ পুণ্ডরীকাক্ষ শর্মা এইগা গিরকর সাধনার ফলশ্রুতি হিসাবে লব্ধ প্রতিষ্ঠিত শ্রীশ্রীরাধামাধব জীউর শ্রীমন্দিরর উন্নতি কল্পে সমাজর হাবি থাকর ভক্তবৃন্দই সাহায্য দিয়া আগ বাড়ানি থক্। হৌদিন দিনকার এইগা গিরকর সাধনার মাতুমে জীবন দর্শন অনুভব করলে হারপেয়ারতাই যে পুণ্ডরীকাক্ষ এইগা গিরক সমাজরকা বুলিয়া নিঃস্বার্থভাবে সাধনায় ব্রতী অয়া শ্রীগোবিন্দরজীউর সাক্ষাৎ-দর্শন পেয়া বিনামূল্যে দানসূত্রে মাটিহান পেয়া

সমাজরকা শ্রীমন্দির হংকরানির আয়ৌপা চেষ্টা করেছিল। আজিকালি কিন্তু সমাজর ভিতরে কৌলি করে করে দলাদলির সৃষ্টি বারো হুরকাং মনোভাবর পরিচয় দিয়া পূর্বাধুরষ বেয়াপার স্মৃতি উতা যদি মুতকরিয়ার বা ইঙাল ঙাল করিয়া প্রতিষ্ঠা করে নুরারিয়ার, তাইলে আমারতা এ যান্ত্রিক যুগে টিকিয়া থানা চিলছে।

ঠিক তদ্রূপ নবদ্বীপ ধামর গোবিন্দবাড়ীর শ্রীল ভুবনেশ্বর সাধুঠাকুরর প্রতিষ্ঠিত শ্রীগোবিন্দজীউর শ্রীমন্দির আরাকৌ শ্রীবৃদ্ধি করানি থক। সাধুঠাকুরর আদর্শর মাতুম ইলয়া যদি আমি নিজর জীবনে প্রতিফলিত করে নুরারিয়ার, তাইলে আমার পরম্পরাগত ঐতিহ্য লুপ্ত অনার পথে।

একই অবস্থাতে মহাযোগী আথোইবাবার স্মৃতিরকা বুলিয়া শ্রীমন্দির হংকরানির হংনা করিক। গিরকর নিঙে স্মৃতিসভা, ধর্মীয় আলোচনা করিয়া, ও আদর্শ উতা নিজর জীবনে বিন্দু আহান অইলেউ প্রতিফলিত করানি থক।

সামকরে মাততে গেলেগা— এরে ধর্মপ্রাণ তিনগো মহাপুরুষর কার্যকলাপ এতা, সভা সমিতি বা উৎসব আকারে আরাকৌ চাঞ্চল করে করানি থক। তানুর শ্রীমূর্তির ফটো কপি করিয়া সমাজে বিলানি বারো পূজা করানি থক। আমার জাতীয় ইতিহাসর ভাণ্ডারগোর পয়লা থাকে তানুর কার্য কলাপ এতা তুলিয়া ধরানি থক। থাংনায় থাংনায় নাঙীয়লা সমাজসেবী তনুবাবু, মহেন্দ্রবাবু, গীতিস্বামী গিরক লকেইরেউ তুলিয়া ধরানি থক। ওঁসাদে ধর্মপ্রাণ মহাপুরুষর আদর্শ অনুকরণে আগরে আগয় পারম্পরিক প্রেম ভালবাসা বারো ভাবর মাধ্যমে ঐক্যবদ্ধসুর তিলকরানি থক। তবেই ধর্মীয় চেতনা মাহাত্ম্য ফুটিয়া উঠতয়। শ্রীচৈতন্য চরিতামৃতর ভাষায়— “সর্বত্যাগ করি কর কৃষ্ণসেবন, কৃষ্ণসুখ হেতু কর প্রেম সেবন। যেহানর কৃষ্ণনামর ভিতরে প্রেম ভালবাসার উদয় অইতয়”।

(প্রবন্ধ এহান প্রকাশ অছিলতায় রাধামাধব সমাচার পত্রিকা ২০০৮ সালে।) □

হিঙ্গলারমা তনুবাবু-মহেন্দ্র-গীতিস্বামী

১) ভূমিকা :- লুসাই টেঙারার উরহানাত্ত নিকুলেছে হিঙ্গলা ঘাটহানর পারে পারে যুগ যুগ ধরিয়া লাম হংকরেছি বারো ও সরা উহানর নাঙ হানলো বিষ্ণুপ্রিয়া মণিপুরীর হিঙ্গলা। তা থকয়া নিকুলেছে ও উজান হিঙ্গলার থাকহানাত ভুতুছড়ার ইসালপা খাইমুনি অঝা, ফেতিপাতর ডাকুলা বদন অঝা, হমবুক হিঙ্গলার বন-ফারার আমলে পয়লা শিক্ষার বর্তি কুপেছি খিলুয়ার উদয় অঝা (লেখকর বপাক) বারো কুলচন্দ্র অঝা (লেখকর পিতৃদেব), বেয়াপা শিক্ষার পয়লা প্রচলনকারী হেমলতা দেবী (লেখকর মাতৃদেবী), সরপঞ্চ নন্দবাবু সিংহ বারো সমাজসেবী সার্বভৌম চাটার্জী বারো রামকৃষ্ণ চাটার্জী, কেছুরগাঙর ইসালপা বিজয় অঝা, নাট্যকার মনোবাবু সিংহ বারো কথাশিল্পী ললিত সিংহ, শিক্ষার প্রসারর ভূমিদাতা গিরকশৌ সিংহ বারো নিশিকান্ত ডিএসপি, বিষ্ণুপুরর রামায়ণ কীর্তনী ধনসেনা সিংহ, বারো পঃ কৃষ্ণনগরর বাবাগো সিংহ, রূপারগাঙর সমাজসেবী চূড়াচাদ সিংহ, ব্রজলাল সিংহ বারো বিদ্যানগরর ধর্ম সিং পণ্ডিত বারো ধনাই পণ্ডিত অঝা লকেইত্ত চিনকরে লামুনী হিঙ্গলার রাধাকুণ্ড ধামর সেবাইত আমর খালর (মতান্তরে ধলিবিলা) নারদবাবুর হিঙ্গলা বারো খামতলেদে হিঙ্গলাহান পড়েছে হন্দবিলগোর (শনবিল) কাদাত দ্বীপগো সাকয়া গড় আন্তীর পারার ভিতরেদে বন ফারিয়া হঙছে গড়বন লয়ার নাঙীয়ালী বাসকুলী মায়ে বাসকীর আবির্ভাব পূণ্যভূমি হিঙ্গলা— বৃহত্তর লয়ারমা হো থাইনাকার হাকতাকর সমাজর ধর্মপ্রাণ পুরুষ সমাজসেবী তনুবাবুর আবির্ভাব, জাতীয় ঐতিহাসিক পথ প্রদর্শক মহেন্দ্র কুমার সিংহর আবির্ভাব বারো সমাজ জাগরণ দাতা গোকুলানন্দ গীতিস্বামীর আবির্ভাব হুতুমেউ হিঙ্গলা ইমার ওরসে নিকুলেছি কনাক বুজন, বেয়াপা ইমা ইন্দল হাবিহানরে মুঙেদে কাকেই কাড়িয়া নেনার হত্না করেছি। তা থকয়া এরে সমাজসেবী তিনোগির পদার্পনর য়ারী-পরী থাংনাত সিঁজিল করানি অইল। অনেক জানা-অজানা ভুল-ভ্রান্তি থাইতে পারে, ওতা প্রভুর ভক্তবৃন্দ বৈষ্ণব দশ গিরিগিথানীয়ে নিজগুণে চুমকরিয়া পথগো ইলকরে দেনারকা সাচারাং ভক্তি হমা জানাউরি।

১) হিঙ্গলারমা তনুবাবুর আবির্ভাব— হিঙ্গলারমা পূণ্যচেলপা তনুবাবুর আবির্ভাব সম্পর্কে উল্লেখ করানির আগে গিরকর সম্পর্কে বাড়ি করে দ্বি-আকচুটি না মাতলে পরিষ্কার নার। তা থকয়া তনুবাবু গিরক জরম অছেতা ১২৮৫ বঙ্গাব্দর ওরা পৌষ (১৮৭৯ ইং) প্রতাপগড় লয়ার কানাইবাজার গাঙে। গিরক ১৯০২ সালরমা কলিকাতা বিশ্ববিদ্যালয়ন্ত পুরি বি, এ, অনার্স সহকারে প্রথম বিভাগে প্রথম স্থান দখল করেছিল যোগো সমাজর পয়লাকার গ্রেজুয়েটগো। ১৯০৭ সালরমা সাবডেপুটি কালেকটর বারো ১৯১০ সালরমা আবগারী বিভাগর সুপারিন্টেনডেন্ট পদফামে উন্নীত অছিল।

তনুবাবু গিরকর চাকুরী জীবনর উল্লেখযোগ্য কৃতিত্ব আহান হারপেয়ারতাই— ১৯১৭ সালরমা সিলেট মাসিমপুরে বিষ্ণুপ্রিয়া মণিপুরী মালঠেপে একমাত্র জিলক পদ্মার

মহারাস লীলা করতে কবিগুরু রবীন্দ্রনাথ ঠাকুরের সম্বর্ধনা করানি। ঔ মহারাসলীলাত মণিপুরী নৃত্যর ভঙ্গিমা দেহিয়া কবিগুরু মুগ্ধ অছিল। লগে লগে কলিকাতা শান্তিনিকেতনে মণিপুরী নৃত্য চালুর সিদ্ধান্ত নেছিলগা। ঔবাকাই তনুবাবু গিরকর পরামর্শে ত্রিপুরার মশাউলির গুরু নীলেশ্বর মুখার্জী বারো শিলচর কালিঞ্জরর গুরু সেনারিক রাজকুমার গিরক দ্বিয়োগিরে নিয়া কবিগুরু শান্তিনিকেতনে মণিপুরী নৃত্য একাডেমী চালু করেছিল। এমন কি ১৯২৫ সালে চিত্রাঙ্গদা নাটক অভিনয় করানিরকা নিমন্ত্রণ পত্র দিয়াপেঠাছিল।

তনুবাবুর কামর আরাক উল্লেখযোগ্য দিক আহান অইলতায় — শ্রী শ্রী ভুবনেশ্বর সাধুঠাকুরর পরামর্শে তনুবাবু গিরক সমাজর ধর্মপ্রাণ মহামানব ব্রহ্মার্ষি পুণ্ডরীকাক্ষ এইগা গিরকর প্রতিষ্ঠিত রাধাকুণ্ড ধামর শ্রী শ্রীরাধামাধব জীউ মন্দিরগোর সংস্কার-সাধন বারো উন্নতিমূলক কামকাজরকা সমাজর বিভিন্ন লয়াত হাবি থাকর মানুর লগে আলোচনা অকরেছিল। সাধুবাবার কৃপাদৃষ্টিত তনুবাবুর নিঙে ঔরে অমৃত বাণী— “বাবা, তনুবাবুর মত মানুষ আজকাল হয় না। দিনের মধ্যে একবার করিয়া তাহার মূর্তি দেখিতে পাই।” ... হরিদাস দেববর্মা গিরকরাং সাধুঠাকুরর এরে অমৃত — বাণী এহান তনুবাবু গিরকর কৃতিত্বর ডাঙর দূরদর্শিতার পরিচয়হান।

এসাদে করে শ্রী শ্রী রাধামাধব জীউর সেবাপূজার মহৎ উদ্দেশ্যলো তনুবাবু গিরক চাকুরী জীবনর ভিতরেদে বৃহত্তর মণিপুরী সমাজর মৈতৈ বারো বিষ্ণুপ্রিয়া হাবিহানরে আকপেইত পুলকরিয়া ১৯২৮ ইংরেজীর খামতলেদে কাছাড়র লক্ষীপুর শ্রী মণ্ডপে ডাঙরিয়া মৈতৈ— ইঙেনজাউসেনা রাজকুমারর সভাপতিত্বে তিন দিনকার ডাঙর সভা আহান ডাহেছিল। ঔ সভাত বিষ্ণুপ্রিয়া মণিপুরী হাবিহানে বক্তৃতা থইলা; কিন্তু মৈতৈ বেইবুনি কোনগয় বক্তৃতা থনা নুরারানিয়ে নিয়াম লাজপেয়া পিছেকার দিনেত্ত গোপনে সভা করিয়া আর সভাত যোগদান না করলা। ফলে তনুবাবু গিরকর সভাপতিত্বে পিছেদে সভারমা রাধাকুণ্ড ধামর শ্রীবৃদ্ধি করানি বারো সমাজর উন্নতির বিষয়ে আলোচনা করিয়া সভার কাম লমকরানি অছিল।

থাংনাত ১৯৩২ ইংরেজীরমা তনুবাবু গিরক চাকুরীত্ত অবসর গ্রহণ করিয়া মুক্তভাবে সমাজর উন্নতিমূলক কামকাজে আগ বাড়ানি অকরল। এসাদে করে বৃহত্তর হিঙ্গালারমা তনুবাবু গিরকর পদার্পন ১৯৩২ ইংরেজীর নভেম্বর মাহার শেষদিকে বিদ্যানগরে নাঙীয়ালা ইসালপা ব্রজেশ্বর সিংহর ঘরে। রাতিহান থায়া পিছেকার দিনে বিদ্যানগর শ্রীমন্দিরে নাঙীয়ালা *ধর্মসিং পণ্ডিত, *ধনাই পণ্ডিত, *রূপ সিং পণ্ডিত গিরক গাছিরাংতো চিনকরে কনাক বুজন বেয়াপা ইমা-ইন্দল হাবিরেলো সমাজর উন্নতিরকা বুলিয়া সভা করিয়া হাবিরে অনুপ্রাণিত- করিয়া হিঙ্গালাহান লালয়া রূপার গাঙর বিশিষ্ট শিক্ষাবিদ সমাজসেবী চুড়াচান্দ সিংহ বারো কেশ্বরগাঙর নিশিকান্ত ডি,এস,পি গিরকর লগে আলোচনাক্রমে ঔপেইত গিরকশৌ সিংহর (ফাটা) মালঠেপে সমাজ সেবী নিত্যাই সিংহ রাংতো চিনকরে হাবি থাকর কনাক বুজন ইমা-ইন্দল হাবির লগে সভা করিয়া পিছেদে খিলুয়াত আয়া ফউঅইলহা ৩০ নভেম্বর ১৯৩২ ইংরেজীরমা। ঔদিন

‘রামকৃষ্ণ শ্রী মণ্ডপে (বিটিয়ালা এইগা) ও সময়কার বিশিষ্ট সমাজসেবী ‘সার্বভৌম চাটাজী, সরপঞ্চ নন্দবাবু সিংহ, বিশিষ্ট শিক্ষাবিদ অঝা ‘উদয় সিংহ বারো অঝা ‘কুলচন্দ্র সিংহ গিরক গাছির পাংলাকে শ্রী শ্রী রাধামাধবজীউর মন্দির উন্নতিকল্পে বারো সমাজর সেবামূলক উন্নতির হ্নায় ডাঙর সভাআহান ‘তনুবাবু সিংহর সভাপতিত্বে বহেছিল। ও সভাত তনুবাবু সিংহ গিরকর কথার গজে নিয়াম গুরুত্ব দেছিল। মোর জন্মধাত্রী ইমা হেমলতা দেবী ও সময়র খুমল বালিকা বিদ্যালয়র প্রধান শিক্ষিকাগো আছিল। ও ইমার থতাত্ব মি অষ্টম শ্রেণীরমা পাকরতে (১৯৬৫ ইং) য়ারী এতা হুনেছিল। ১৯৩২ ইংরেজীর থাংনাত- ১৯৩৫ ইংরেজীরমা খামতলেদে হিঙ্গালার কেছুরগাঙর ‘গিরকশৌ সিংহর (ফাটা) মাণ্ডপে বিরাট সভা আহানর ঠৌরাং করানি অছিল; বিশেষ করিয়া গোকুলানন্দ গিরকর সন্মান প্রদর্শন উপলক্ষে। সভাপতিত্ব করেছিলতায় ‘তনুবাবু সিংহ গিরক। ও অধিবেশনর থাংনাত বিষ্ণুপুর, বাস্কালটিলা, পাতিয়ালা, ফেতিপাত— এসাদে বিভিন্ন গাঙে সভা সমিতি করে করে সমাজর মানুর মনে বিরাট পরিবর্তন আনেছিল।

তা থকয়া সমাজর গজর পদফামে তনুবাবু সিংহ গিরকর নাং আছিল— এহানাত - শ্বে- নেই। পিছেদে শেষ জীবনহান নবদ্বীপ গোবিন্দবাড়ীরমা পূজ্যপাদ শ্রীল ভুবনেশ্বর সাধুঠাকুরর কৃপাদৃষ্টিতে ১৯৩৮ সালরমা দ্বিতীয় সেবাইত হিসাবে নিযুক্ত অছিল। এসাদে করে শ্রী শ্রী গোবিন্দজীউর একনিষ্ঠ সেবাইতগো হিসাবে কাম চালেয়া ১৩৪৯ বাংলার ২ রা পৌষ তারিখে (১৯৪২ইং) প্রভুর ইষ্ট নাম জপ করতে করতে নিংস্বাহান লালয়া শ্রী শ্রী রাধাকৃষ্ণর যুগল চরণ সেবারমা নিত্যধামে ফউঅইলগা। ও চিরস্মরণীয় তনুবাবুর নিঙে আজিকার জয়ন্তী তিথিরমা আমি হিঙ্গালাবাসী শ্রদ্ধাঞ্জলি কাতকরিয়ার।

২) হিঙ্গালারমা ঐতিহাসিক ‘মহেন্দ্র কুমার সিংহর পদার্পণ :— বিষ্ণুপ্রিয়া মণিপুরী সমাজর অগ্রগণ্য ঐতিহাসিক ‘মহেন্দ্র কুমার সিংহর পদার্পণর আগে গিরক সম্পর্কে চুস্বক আহান সাতকরানি অইল থাংনাত।

১২৯৫ বাংলার ১১ আশ্বিন (১৮৮৯ ইং) সাকলসেলর দিনে পাথারকান্দির রাজারগাঁওরমা ‘মহেন্দ্র কুমার সিংহ জরম অছিল। শিক্ষারমা ১৯১৫ সালে কলিকাতা সিটি কলেজেত্ত বি,এ, বারো ১৯২১ ইংরেজীত ঢাকা ট্রেনিংকলেজেত্ত সুনাম সহকারে গিরক পাশ করেছিল। চাকুরী জীবনেত্তপুরি গিরক সমাজসেবারমা জড়িত অছিল। সিলেট সরকারী হাইস্কুলে শিক্ষকতার সময়ত ১৯২৫ সালে ও সময়র সমাজসেবী বাবুচাদ সিংহ বি,এ,বি,এল, নিলমণি সিংহ, এডভোকেট অর্জুন সিংহ গিরক গাছির সৌজন্যে “মণিপুরী জাগরণ পত্রিকা” নিকালাছিল। ওতার থাংনাত গিরকর সমাজসেবার নিঙে গবেষণা আরম্ভ। হো থাইনাকার হাকতাকেত্ত মণিপুর সরকার গরীব নওয়াজর চক্রান্তত্ব চিনকরে থাংনায় থাংনায় রাজা রাজেশ্বর অপচেষ্টায় বিষ্ণুপ্রিয়া মণিপুরী জাত তথা সমাজহানরে মেইমুত করাত লেপাছিল, ও আধারর যুগহানর

সময়ত লওয়া ডেঙা রাজ্যহারা বিষ্ণুপ্রিয়া মণিপুরীর জাতিসত্তা নিয়া কলমগো ধরিয়া বিখ্যাত “মণিপুরর প্রাচীন ইতিহাস” লেরিক প্রকাশর মাধ্যমে গিরকে প্রমাণ করেছিল যে বিষ্ণুপ্রিয়া মণিপুরী আৰ্য ক্ষত্রিয়। ক্ষুমল বংশোদ্ভব মহেন্দ্র কুমার সিংহর ঔ সময়র লগর সহায়কারী অছিলাতায় তরুণ তুর্কী সমাজসেবী কাটাখালর ফালগুণী সিংহ বারো মাছুঘাটর রাজবাবু সিংহ।

এমন কি ১৯৩১ ইংরেজীরমা বৃটিশ সরকার সিমলা আয়োগর ভিত্তিলো মণিপুরীরে (মৈতৈ বারো বিষ্ণুপ্রিয়া) পার্বত্য উপজাতি লিপিবদ্ধ করলে ঔ সময়র মহান প্রাণ পুরুষ সমাজসেবী তনুবাবু সিংহ, প্রখ্যাত ঐতিহাসিক মহেন্দ্র কুমার সিংহ, প্রাক্তন বিধায়ক নন্দকিশোর সিংহ, মানিক সিংহ কাব্যরত্ন, সার্বভৌম চট্টোপাধ্যায় ইত্যাদি গিরিগিথানী হাবিহানে তীব্র প্রতিবাদ করানির ফলে ইংরেজ সরকার বাধ্য অয়া মণিপুরী বর্ণহিন্দু বুলিয়া ঘোষণা করেছিল। ঔবাকায় উক্ত গিরিগিথানী হাবিহানে “সুরমাভেলী মণিপুরী এসোসিয়েশন” নাঙে সংস্থা হংকরিয়া “মণিপুরী,” “মেখলী” ইত্যাদি পত্রিকা আমার ঠারলো প্রকাশ করানি অছিল। কিন্তু মাছুঘাটর রাজবাবুর নির্মম হত্যার পিসে মহেন্দ্র কুমার সিংহ গিরক মানসিক অশান্তি পানায় ঔ পত্রিকা উতা পিছেদে বন্ধ অইল।

যেতাউ অক— পরবর্তীতে সমাজ সেবার নিঙে ব্রতী অয়া মহেন্দ্র কুমার সিংহ বারো তনুবাবু সিংহর ঐকান্তিক প্রচেষ্টার মাধ্যমে ১৯৩২ ইংরেজীরমা হিঙ্গালার কেহুরগাঙে বিরাট সভার বিশেষ অধিবেশন আহান ঠৌরাং করানি অছিল, যেহানাত গোকুল কীর্তনীরে সন্মানে ভূষিত করানি অছিল। ঔতার থাংনাত স্বাধীনতার সময়ত গিরকরে সিলেটেঙ করিমগঞ্জ সরকারী সহ প্রধান শিক্ষক পদে বদলী করানি অইল। পিছেদে ১৯৪৮ ইংরেজীর আগষ্ট মাসে গিরক অবসর নিলগা। স্বাধীনতা পিছে মহেন্দ্র কুমার সিংহর গবেষণার স্বীকৃতি হিসাবে আসাম সরকার বৃত্তি মঞ্জুর করেছিল। এমন কি গিরকর প্রতিষ্ঠিত “মণিপুরর প্রাচীন ইতিহাস” লেরিকর গজে আসামর বিখ্যাত ঐতিহাসিক রাজমোহন নাথ গিরকর ১৯৫১ ইংরেজীর মন্তব্য হান—

"I believe the research of Mahendra kumar Sinha will throw Valuable light on the hitherto unknown history of Manipur and the Manipuris"—

এহানাত হারপেয়ার যে মহেন্দ্র কুমার সিংহ গিরকর অবদান সমাজে কতিহান। গিরকর শেষ জীবনর দ্বি- আকবছর আগে হিঙ্গালারমা পদার্পণ করেছিল— ঔ সময়উহান ১৯৫৬ ইংরেজীর ফেব্রুয়ারীর বিখ্যাত “আন্দুরগাঙ বিরাট সভার চতুর্দশ অধিবেশন”— যে অধিবেশনে বিরাট সভা নাংহান পরিবর্তন করিয়া মহাসভা নাংহান লিপিবদ্ধ করানি অছিল। ঔবাকার অভ্যর্থনা সমিতির সভাপতি কেহুরগাঙর স্বনামধন্য নিশিকান্ত ডি এস পি বারো সম্পাদক গোপীমোহন মুখার্জী এইগা গিরক। ঔহান সমাজর গৌরবময় যুগ আহান। কারণ ঔ সম্মেলনর কতমাহা পিছেদে দুস্তভছড়া চরগুলা ভেলী পাবলিক হাইস্কুলে “নুমিউস” সংঘ প্রতিষ্ঠা বারো পত্রিকা প্রকাশ; যেহানর গুড়িগোস্ত ডেঙ-পাল সিতারেয়া সমাজর নানা দিকপাল দিকে দিকে সমৃদ্ধি

লাভ করেছি। ঔ সম্মেলনে আলোচ্য বিষয়হান আছিলতায়— “আমার ঠারহান”। ঔ বিষয়ে সারগর্ভ ভাষণ দিলতায় মহেন্দ্র কুমার সিংহ। গিরকে ঔবাকা মাতেছিল— আমার ঠারহান মণিপুরর প্রাচীন আৰ্য সংস্কৃতির সমন্বয়ে গঠিত ঠারহান। ঔরে ঠার উহান খুটি লেপকরিয়া লিংখাত করতে নিয়াম দরকার লেরিক বারো পত্রিকা নিকালানি। ঔহানর মাতুম ইলয়া “ভাষা সমিতি” গঠন করানি অইল, যেহানর সভাপতিগো মহেন্দ্র কুমার সিংহ বারো সম্পাদকগো শ্রদ্ধেয় গোপীমোহন মুখার্জী। যেহানর গজে ভিত্তি করিয়াই পরবর্তীতে ভাষা আন্দোলনর হতগো জবর অইল। এসাদে করে মহেন্দ্র কুমার সিংহর ভূমিকা চিরস্মরণীয়। ঔ সম্মেলনর দ্বি-তিন বছর পিছেদে ১৯৫৯ ইংরাজীর ২২ শে ফেব্রুয়ারী ঐতিহাসিক মহেন্দ্র কুমার সিংহ এরে ভব মালেমেত্তু চির বিদায় নিলগা। তা থকয়া গিরকর বিভিন্ন রচিত লেখা, ইতিহাস, প্রবন্ধ আদি সমাজে ইতিহাসর পাতাত স্বর্ণাক্ষরে লেখা থাইতয়। গিরক যে সমাজর ইতিহাস গবেষণার লব্ধপ্রতিষ্ঠার অগ্রদূত বা pioneer আগো— এহানাত কোন দ্বি-মত নেই।

৩) গীতিস্বামী গোকুলানন্দ :— গোকুলানন্দ গিরক জরম অছিলতায় উনবিংশ শতিকাৰ খামতলেদে বাংলাদেশর ভানুঘাছে। বারো থাংনাত ঘর করেছিলতা— তাখেনর কাঞ্চনবাড়ীরমা। লেম্পা লকেইর বংশোদ্ভব গোকুল কীর্তনী বিষ্ণুপ্রিয়া মণিপুরী সমাজর নবজাগরণ দাতা গিরকগো। যেবাকা বিষ্ণুপ্রিয়া মণিপুরী মানু মণিপুর ইমালাম বেলেয়া, ভিটামাটি এরে দিয়া চেই চেই নাংহানর সাদনে কাছাড়, ভানুগাছ, ত্রিপুরা ইত্যাদি ফামে সিলইলা, যেবাকা মিল নেই এপারর লগে হৌপারর, তিল নেই কোন দ্বিয়ো-পারর— ঔ আধারর যুগে ইংরেজ শাসনে লাঞ্ছিত, নিপীড়িত বিষ্ণুপ্রিয়া মণিপুরী সমাজ। ঔ হাকতাকে ইংরেজ সরকারর চেকচিল আহিত ধূলি ছিটা দিয়া আমার ঠারে এলার মাধ্যমে দেশে দেশে গাঙে ঘরে সব্যসাচীর বেশহানলো আবির্ভাব সমাজরমা গোকুল কীর্তনী। কাটালুরির আঙিহান পিদিয়া, আতর তারাহানাৎ বেহালাগো ধরিয়া এলাদের “ কতি ঘুমিতায় উঠো ক্ষত্রিয় সন্তান, কাল সাগরে ঘুম-ঘোরে আয়ু, সূর্য অবসান”। হো থাইনাকার মণিপুরেত্ত হাজার বছরর কাল নিদ্রায় আচ্ছন্ন বিষ্ণুপ্রিয়া মণিপুরী সমাজ হানরে হজাক করে দের গোকুল গিরকে— উঠ বিষ্ণুপ্রিয়া মণিপুরী সমাজ, বেলিহান রংখা রংখা অয়া নিকুলিয়া আহের। এরে হজাক এহানরকা বুলিয়া গোকুল গিরক সমাজর কওয়াগো হুতুমেউ, না, না, হুদা কওয়াগো নাগয়, গোকুল গিরক সমাজরমা কোকিলগো। অর্থাৎ গিরক স্বার্থপরগো নাগয়— পঞ্চমসুরে একমাত্র তার জাগরণী এলারকা, - নমস্যাগো, তার ঔ অমৃত বাণী, আজি আমার নিংশিং আরতি।

গোকুল গিরকর হিঙ্গালারমা পদার্পণ সময় আহান অইলতায় ১৯৩০ ইংরেজীর নভেম্বর মাহান। হিঙ্গালার কেছরাগাঙর গিরকশৌর (ফাটার) মালঠেপে। ঔ অধিবেশনে অনুবাবু সিংহর সভাপতিত্বে, মহেন্দ্র কুমার সিংহ, নিশিকান্ত সিংহর প্রচেষ্টায় গোকুল কীর্তনীরে মণিপুরী কৈয়ত বারো হুনার মেডেললো “গীতিস্বামী” উপাধি প্রদান করানি অছিল।

এসাদে করে গীতিস্বামী গোকুলানন্দ সমাজর মুখ্য সেবারী আগো প্রমাণ করেছিল। গিরকর আরাক উল্লেখযোগ্য কৃতিত্ব আহান অইলতায়— ১৯৫৬ ইংরেজীর হিঙ্গালার আন্দুরগাও বিরাট সভার সম্মেলনে গিরকর পদার্পণ। ঔ অধিবেশনে গিরক এলা দিয়া হাবিহানরে মুঞ্চ করেছিল বারো ঔ অধিবেশনে বিষ্ণুপ্রিয়া মণিপুরী সাহিত্য সংস্কৃতি পরিষদর সভাপতিগো লেপছিল। মোরতা এবাকাউ নিংশিং অউরি সময়হান ১৯৬৪-৬৫ বছরহান, অষ্টমমান শ্রেণীত পাকরুরি। বিষ্ণুপুর ঠাণ্ডুর মালঠেপে গোকুলকীর্তনী গিরক এলা দিল। মোর স্বচক্ষে দেহেছিলু য়ারীহান। ঔবাকায় গিরকর রচনাধর্মী, বাচন ভঙ্গী নিঃসন্দেহে সমাজর সাহিত্যর খোরাক যোগাড়। গিরকর রচিত এরে এলা আমারকা অমূল্য সম্পদ। ঔ গিরকর নিঙে আজিকার জয়ন্তী উৎসবে সাচারাং ভক্তি হমা আমি কাংকরিয়ার।

খামতলেদে আজিকার তনুবাবু, মহেন্দ্র, গীতিস্বামী জয়ন্তী উৎসবে মাতানি থক যে প্রতি বছর এরে গিরক তিনোগির জয়ন্তী উৎসব আরাকৌ চাংখল করে পালন করানি থক। তানুর আদর্শ উতা সমাজে তুলিয়া ধরলে সমাজে উঠিয়া আইতারা তরুণ প্রজন্ম সমাজসেবী হাবি হানে সমাজসেবার নিঙে তানুর আদর্শ উতা অনুকরণ করানি থক। সমাজে এবুঝা ভাষা-সাহিত্য-সংস্কৃতির লড়াই লমনাছে। যদিযৌ নিজস্ব সত্তা বুলিয়া স্বীকৃতি পেইলাং তেবউ ঔতা ফলপ্রসু পুরাপুরি নাছে এবুঝাপেয়া। জাতীয় সরকার আকবেদে টালবাহনার ভিতরেদে চালাকি করিয়া লিতনির ফন্দি বিছারার, বারো আরাক আকবেদে আমার ভিতরে ইশেঙ সেঙয়া আকপেইত হাবিহান পুলনি নুরারিয়ার। তা থকয়া সমাজ সেবার নিঙে ঐক্যতার সুরে সমাজর পথপ্রদর্শক তনুবাবু, ঐতিহাসিক মহেন্দ্র কুমার সিংহ বারো নবজাগরণ দাতা গোকুল কীর্তনীর আদর্শলো মুঙেদে কাকেই কারানি থক। ঔহানেই সমাজসেবাহান।

(বিঃ দ্রঃ প্রবন্ধ এহান “তনুবাবু-মহেন্দ্র-গীতিস্বামী” জন্মজয়ন্তী উপলক্ষে ভাষণ প্রসঙ্গে ফংকরানি অছেতা ২০০৭ ইং এপ্রিল গড়েরবন্দ সম্মেলনে) □

১৮ মার্চ জাতরকা গুরুত্বপূর্ণ দিনহান

১৮ মার্চ জাতরকা বা সমাজরকা নিয়াম গুরুত্বপূর্ণ দিনহান। এহানর কারণহান থাৎনাত ইকরানি অইল। ১৮ মার্চ ১৯৯৬ ইং নিখিল বিষ্ণুপ্রিয়া মণিপুরী সমাজর মানুরকা নিংশিং অনার দিনহান, যেহানরে ঐতিহাসিক স্মরণীয় দিনহান বুলানি যাকরের। কারণ ঔদিন উহান আসামর প্রাক্তন মুখ্যমন্ত্রী হিতেশ্বর শইকীয়া ডাঙরিয়া গিরকে আসাম বিধান সভারমা কেবিনেট সিদ্ধান্তল মেমো নং TAD/ OBC/92/94/pt/3, তাং ১৮-৩-৯৬ ইং বিষ্ণুপ্রিয়া মণিপুরী জাত এহানরে অন্যান্য পিচপরা শ্রেণীরমা অন্যান্য সম্প্রদায়র মানুর লগে ক্রমিক নং ১৩ হিসাবে তালিকাভুক্ত করল। এহান মহামান্য গৌহাটী উচ্চ আদালতর কেইস নং ১/১৯৯৪ ইং অন্যান্য পিচপরা শ্রেণীর আদেশ মেমো নং ABC/BPR/19/94/55/559-61, তাং ৩০-১০-৯৫ ইং তারিখ মতে আগেকার মুখ্যমন্ত্রী হিতেশ্বর শইকীয়া গিরকে লিংখাত করে দিয়া জাতহানরে পাল করে দিল।

কিন্তু এহান কিয়া পালকরে দিল কারণহানর উত্তর বিছারতেগা পেয়ারতায় অতি দুঃখপূর্ণ ঘটনাহান, যেহান জাতর ইতিহাসে নিংশিং অনার দিনহান। ঔ দিন উহান বিষ্ণুপ্রিয়া মণিপুরী ছাত্র-যুব সংস্থা বারো গণ-সংগ্রাম পরিষদর ৫০১ ঘন্টা “রেল-রুখো” আন্দোলনর ডাকে ভাষা আন্দোলনর হত্নায় প্রতাপগড় লয়ার কচুবাড়ীর নিঙলগ সুদেষ্ণা গিথানক সৈরাচারী পুলিশর গুলিত রকত কাত্ করিয়া আসামর বীরবালা কনকলতার সাদনে জাতর ফিরালহান বুক্গত দিয়া নিংস্থাহান লালয়া শহীদগ অইলী। তেইর লগে আরাকৌ তেংকল আহান প্রতাপগড় লয়ার বেয়াপা বেইবুনি আহত অয়া হাসপাতালে চিকিৎসাধীন থায়া সাক্ষী অইলা। তা থকয়া এরে দিন এহান জাতরকা নিয়ামপারা গুরুত্বপূর্ণ দিনহান বা ঐতিহাসিক দিনহান। ঔ ঘটনাহান অইলতায় ১৬ মার্চ, ১৯৯৬ ইং। এরে পৌ এহান সরকারী গোয়েন্দার মারফতে সিলনির লগে লগে হিতেশ্বর শইকীয়া গিরক দ্বিদিন পিছেদে অর্থাৎ ১৮ মার্চ ১৯৯৬ ইং বিষ্ণুপ্রিয়া মণিপুরী জাত এহানরে অন্যান্য পিচপরা শ্রেণীরমা অন্তর্ভুক্ত অইল বুলিয়া সরকারীভাবে ঘোষণা করল। ফলে জাতহান অ, বি, সি, হিসাবে স্বীকৃতি পেইলা। ফলে এরে দিন এহান “জাতি স্বীকৃতি দিবস” বুলিয়া তাৎপর্যপূর্ণ। ঔহানরে কেন্দ্র করিয়াই ২০০১ সালর পয়লাবেদে আসাম সরকার বিষ্ণুপ্রিয়া মণিপুরী ভাষা প্রাথমিক স্তরে প্রথম শ্রেণীরমা “কনাক-পাঠ” লেরিকহান চালু করল। অবশ্য এহানর ক্ষেত্রে সমাজর আর আর সংগঠন যেমন মহাসভা, সাহিত্য সভা, ছাত্র-যুব সংস্থা হাবির অবদান যথেষ্ট। তা থকয়া ভাষা চালুর ক্ষেত্রে এহান অতি গুরুত্বপূর্ণ ঘটনাহান যেহান বীজগ বুলানি থক।

লমকরতেগা এহান মাতানি মনাউরিয়া যে ১৮ মার্চ দিন এহান প্রত্যেক বছর “জাতি স্বীকৃতি দিবস” হিসাবে গুরুত্বপূর্ণ বিবেচনা করিয়া প্রত্যেক বছর দলমত নির্বিশেষে চাংখল করে পালন করানি থক। জাতর উজ্জ্বল ভবিষ্যত খালকরতেগা এহানর গুরুত্ব অপরিসীম।

জয় বিষ্ণু— “বিষ্ণুপ্রিয়া মণিপুরী জাতহান ঙালক, পালক”।

(প্রবন্ধ এহান নুবা এলাং ২০০৫ ইংরাজীর মার্চে প্রকাশিত আছে।) □

লেখকর আর আর লেরিক—

লেইরুক (১৯৮৩),


নলদময়ন্তী (নাটক, ১৯৮৮),

দুগ্ধভছড়ার ইতিহাস (প্রবন্ধ, ১৯৯৭),

প্রবন্ধ সংকলন (২০০০),

শহীদ সুদেষণ (২০০৪),

শ্রীশ্রী রাধামাধব জীউর ইতিহাস (২০০৭)





বিষ্ণুপ্রিয়া মণিপুরী ঠারর প্রাবন্ধিক
ব্রজগোপাল সিংহর জন্ম ১৯৫০
সালর অক্টোবর মাহাত, করিমগঞ্জ
জেলার কৃষ্ণনগর (খিলুবা) গাঙে।
ইতিহাস বিষয়ল স্নাতকোত্তর ডিগ্রি
নেনার পিছে পাথারকান্দির মডেল
হাইয়ার সেকেণ্ডারি স্কুলে ইতিহাসর
বিষয় শিক্ষকগ হিসাবে যোগ দিল।
পিছেদে দুল্লভছড়ার উচ্চতর মাধ্যমিকর
অধ্যক্ষর পদফামে থায়া অবসর নিলগা।
গিরকর ইকরা লেরিকরমা কবিতা
সংকলন লেইরুক (১৯৮৩), নলদময়ন্তী
(নাটক, ১৯৮৮), দুল্লভছড়ার ইতিহাস
(প্রবন্ধ, ১৯৯৭), প্রবন্ধ সংকলন
(২০০০), শহীদ সুদেষ্ণা (২০০৪),
শ্রীশ্রী রাধামাধব জীউর ইতিহাস
(২০০৭) উল্লেখযোগ্য। বর্তমানে
লেখক নেহা বুলিয়া উত্তর পূর্বাঞ্চলর
ইতিহাস সংস্থার সদস্যগো।

এবাকা গিরকর ফণ্ডনির পথে লেরিক
হান অইলতায়— Bishnupriya
Manipuris in the Freedom
Movement.